


Gospel of Luke in Pahari Mahasui


यीशु रै बारै दी लुका रै
लिखी एन्दी खुश खबरी

(छवारु) पहाड़ी महासुई



Gospel of Luke

Pahari Mahasui



Published by :


OPERATION AGAPE

Agape Bhawan, B-XI-1995, Brown Road,
Ludhiana, Punjab, India.

Ph : 0161-2610761, 5002024.

Email : mail@operationagape.com.

Web : www.operationagape.com.



*For Christian resources in Pahari Mahasui
language, visit www.paharimahasui.in*

The Gospel according to LUKE

इयँ किताबी रँ बारै दी दुई बुशै

जो किताब तुमारै हाथा दी आ इयँ लुका नावां रँ आदमीए लिखी आ जुण एक डाक्टर थौं। सेऊ दुजी ज़ाती रँ आदमी थौं एथीलै तिणीए लिखौं आ, ताकी दुजी ज़ाती रँ लोग आसानी कौरी सौमझी सौका। तिणीए यीशु रँ बारै दी लिखौं कि यीशु सिर्फ इस्राइली ई लोग रँ नाई बल्की पुरी धतरी रँ लोग लै छुटकारै दैणै वालौं आ। लुका लिखा कि यीशु गरीब लोग के खुश-खबरी शुणाऊणा लै" परमेश्वरा री आत्मै औटाओ थौं। जेबी लुका री किताब लिखी ता तेसके मरकुसा री लिखी एन्दी किताब थी एथीलै तिणीए कुछ बुशै तिदरु भी लिखी आ। और लुका री किताबी लिखणा लै लुके कुछ और किताबी री भी मजद नई आ। लुका पुराणी बुशु री जानकारी छाड़नै वालौं भी थौं, तिणीए प्रेरितों रँ कामा री किताब भी लिखी आ। इयँ बुशै कास आदमी री चाणी एन्दी नाई बल्की बिलकुल सौच्यी और पाकी ई।

रूप-रेखा :

इयँ किताबी रँ बारै दी दुई बुशै

(१:१-४)

यहुन्ना और यीशु रँ जन्म और बचपना रँ बारै दी (१:५--२:५२)

यहुन्ना री सेवा रँ बारै दी (३:१-२०)

यीशु रँ बप्तिस्मा और पौरखुणै रँ बारै दी (३:२१--४:१३)

गलीला दी यीशु (४:१४--९:५०)

गलीला कु यरुशलेमा झाऊं यीशु रँ सफर (९:५१--१९:२७)

यरुशलेमा दी आखरी हौफ्तौ (१९:२८--२३:५६)

यीशु रँ जीउंदौ हुणौ, दिशणौ और सौरगा लै डेउणै रँ बारै दी (२४:१-५३)

ज़ाणकारी

1¹ ओ थियुफिलुस साहब, यीशु मसिए जो कुछ काम आमु मांझीए पुरौ कियो आ, तिऊं बुशु रँ बारै दी भौरी लोगुए लिखणे री कोशिश की आ।² इयो खुशी रँ संदेश^a लोग झाऊं यीशु रँ तिऊं पैहलै चलेऊ रँ ज़रीए पौउचौं आ जुणीए इयँ बुशै आपणी आखी कौरीए पुरी औदें देखी थी और इयँ खौबर आमके तिऊंकु मिली आ जुण तेबी तिे जीउंदै मान थै।³ तैबे मयै यीशु रँ बारै दी जनमा क सारी बुशै पौरखियो इणौ फैसलौ कियो कि इयँ एक-एक बूश सुंची सौमझीओ ताऊलै लिखु।⁴ ताकी ताऊके पौतौ लागा की ज़ेजी शिक्षा

ताउंलै मिली ऐंदी और जेजी तू सौची माना ई सै बूश ठीक और पाकी आ।

यहुना रै जनमा रै बारे दी

⁵ सारी बुशु री शुरुआत यहदी याजक जकर्याह नांवा रै आदमी क हुई आ जुण यहदिया रौ राजौ हेरोदेसा रै बौगता दी जीउंदौ थौ, जकर्याह याजक अबियाह नांवा रै याजकीयै गुटा रौ आदमी थौ और जकर्याह री छेउड़ी इलिशीबा थी हारुन नांवा रै याजक री खानदानी री। ⁶ जकर्याह और इलिशीबा परमेश्वरा री नौजरीए धौमी थै, और सै दुइया परमेश्वरा रै हुकम और विधी आछा कौरी माना थै। ⁷ पर इलिशीबा रै कोई भी सनतान नाई थी कैलैकि तियारी कूख बौन्द थी और सै दुइया बुडै थै। ⁸ जकर्याह गुटा रै लोग जो याजक थै सै परमेश्वरा रै घोरा दी याजका रौ काम कौरा थै कैलैकि तेबी तिउंरी बारी थी; ⁹ याजक री रीती रिवाजा कौरी जकर्याह नांवा री चिड्डी निकली कि सेउ प्रभु रै घोरा भीतै डेइयौ धप जाला। ¹⁰ धपा जालणा रै बौगतै लोगु री भीड़ बाइरै प्राथना कौरदै थी लागी औन्दी। ¹¹ सेजै बौगतै जकर्याह कै परमेश्वरा रौ एक दूत बेदी री सुलटी बिलै प्रगट हुइयौ दिशौ। ¹² सेउ तेस दुता देखीयौ डौरौ और कांबदै लागौ। ¹³ पर तिणीयै दुतै तेसलै बोलौ, ओ जकरयाह, नाई डौर कैलैकि जो प्राथना तांए सनतान पाइणा लै की आ, सै प्राथना परमेश्वरै शुणी गोई आ, 'तेरी छेउड़ी इलीशिबा रौ एक मांऊ हुआ, तू तेसरौ नांऊ यहुना छाडै, ¹⁴ तेस पैदौ हुइयौ तांऊ लै और भौरी लोगु लै बौड़ी खुशी हुआ आ, ¹⁵ कैलैकि सेउ प्रभु री नौजरी दी बौडौ

हुआ; और सेउ केबी भी अंगुरा रौ रस और सूर नाई पिंदौ; आपणी मां रै गर्भा कु ई सेउ परमेश्वरा री पवित्र आत्मा कौरी भरपूर हुआ सा। ¹⁶ जैबै सेउ बौडौ हुआ लौ तैबै सेउ आपणै सन्देशा कौरीयै इसाइलिऊ लोगु मांझीया कु भौरी लोगु आपणै प्रभु परमेश्वरा बिलै आणा आ। ¹⁷ सेउ परमेश्वरा रै सेवक, एलियाह गुरु जिणौ आत्मिक और शक्तिशाली हणौ आ। सेउ प्रभु रै जनमा क पैहलै आशा, ताकी प्रभु कालै आदमी तयार कौरा। तैरौ छोहरु मां-बाबा रौ जीऊ आपणै लोलडेऊ बिलै फेरा, और तिउंलै आज्ञा मानणे री शिक्षा दिया आ। ¹⁸ जकर्याह ऐ परमेश्वरा रै दुता कु पुछौ, 'जो तांए बोलौ आ तेस हांऊ सौची किणै कौरी मानु। कैलैकि हांऊ ता गो ऊ बुडौ हुई और मेरी छेउड़ी भी गोई बुडी हुई। ¹⁹ तैबै परमेश्वरा रै दुतै तेसलै जवाब दैऔ मेरौ नांऊ जिब्राइल आ और हांऊ सौदा परमेश्वरा काए खौडौ रौआ ऊ। और तेसरी मिठी बुशै शुणाऊ। तिणीए ई हांऊ एजी खौबरी कौरी तांऊ काए भेजौ ऊ। ²⁰ और जो बूश मुयै तांऊ आइलै बोली आ, तांए तेथ माथै विश्वास नाई कियो, आबै जेबी झांऊं तैरौ छोहरु नाई औआ लौ तेबी झांऊं तू लाटौ रौआ ई और कुछ भी बोली नाई बोलदौ कैलैकि जो बूश मुयै तांऊ लै बोली आ, सै बूश आपणै ठीक बौकता दी पुरी हुआ ई। ²¹ तैबै लोग दारा काए जकर्याह बाइरै पौखदै थै लागै औन्दै, सै परेशान थै हूए औन्दै कि जकर्याह कै परमेश्वरा रौ घोरा बिता एती बौगत कैलै लागौ औलौ? ²² जेबी जकर्याह भीतरा कु बाइरै आशौ ता तिउं लोगु आइलै सेउ कुछ भी ना बोली बोलौ। और सै सौमझी गौए कि इणीए प्रभु

रें घौरा बितें कोई दर्शन देखौ। सेऊ तिऊं आइलै इशारे कौरी बुशै लाईदें लागौ कैलैकि सेऊ लाटौ बौणी गौ थौ।²³ जेबे जकर्याह री सेवा कौरनै री बारी पुरी हुई तैबे सेऊ आपणै घौरै डैऔ।²⁴ तेथ बसीए तेसरी छेउड़ी इलिशीबा गौरकड़ी हुई और पांजा मिहनै झाऊ तिऊंए इए बुशै कासी आइलै ना बोली,²⁵ और सै आपणै जीवा दी सुंचदें लागी कि परमेश्वर केती दयालु आ कि मु आइलै केती बौड़ौ काम कियौ आ।

यीशु मसीहा रें जनमा री खौबर

²⁶ जेबे इलिशीबा रें छौऊऔ मीहनौ हुआ, तैबे परमेश्वरें जिब्राइल नाँवा रौ दूत गलील परदेशा रें नासरत इलाकै दी,²⁷ मरियमा काए भेजौ जुण बिण बयाही थी। और सै युसुफ नाँवा रें छोहरु लै थी लाई ऐन्दी।²⁸ परमेश्वरा रौ दूत मरियमा काए परगट हुआ और बोलदें लागौ, तेरी जै जैकार हो, ताऊं माथै परमेश्वरा री दया हुई आ, और परमेश्वर ताऊं आइलै आ।²⁹ इऊं बुशै शणीयौ मरियम डौरी और हैरानी कौरीए सुंचदें लागी कि एस जै जैकारा रें खौबरी रौ का मतलब औलौ?³⁰ परमेश्वरा रें दूतै मरियमा लै बोलौ, “ओ मरियम डौर नाई कैलैकि परमेश्वरा री दया ताऊं माथै हुई आ।³¹ तू गौरकी हुआ ई, और ताऊंकु एक छोहरु हुआ, तू तेसरौ नाऊं यीशु छाड़ै।³² सेऊ सारेऊ कु बौड़ौ हुआ आ और तेसलै परमप्रधान परमेश्वरा रौ छोहरु बोलाई और प्रभु परमेश्वर तेसकै तेसरै पुरखा दाऊद राजै री राजगधी दिआ सा।

³³ और सेऊ इसाइली लोगु माथै सौदा राज कौरा आ। तेसरौ राज केभी भी खातम नाई हुन्दौ।³⁴ मरियमै परमेश्वरा रें दूता लै बोलौ, ‘इणौ किणै कौरी हुआ? हाऊं ता औजौ अण बयाही छोटुड ऊ।³⁵ परमेश्वरा रें दूतै तिआलै जवाब दैऔ, ‘पवित्र आत्मा ताऊं दी आशा, और परमप्रधान परमेश्वर जुण सारेऊ कु बौड़ौ आ तेसरी शक्ति ताऊं माथै आशा। जो छोहरु ताऊंकु हणौ आ सेऊ पवित्र हणौ, और तेसलै परमेश्वरा रौ छोहरु बोलाई।³⁶ और देख तेरी रिश्तेदार इलिशीबा भी बुड़ीदी बारै गौरकी हुई आ। लोग तिआलै बोला थै कि इआरी आ कूख बन्द, पर तिआरै आजकाले छौऊऔ मीहनौ आ।³⁷ कैलैकि परमेश्वरा काले केजौ भी काम कठीण नाई आसतौ।³⁸ एजी बुशा माथै मरियमै बोलौ, ‘देख, हाऊं ता परमेश्वरा री दासी ऊ, जीणौ तारें बोलौ आ, तिणी चांई हुआ। तेथ बसीए परमेश्वरा रौ दूत तियां काए कु डेई गौ।

मरियमा रें इलीशीबा कु मिलदें डेउणौ

³⁹ कुछ दिना बासीए मरियम तैयार हुईयौ डांडेउ माथै यहूदा परदेशा रें एक इलाकै दी डेई।⁴⁰ जीए जकर्याह रौआ थौ तेसरै काए डेइयौ मरियमै तेसरी छेउड़ी इलिशीबा के डाल की।⁴¹ जीणी ई इलिशीबे मरियमा री डाल शुणी, तिणी ई इलिशीबा रें पेटा दी माऊं हिलदें लागौ, और इलिशीबा परमेश्वरा री पवित्र आत्मा कौरीए भौरुई।⁴² तैबे तिआंए जौरै मरियमा

लै बोलौ, 'तू सारी छेउड़ी मांझीआ कु परमेश्वरा री नौज़री दी भौली ई, और तैरौ गर्भा रौ छोहरु भी भौलौ आ।⁴³ इयै केती बौड़ी इज्जता री बूश आ, कि मैरै प्रभु री मां मु ज़ीणी छेउड़ी कु मिलदैं आशी आ।⁴⁴ ज़ीणी ई तारै मुकै ढाल की आ, तिणी ई मैरै पेटा दी माऊं खुशी कौरीए हिलदैं लागौ।⁴⁵ भौली तू कैलैकि तारै विश्वास कियौ आ, कि जो भी बूश परमेश्वरा री तौरफा कु बोली आ सै बूश पुरी हुआ आ।

मरियमा रौ स्तूति रौ गीत

⁴⁶ तैबै मरियमै बोलौ, 'मैरौ आत्मा प्रभु री बौड़ाई कौरा आ,⁴⁷ आ..... हा..... मेरी आत्मा मेरी मुक्ती कौरनै वालै परमेश्वरा री बौड़ाई कौरा आ।⁴⁸ कैलैकि परमेश्वरै आपणी दासी री गरीबी देखी आ एथीलै, "ओ परमेश्वर आज़ा कु मुलै जुगा-जुगा झाऊं भौलौ बोलाई"⁴⁹ तिणी परमेश्वरै जुण सारेउ कु शक्तिवालौ आ मुलै बौड़ै - बौड़ै काम किए ई। तेसरौ नाऊं पवित्र आ⁵⁰ जुण परमेश्वरा रौ डौर माना ई तिऊं माथै परमेश्वरा री दया तिउंरै सारी पिड़ी जाऊं रौआ आ।⁵¹ परमेश्वरै आपणी बाई री एती ताकत देखाई, जुण आपुलै बौड़ै बौणा थै सै किणै तित्तर-बित्तर किए ई।⁵² तिणी परमेश्वरै राज़ै-महाराज़ै कु तिउंरी राज़गधी छुड़ाई आ, और गरीबु री छाड़ी इज्जत।⁵³ और भुखै लोगु लै खिलाई आच्छी-आच्छी रौटी, और सेठ गाड़ै खाली हाथै बाड़रै।⁵⁴ परमेश्वरै आपणै इसाइली लोगु री मज़द की, और तिऊं आइलै कियौ औन्दौ आपणौ वाइदौ नाई बिसुरदौ।

⁵⁵ तिणीए आमारे पुरखा अब्राहम और तिउंरै वंशा (पिड़ी) आइलै वायदौ कियौ कि परमेश्वरा री दया तिऊं माथै सौदा बौणी रौआ।⁵⁶ मरियम कम से कम चिया मीहनै झाऊं इलिशीबा आइलै रौई, और तेथ बसीए डेई वापिस आपणै घौरै।

यहुना बपतिस्मा देणै वालै रौ जनम

⁵⁷ तैबै इलिशीबा रै औलखीणा रै दीन पुरै हुए और तिआंरौ एक माऊं हुआ।⁵⁸ और इयै खौबर खरकचार तिआंरै आस-पड़ोसा दी और सारै रिशतेदारु मांझीए फौइली गोई, कि प्रभुए तिआं माथै बौड़ी दया की आ। तैबै सौभीए तिआं आइलै खुशी मौनाई।⁵⁹ जैबै सेऊ माऊं आठा दिना रौ हुआ तेबी सारै रिशतेदार और गोश्टण तेस माऊं रौ खतना कौरना लै कौठे हुए, सै तेस माऊं रौ नाऊं तेसरै बाब जकर्याह ज़ीणौ छाड़दैं लागै,⁶⁰ पर तेस माऊं री आमै तेसरौ नाऊं छाड़ना लै मना की, और बोलौ, "एसरौ नाऊं यहुना जा छाड़नौ"⁶¹ इणै शुणीयौ सारै लोगुए हैरानी कौरीए पुछौ, "कैलै"? तैरै टौबरा दी ता एजै नावां रौ कोई नाई?⁶² तैबै रिशतेदारुए तेस माऊं रै बाबा कु साना कौरीयौ पुछौ।⁶³ तिणी जकर्याह ऐ लिखणा लै तौखती मांगी और तिदरा ई लिखौ कि एसरौ नाऊं यहुना सा। इणै शुणीयौ सारै हैरान हुए।⁶⁴ तैबै जकर्याह रौ मुंह खुलौ और बेजौ बौणौ। और परमेश्वरा री बौड़ाई कौरदैं लागौ।⁶⁵ तेसरै आस-पड़ोसा दी रौइणै वालै सारै डौरी गौए, और इयै बुशै यहुदा परदेशा रै सारै पहाड़ी मुलखा दी फौइली गोई।⁶⁶ सारै शुणनै वालै आपणै ज़ीवा दी सुंचदैं लागै कि एऊ

छोहरू किणौ औलौ इणौ पा? कैलैकि प्रभु री शक्ति एस माऊं आइलै थी।

⁶⁷ तैबै माऊं रै बाब जकरयाह माथै परमेश्वरा री पवित्र आत्मा आशी और सेऊ भविष्यवाणी कौरदै लागौ।

जकरयाह रै बौड़ाई गीत

⁶⁸ इस्राइला रै प्रभु परमेश्वरा री बौड़ाई चाई हुई,

कैलैकि तिणीए लोग माथै तौंए दया कौरीयो तिऊंरौ छुटकारौ कियो आ।

⁶⁹ और आपणै दास दाऊदा रै वंश कु आमुकालै एक पापा कु छुटकारौ देणैवालौ भेजौ।

⁷⁰ जीणौ तिणीए पुराणै बौकता रै गुरु रै जरीए बोलौ थौ,

⁷¹ कि आबै आमै आपणै सारै दुश्मना रै हाथा कु बौची ई

⁷² परमेश्वरै आपणौ पवित्र वायदौ जो आमरै पुरखा आइलै कियो थौ

तेस वाइदौ याद छाड़ीयो आपणै लोगु माथै दया की।

⁷³ और सै कसम जो परमेश्वरै अब्राहमा आइलै खाई थी

⁷⁴ कि परमेश्वर आमु आमरै दुश्मना रै हाथा कु छड़ावा ताकी आमै आपणै दुश्मना कु निडर हुइयो परमेश्वरा री सेवा,

⁷⁵ तिऊंरै सामनै पवित्र और नियम धौर्मा कौरी सारी उमरीए कौरी सौका।

⁷⁶ और ओ छोहरू ताउंलै लोग परमपरधान शक्तिवालै परमेश्वरा री तौरफा कु भेजौ औन्दौ गुरु बोला ई,

कैलैकि तू प्रभु कालै बाट तयार कौराई।

⁷⁷ तू तिऊं लोगु कै शिखावा ई कि पापा री माफी पाइयो, छुटकारौ किणौ मिला आ।

⁷⁸ इयो सब परमेश्वरा री बौड़ी दया कौरीए हुआ, जेथ कौरीए परमेश्वरा री तौरफा कु आमुलै नौई जीन्दगी मिला सा।

⁷⁹ न्यारै और मौरनै रै डौरा री छाई दी रौइणै वालेऊ लै पयाशौ दिआ, और आमरै कदम आच्छी बाटा दी सीधै चलावा।

⁸⁰ तैबै सेऊ माऊं बौड़दै लागौ और आत्मा दी मजबूत औन्दै लागौ, और इस्राइली लोगु माझीए सेऊ प्रगट हुन्दै झाऊं सेऊ शुनशान जागहा दी रौ।

यीशु रौ जनम

(मत्ती 1.18-25)

2¹ सेजै दिनु दी औगस्तुस नावां रै बौड़े राजै हुकम देओ कि सारै रोमी राजा रै लोग आपणै-आपणै नाऊं दर्ज कौरौ।² इए पैहली नाऊं लिखाई थी, और इए तेबी हुई जेबी क्विरिनियुस नावां रौ आदमी सीरिया देशा रौ आफसर थौ।³ तैबै सारै लोग आपणै नाऊं लिखाउंदै आपणै-आपणै इलाकै दी डेवै।⁴ युसुफ भी जुण गलील परदेशा रै नासरत गावां रौ थौ, आपणै नावां लिखाउंदै यहूदा परदेशा दी दाऊदा रै गाऊं बैतलैहमा दी डैओ। कैलैकि सेऊ दाऊदा री खानदानी रौ थौ।⁵ सेऊ आपणी मंगेतर मरियमा आइलै जुण गौरकड़ी थी तियै नाऊं लिखाउंदै डैओ।⁶ तिऊंरै तियै रौइणा रै बौकता दी मरियमा रै, औलखिणा रै

दीन पुरै हूए।⁷ मरियमा रै तिरे पैहलौ जाओ हुओ और तिआंए सेऊ जुडकै दी मेटाईयो खौरली दी छाड़ौ, कैलैकि तिऊकै सराय दी रौइणा लै जागहा नाई थी।

परमेश्वरा रै दूता रै जरीयै भेरालडु लै खुशी रौ संदेश

⁸ सेजे इलाकै दी काई भेरालडु थै जुण राची, थाचा दी रौइयो आपणै शाला री चोकीदारी कौरा थै।



भेरालडु आपणी भेरीऊ जागदें 2.8

⁹ सेजे राची परमेश्वरा रौ एक दूत तिऊं कारे आशौ और तिऊं भेरालडु रै चारौ तौरफा दी प्याशौ चौमकौ। तैबै तेस देखीयो सै भौरी डोरी गौए

¹⁰ तिणीये दूतै तिऊंले बोलौ, "डौरो नाई" कैलैकि हाऊं तुमुके आज बौडी खुशी री खौबर शुणावा ऊ जो सारै लोग लै आ।¹¹ आज दाऊदा रै इलाकै दी तुमारौ उदार कौरने वालौ पैदौ हुई गौ आ जो प्रभु मसिह आ।¹² और तेसरौ पौतौ तुमु लै इणौ सा, कि तुमुके एक माऊ खौरली दी जुडकै दी मेटाओ औन्दौ मिला सा।¹³ तैबै तिरे परमेश्वरा रै दूता आइलै परमेश्वरा रै भौरी दूत परमेश्वरा री बौड़ाई कौरदें और इणै बोलदें दिशै,

¹⁴ "सौरगा दी परमेश्वरा री बौड़ाई चाई हुई। और धौतरी माथै तिऊं लोग लै शान्ती चाई मिली जासकु परमेश्वर खुश हुआ आ;"

¹⁵ जेबी परमेश्वरा रै दूत तिऊं कारे कु सौरगा लै डेवै तैबै भेरालडु आपु मांझीए बोलदें लागै कि, आशौ आमै बेतलैहमा लै डेई आ जो बूश प्रभुए आमु आइलै बोली आ तिणै आमै देखी ई।¹⁶ तैबै सै तिदरु फेटी डै, तिऊंए तिरे मरियम, युसुफ और खौरली भीतै सेऊ माऊं देखौ।¹⁷ इणै देखीयो तिऊं भेरालडुए सै बूश जो एस माऊं रै बारै दी पैहलै शुणी थी सै सारेउ कै बोली।¹⁸ भेरालडु री इऊं बुशै शुणीयो सारै लोग हैरान हूए जा तिणै थै।

¹⁹ पर मरियमे इए सारी बुशै शुणीयो आपणै जिवा दी छाड़ी और सुंचदें लागी।²⁰ भेरालडु लै, जिणौ परमेश्वरा रै दूतै बोलौ औन्दौ थौ तिणौ सारौ शुणीयो और देखीयो परमेश्वरा री बौड़ाई और स्तुती कौरी-कौरीयो तिदरु वापिस डेवै।

यीशु रौ नाऊ छाड़नौ

²¹ आठा दिना बासीए जैबै तेस माऊं रौ खतना हूओ। तैबै तेसरौ नाऊ यीशु छाड़ौ जो परमेश्वरा रै दूतै तेसरै गभौ दी आशणै कु पैहलै बोलौ थौ।

परमेश्वरा रै घौरा दी यीशु रौ अर्पण

²² कुछ बौकता बासीए मुसा गुरु रै नियमा कौरीए तिउंरै शुद्ध हूणै रै दीन पुरै हूए, तिऊंए यीशु परमेश्वरा रै घौर यरशलैमा दी निओ।²³ जिणौ प्रभु रै नियमा दी थौ लिखौ औन्दौ कि केजौ भी पैहलौ छेहरु प्रभु कालै पवित्र हुआ सा।²⁴ और प्रभु रै नियमा दी जिणौ ठीक थौ, कबुतरा रै जोडै या पंडुका रै जो कबुतरा जिणै हआई देखणा लै, तिऊंए सै आणीयो बौली किरै।

शमौना रौ गीत

²⁵ यरुशलेमा दी शमौन नावां रौ एक आदमी थौ जुण धौर्मी और परमेश्वरा रौ भौगत थौ, सेऊ पवित्र आत्मा कौरिऐ भरपूर थौ, और सेऊ आपणे लोगु इस्राएला लै सुख शान्ति पौखदै थौ लागौ औन्दौ। ²⁶ पवित्र आत्मै तेसरै जीवा दी बूश थी पाई ऐन्दी कि, जेबी झाऊं तू प्रभु री तौरफा क भेजौ औन्दौ मसिहा ना देखा लौ तेबौ झाऊं

तू नाई मौरदौ। ²⁷ और पवित्र आत्मा रै बोलनै माथै शिमौन परमेश्वरा रै घौरा दी डैऔ और सेजे दिना दी मरियम और यूसुफा रै भी माऊं यीशु परमेश्वरा रै घौरा दी थौ आपणौ औन्दौ जिणौ तिऊंरै नियमा दी थौ। ²⁸ और शिमौन भी तियै थौ, तिणीऐ सेऊ माऊं आपणी उंगाली दी पाकड़ौ और परमेश्वरा री बौड़ाई कौरदै लागौ।

²⁹ कि, ओ... प्रभु ऐबै तू आपणौ दास शान्ती कौरिऐ आपु काऐ औटाऊ।

जिणौ तैरै वचना दी आ।

³⁰ कैलैकि मेरी आखी ऐ मुक्ती दैणै वालौ देखी गौ आ।

³¹ जुण ताएँ सौंभी लोगु लै भेजौ आ।

³² और सेऊ एक इणौ प्याशौ आ जुण सारै देशा और दुजी जाती रै लोगु रै सामनै परमेश्वर प्रगट कौरा आ, और तैरै आपणै लोग इस्राइला लै बड़ाई आ।

³³ यीशु रै बारै दी जो कुछ शमौन थौ बौलदै लागौ औन्दौ, तेसरी बूशै शुणियाँ तेसरै मां बाप हैरान हुए।

³⁴ तैबै शिमौनै तिऊंलै आशीष देई और बौलौ, " मरियम ! ऐऊ माऊं ता परमेश्वरा री तौरफा क चुनौ (छांटौ) औन्दौ निशाण आ, भौरी सारै

इसाइली लोग ऐस नाई मानदै और ऐजी बूश तिऊं इस्राइला लोग नाश कौराई पर भौरी सारै इस्त्राइली लोगु लै सेऊ खुशी रौ कारण बौणा आ, जासरै विरोधाई बूशै ला ई। ³⁵ तुमारै जीवा दी वार-पार तलवारी कौरि छेद हुआई ।

हन्नाह री गवाही

³⁶ एक, भविश्यवणी कौरनै वाली छेवडी थी जासरौ नावं हन्नाह थौ। सै भी सेजे बौक्ते तिऐ थी। और सै अशेर खानदानी मांझिऐ क फनुएल नावां रै आदमी री छोटडु थी। जेबी तिआंरी शादी हई तेथक साता साला बासिये तिआरौ बोटटौ मौरौ पोरु और सै विधवा हुई। और सै भौरी बुढी थी। ³⁷ ऐबै तिआंरी ऊमर 84 साल थी और सै परमेश्वरा रै घौरा छाडीयौ केशी ना डेआ थी । सै ब्रौत और प्रार्थना कौरि कौरियाँ राची दिनै परमेश्वरा री भौक्ति कौरा थी। ³⁸ और सेजे भौक्ते तिऐ आशियाँ परमेश्वरा रौ धन्यावाद कौरदी थी लागी औन्दी, और तिऊं सभी कै जुण यरुशलेमा रै छटकारै पौखदै थै लागै औन्दै, यीशु रै बारै दी बूशै लाइदै लागी।

नासरता लै वापिस डेउणौ

³⁹ जैबै तिऊंऐ प्रभु रै नियमा कौरिऐ सारौ काम पुरौ कियो, तैबै सै गलील प्रदेशा दी आपणै गांव नासरता लै डेई गौर। ⁴⁰ यीशु बौडदै लागौ, आत्मा दी मजबूत और औकली बुद्धि कौरिऐ भी भौरिदौ लागौ, और परमेश्वरा री दया तेस माथी थी। ⁴¹ हर सालै यीशु और यीशु रै मां-बाप फसह रै सार्जे मनाउणा लै यरुशलेमा लै डिआ थै इणौ कौरनौ सारै यहूदी लोगु लै जरूरी थौ।

यीशु परमेश्वरा रै घौर दी

⁴² जेबी यीशु बारहा साला रौ थौ। तैबे सै सारै साजै लै यरुशलेमा लै डेवे, जिणै सै हर साले डिआ थै। ⁴³ जैबे सै साजै रै दिन परै हूरे तैबे सै आपणै घौरै वापिस डेवै औरै माऊं यीशु रौऔ यरुशलेमा दी, और तेसरै मां-बापा के ना लागौ पौतौ। ⁴⁴ तैबे तिऊंरे समझौ कि सेऊ ओरी आदमीऊ आईले औलौ। एकी दिन आडिऔ बितणै बासिरे सै यीशु आपणै पड़ौसी और जीयै तीऊंरै जाणनै वालै थै तिरे लोड़द लागै। ⁴⁵ पर जैबे तिऊं के यीशु नाई मिलौ तैबे सै लोड़द-लोड़द यरुशलेमा दी वापिस पहुचै। ⁴⁶ और चीजै दिना बासिरे तिऊंरै यीशु परमेश्वरा रै घौरा दी तिऊं मांझिरे बौशौ औन्दौ देखौ जुण तिरे शिक्षा दिया थै। और सेऊ तिऊंरी शुणदै और सवाला पुछदै तेहरै मां-बाबै देखो। ⁴⁷ जैती भी तियै शुणदै थै लागै औन्दै सै सब यीशु री औकल और जवाबा शुणीयौ हैरान थै। ⁴⁸ तैबे यीशु रै मां-बाप आपणै छोहरू देखियौ हैरान हूरे और तेसरी आमै मरियमे तेसलै बोलौ ओ मैरौ छोहरू ताईए आंमु आईलै इणौ बरताव कैले कियौ। देख तैरौ बाब और हांऊ केती परेशानी कौरीयै थै ताऊं लोड़द लागै औन्दै। ⁴⁹ यीशुए तिऊं लै बोलौ तुमे मु लोड़द कैले ई लागै औन्दै का तुमु के ठेऊ नाई कि मुं परमेश्वरा रै घौरा दी रौईणौ जरूरी आ। ⁵⁰ पर जो बूश यीशुए तिऊं आइलै बोली, से तेसरै मां-बाबा के नाई समझुई, ⁵¹ तैबे सेऊ तिऊं आईलै नासरत गांवा दी आशौ और तिऊं आईलै रौ और तेसरी मांए मरियमे ऐ सारी बुशे आपणी जीवा दी छाडी। ⁵² यीशु औकली दी और

शरीरा दी परमेश्वर और आदमी री कृपा कौरी बौड़द लागौ।

यहुना बपतिस्मा दैणै वालै रौ संदेश
(मत्ती 3:1-12; मरकुस 1:1-8;
यहुन्ना 1:19-28)

3¹ जेबी तिबिरियुस नांवा रै बौड़ै राजै रौ राज थौ तेसरै पौन्दरवी साले जेबी पुनतियुस पिलातुस यहूदा परदेशा रौ आफसर थौ, गलील इलाके दी हैरौदेस, इतुरिया और ब्रखोनीतिस इलाके दी थौ तेसरौ भाई फिलिफुस, और अविलेने इलाके दी थौ लिसानियास इयै सारै चोथै हिस्सै रै आफसर थै। ² जेबी हन्ना और कैफा एजै इलाके रै परधान याजक थै, सेजै वक्ता दी परमेश्वरा रौ वचन जांगला दी जकरय्याह रै छौहर यहून्ना कारे पौंउंचौ। ³ यहून्ना यरदन नौई रै नजदीका रै इलाकेउ दी डेइयौ परचार कौरद लागौ कि,
सारै
लोग



यहुन्ना बपतिस्मा दैणै वालौ 3.3
आपणै-आपणै पापा कु माफी पाइणा
ले बुरै कामा कु मन बौदलौ और
बपतिस्मा निंओ।

⁴ जिणौ यशायाह गुरुए भौरी साल
पैहलै थौ लिखौ औन्दौ कि,
“सुनसान जागहा दी एक आकै
मारीयौ बोलद लागौ औन्दौ,
प्रभु री बाट तैयार और सिधी
कौरौ ,

⁵ और सारी घाटी भौरीया सा
सारै उंचै इंडै धौनी झुका ई,

और जो दारखै-बांगे, उंचटै-निउठे ई सै बराबर बाँगाई।

⁶ और सारै लोग परमेश्वर री मुक्ति और भौलाई देखा ई।

⁷ जेती भी लोग री भीड़ यहन्ना काए बप्तिस्मा निंदे आशा थी। सैऊ तिउलै बोला थौ, "ओ सापा रे छोहरू ओ तुमै कुणीयै चितलाए कि तुमै परमेश्वर रे आशणै वालै रोशा कु भागौ। ⁸ आबै तुमै बुराई कु मन बदुलनै लाईक फल आणौ। तुमै आपणै जीवा दी इणौ ना सुंचौ कि आमारौ बाब अब्राहम आ। हाऊं तुमुलै बोलाऊ कि परमेश्वर इऊ पात्थरू कु भी अब्राहमा कालै सन्तान पैदी कौरी सौका आ। ⁹ आबै परमेश्वरा रे रोशा री कराइ पैडु री जौडी काए छाडी ऐन्दी जौ पेड़ आच्छौ फल नाई आणालौ तेस काटियौ आगी दी पा ई। ¹⁰ लोगुए यहन्ना कु पुछौ, "तैबै परमेश्वरा रे रोशा कु बाँचणा लै आमूए का चाई कौरनौ। ¹¹ यहन्नै तिउलै जवाब देओ, "जासकै दुई कुरतै ई तिणिए एक कुरतौ तेसकै चाई दैणौ जासकै नाई आ और जासकै रोटी ई तिणिए भी चाई बांटीऔ खाणी। ¹² तैबै मामलै निणै वालै भी बप्तिस्मा निंदे आशै, तिउंरे यहन्ना कु पुछौ कि, ओ गुरु, "आमै का कौरुलै?" ¹³ तिणिए तिऊ लै बोलौ इमान्दार बाँणौ जेती तुमुलै मामलै निणा लै आ बोलौ आँन्दौ, तेथकु जादौ मामलौ नाई निओ। ¹⁴ तैबै सिपाइउए भी तेसक पुछौ आमै का कौरु लै? यहन्नै तिऊ लै बोलौ तुमै कासी भी आदमी तंग नाई कौरैऊ, और ना कासी माथै झुठै आरोप लाएऊ, जेती तुमुलै मजदूरी मीला सा तेती दी खुश रौओ। ¹⁵ लोगुए पैहलै कु थी मसिह आशणे री आश

लाई आँन्दी, तिउंरे आपणै जिवा दी यहना रे बारे दी सुंचौ, का एऊ ता नाई सेऊ मसिह? ¹⁶ तैबै यहन्नै तिउलै बोलौ, "हाऊं ता तुमुलै पाणी कौरी बप्तिस्माँ दिआऊ। पर जो सेऊ आशणे वालौ मसिहा सा सेऊ मुकु जादौ शक्ती वालौ आ। हाऊं ता तेसरै बुटा रे तौसमै खोलनै रे लायक भी नाई, सेऊ तुमुलै परमेश्वरा री आत्मा और आगी कौरीए बप्तिस्माँ दिआ आ। ¹⁷ तेसरौ शुणौ तेसरै हाथा दी आ सेऊ आपणौ खोलौ आच्छै कौरीए साफ कौरा। तैबै गिऊं छाड़ा आपणी खौन्दीआली दी भूस जाला आगी दी जो आग केबी ना इशदी। ¹⁸ यहन्ना भौरी शिक्षा देई-देइयो लोगु के खुशी रौ सन्देश शुणावा थौ। ¹⁹ और यहन्नै हैरोदेस जुणु इस्राएल देशा रे चीथै हिस्सै रौ आफसर थौ सेऊ भी डांटौ कैलैकि हैरोदेस आपणै भाई फिलीपुसा री छेउड़ी आइलै बुरै काम किये थै।

यीशु रौ बप्तिस्माँ

(मत्ती 3:13-17; मरकुस 1:9-11)

²⁰ पर हैरोदेसै तिऊ सौभी बुरै कामा कु भी एजौ बुरौ काम कियौ कि तिणिए यहना जेला दी पाओ। ²¹ जेला दी डेउणै कु पैहलै, एकी दिनै जेबी यहना बप्तिस्मा दैन्दै थौ लागौ आँन्दौ। तेबी यीशुए भी बप्तिस्माँ निओ। बप्तिस्मा नी ई ओ, जेबी यीशु प्राथना कौरदै थौ लागौ आँन्दौ तेबी सौरग खुलौ। ²² और परमेश्वरा री आत्मा कबतरा रे रुपा दी यीशु माथै आशी, और सौरगा कु परमेश्वरा री हाक शुणुई कि, "तू मेरौ गौरतौ छोहरू ई हाऊं ताऊं कु भौरी खुश ऊ।"

यीशु रौ वंश

(मत्ती 1:1-17)

²³ जेबी यीशुए शिक्षा देणी शुरू की, तेबी यीशु रौ उमर तकरीबन तीस साल थी। जिणौ लोग जाणा थै कि युसुफ ता एली रौ छहरू थौ, ²⁴ और एली थौ मत्ताता रौ, और मत्तात थौ लेवी रौ, लेवी थौ मलकी रौ, मलकी थौ यन्ना रौ, यन्ना थौ युसुफा रौ, ²⁵ युसुफ थौ, मत्तित्याह रौ, मत्तित्याह थौ आमोसा रौ, आमोस नहुमा रौ, नहुम थौ असल्याह रौ, और सेऊ थौ नोगहा रौ, ²⁶ नोगहा थौ माता रौ, मात थौ मत्तित्याह रौ, सेऊ थौ शिमी रौ, शिमी थौ योसेखा रौ, योसेख थौ योदाहा रौ, ²⁷ योदाह थौ युहना रौ, युहना थौ रेसा रौ, रेसा थौ जरुब्बाबिला रौ, सेऊ थौ शलतिएला रौ, शालतिएल थौ नेरी रौ, ²⁸ नेरी थौ मलकी रौ, मलकी थौ अद्दी रौ, अद्दी थौ कोसामा रौ, कोसाम थौ इलमोदामा रौ, इलमोदाम थौ एरा रौ, ²⁹ और एर थौ यहोशुआ रौ, यहोशुआ थौ इलजारा रौ इलजार थौ योरीमा रौ, योरीम थौ मत्तता रौ, मत्तात थौ लेवी रौ, ³⁰ लेवी थौ शमौना रौ, शमौन थौ यहुदा रौ, यहुदा थौ युसुफा रौ, युसुफ थौ योनाना रौ, योनान थौ इलियाकीमा रौ, ³¹ इलियाकीम थौ मेलिया रौ, मेलिया थौ मिन्नाह रौ, मिन्नाह थौ मत्ताता रौ, मत्तात थौ नाताना रौ, नातान थौ दाऊदा रौ, ³² और दाऊद थौ यिशै रौ, यिशै थौ ओबेदा रौ, ओबेद थौ बोअज़ा रौ, बोअज़ थौ सलमोना रौ, सलमोन थौ नहशोना रौ, ³³ नहशोन थौ अम्मीनादाब रौ, सेऊ थौ आदमीना रौ, आदमीन थौ अरनी रौ, अरनी थौ हिस्मोना रौ, हिस्मोन थौ फिरिसा रौ, फिरिस थौ

यहुदाह रौ, ³⁴ और यहुदाह थौ याकूबा रौ, याकूब थौ इसहाका रौ, इसहाक थौ अब्राहमा रौ, अब्राहम थौ तिरहा रौ, तिरह थौ नाहोरा रौ, ³⁵ सेऊ थौ सरुगा रौ, सरुग थौ रऊ रौ, रऊ थौ फिलिगा रौ, फिलिग थौ एबीरा रौ, एबीर थौ शिलहा रौ, ³⁶ शिलह थौ केनाना रौ केनान थौ अरफक्षदा रौ, सेऊ थौ शेमा रौ, शेम थौ नूह रौ नूह थौ लिमिका रौ, ³⁷ लिमिक थौ मथुशिलह रौ, सेऊ थौ हनोका रौ, हनोक थौ यिरिदा रौ यिरिद थौ महललेला रौ महललेल थौ केनाना रौ, ³⁸ और केनान थौ यनोशा रौ, यनोश थौ शेता रौ, शेत थौ आदमा रौ, और आदम थौ परमेश्वरा रौ छोहरू।

यीशु रौ इम्ताहन

(मत्ती 4:1-11; मरकुस 1.12-13)

4 ¹ तैबे यीशु परमेश्वरा री आत्मा कौरीए भौरुइयौ यरदन नौई कारे कु वापिस डैऔं और चालिस दिना झाऊं पवित्र आत्मा रै जरिये सुनसान जगह दी आंडै लागौ, तिऐ शैतान यीशु पौरखदे लागौ। ² तिऊं चालिस दिना दी यीशुए कुछ ना खाऔं पिऔं, जैबे सै दीन पुरे हूऐ तैबे यीशु के भूख लागी। ³ तैबे शैताने यीशु तै बोलौ, “आगर तू परमेश्वरा रौ छोहरू ई ता एस पात्थरा तै बोल कि रोटी बौण।” ⁴ यीशुए शैताना तै जवाब देऔ, “पवित्र शास्त्रा दी इणौ लिखौ औन्दौ कि आदमी सिरफ रोटी ई कौरीए जीउंदौ नाई रौउंदौ, ⁵ तैबे शैताने यीशु उंची जागह दी निऔं और तिणीए यीशुकै एकी गौड़ीए दुनीया रै सारै मुलुख देखावै। ⁶ और यीशु तै बोलौ, हाऊ दुनीया रै सारै हक और महिमा ताऊं के दियाऊ, कैलैकि इयौ सारौ

मुकै आ सोंभालौ औन्दौ, हाऊं जासकै चाह ऊ तेसकै दिआऊ। ⁷ अगर तू मुकै झुकीयौ ढाल कौरालौ ता एऊ सब कुछ तैरौ हुआ सा। ⁸ यीशुए तेसलै जवाब दैऔ, “कि पवित्र शास्त्रा दी इणौ आ लिखौ औन्दौ, कि “तू आपणै परमेश्वरा काए झुकीयौ ढाल कौर और सिर्फ तेसी री भौक्ती कौर।

⁹ तैबे शैतानै यीशु यरुशलेमा दी निआँ और तिऐ परमेश्वरा रै घौरा रै छापरा माथै खौडौं कियोँ और यीशु लै बोलौ अगर तू परमेश्वरा रौ छोहरू ई ता इदरू तौलै फाल दै। ¹⁰ कैलैकि पवित्र शास्त्रा दी इणौ आ लिखौ औन्दौ तैरै बारै दी “कि परमेश्वर आपणै दूता लै हुकम दिया कि सै ताऊं बौचावा। ¹¹ सै ताऊं हाथा-हाथा दी नीयां ई ताकी तैरै बांगणे दी पात्थरा कु ठोकर ना लगा।

¹² यीशुए तेसलै जवाब दैऔ। “पवित्र शास्त्रा दी इणौ भी आ लिखौ औन्दौ कि, “तू आपणौ परमेश्वर ना पौरखै।

¹³ जैबे शैतानै यीशु री परिक्षा कौरी एरी तैबे सेऊ कुछ बौगता लै यीशु काए कु पोरु डैऔ।

यीशु री सेवकाई री शुरूआत

(मत्ती 4:12-17; मरकुस 1:14-15)

¹⁴ तैबे पवित्र आत्मा री शक्ति कौरी भौरुईयौ यीशु गलीला लै वापिस डैऔ। और यीशु रै बारै दी बुशै आस-पड़ोसा रै देशा दी फौडली गौई।

¹⁵ और यीशु यहदीऊ रै आराधना कौरने री जागहा दी शिक्षा दैदें लागौ। और सारै लोग यीशु री बौडाई कौरा थै।

नासरत गावां दी यीशु री बेईज्जती

(मत्ती 3:53-58; मरकुस 6:1-6)

¹⁶ जैबे यीशु नासरत गावां दी आशौ जिऐ सेऊ धाचौ-पालौ थौ। सेऊ रोज के जिणौ आरामा रै दिना दी धार्मिक खुम्बली दी डैऔ तियै धर्म शास्त्र पौडना लै खौडी हुआ। ¹⁷ और यीशु के पौडना लै यशायीह गुरू री किताब देई, और यीशुए सै किताब खोली और त्तिदरू पौडै लागौ जिऐ इणौ थौ लिखौ औन्दौ,

¹⁸ “प्रभु री आत्मा मुं माथै आ, कैलैकि तिणीऐ हाऊं गरीबू लै खुशखबरी शुणाउणा लै चुनौ ऊ।

और हाऊं एथीलै भेजो ऊ कि, गुलामु लै छटकारै रौ और शिडेऊ लै देखणे री खुशखौबरी शुणाऊ,

और दुखी लाचार लोगु तिऊं कु बौचाऊ जुण तिऊं माथै जुलम कौरा आ।

¹⁹ कैलैकि परमेश्वरा री तौरफा कु आमु माथै दया कौरने रौ बौगत आशी गौ आ।

²⁰ तैबे यीशुए सै किताब बन्द कौरीयौ तिदलै नुकरा के देई, और आपु बोशौ धौनो। तैबे जो लोग शणदें थै लागै औन्दे सै लोग यीशु भीले बौडै

चाहा कौरीऐ देखदें लागै। ²¹ तैबे यीशु तिऊंलै बोलदें लागौ, आज ही तुमारै सामनै एऊ लिखौ औन्दौ वचन पुरौ

हौ। ²² जो भी लोग तिऐ मौजूद थै सै सारै खुश हूऐ और यीशु रै मुआं कु दया वाली बुशै शुणीयौ हौरान हूऐ, कि एऊ सब किणौ हुई सौका? सै आपु मांडीऐ चौपडीदें लागै “का

एऊ युसुफा रौ छोहरू नाई?” ²³ यीशुए तिऊंलै बोलौ, “शायद तुमै मुं माथै इणी कहावत जरुरी बोला ई कि, “ले डाक्टरा आपणौ इलाज ता कौर

और ज़िणै ताएँ कफरनहुमा गावां दी चमतकार किये ई तिणै चमतकार इदैं आपणै गावां दी भी कौर? ²⁴ पर सौचचाई इरे आ कि केजै भी गुरु लै आपणै गावां या इलाकै दी इज़्जत मान नाई मिलदी। ²⁵ यीशुए औजौ बोलौ, हाऊ ताउंलै सच्चौ बौलाउ कि, एलियाह रै बौगता दी जेबी साडै चिया साला झाऊं शुको पौडौं और सारै देशा दी बौडौं काल पौडौं, तेबी इस्राएल देशा दी भौरी इणी विधवा छेऊडी थी।”

²⁶ पर परमेश्वरै एलियाह भविष्यवक्ता तिऊं कासी कारे ना भेजौ, पर सेऊ सैदा शहरा रै सारपत गावां दी एकी विधवा कारे भेजौ जो यहुदी नाई थी।

²⁷ या एलिशा गुरु रै बारै दी विचार कौरौ जुणीए नामान कोडी ठीक कियौ आ जो सिरीया देशा रौ थौ। जैबै कि सेजै बौकता दी इस्राएला दी भौरी कोडी थै, ज़ासकै तेबी चांगै हुणै री भौरी जुरत थी। ²⁸ धार्मिक खुम्बली दी जो लोग इऊं बूशु शुणदैं थै लागै औन्दै सै भौरी रोशुए। ²⁹ और तिऊंए खौडी उठीऔ यीशु घेरौ और शहरा क बाड़रै गाडौं, जेजौ पहाडी माथै तिऊंरौ शहर थौ बौसौ औन्दौं, और सेऊ तिणै पहाडी रै टिरा माथै निऔ ताकी तेस तिरु तौलै पा। ³⁰ पर यीशु तिऊं मांडीआ कु निकलीऔ पोरु भांगौ।

बुरी आत्मा वालौ आदमी चांगौ कौरनौ

(मरकुस 1.21-28)

³¹ तैबै यीशु गलील परदेशा रै कफरनहुम इलाकै दी डैऔ और तिणै हर आराम वालै दिना दी लोगु लै शिक्षा दिआ थौ। ³² तिदैं भी लोग यीशु री शिक्षा शुणीऔ हैरान हुए कैलैकि यीशु वचन हका कौरौए बोला

थौ। ³³ एकी दिनै यीशु धार्मिक खुम्बली दी थौ, तिणै एक इणौ आदमी थौ ज़ासदी बुरी आत्मा थी, सेऊ यीशु लै जौरै हाका मारीयौ बोलदैं लागौ। ³⁴ “ओ यीशु आमुकै ताऊं क का काम आ? का तू आमू नाश कौरदैं ई आशौ औन्दौं? हाऊं ताऊं ज़ाणाऊ कि तू कण ई, तू परमेश्वरा री तौरफा कु भेजौ औन्दौं पवित्र आदमी ई।

³⁵ यीशुए तेसलै डांटीयौ ज़वाब दैऔ, “चुटक थाक” और एस आदमी क बाड़रै निकुल” तैबै तिणै बुरी आत्मै सेऊ आदमी मांडीए धौनी बिछांडौ बिणा नुकसान कौरौयौ तेसकु बाड़रै निकली। ³⁶ तैबै सै हैरान हुए और आपु मांडीए चौपडुईयौ बोलदैं लागै, एस आदमी रै हक्मा दी का शक्ती और हक आ; “कि बुरी आत्मा भी एसरी शुणीऔ पोरु भागा ई” ³⁷ यीशु री बूशै आगी बाशीए सारै मुलखा दी फैली गोई।

पतरसा री शाशु और कई लोग चांगै कौरनै

(मत्ती 8:14-17; मरकुस 1:29-34)


³⁸ सेजै दिना दी यीशु धार्मिक खुम्बली क निकलीऔ शिमौना रै घोरै डैऔ। तिणै शिमौना री शाशु बुखारा कौरौए भौरी बिमार थी, सौभी यीशु क औरज कौरदे लागै कि इणै ठीक कौरौ।

³⁹ यीशु ए तियां कारे खौडी हुईयौ तिआरै बुखार डांटे और तिआरै बुखार ठीक हुए। सै खरकचार खौडी हुई और तिऊंरी सेवा कौरदैं लागी। ⁴⁰ दूस ओडदैं- ओडदैं तेस गावां दी ज़ासरै कारे लोगु दी कई रौंगा री बिमारी थी लागी औन्दी तिऊं सब यीशु कारे आणा थै। यीशुए सारै बिमार लोगु माथै हाथ छाडै और सारै चांगै किये।

⁴¹ भौरी लोगु दी बुरी आत्माएँ थी, सारी बुरी आत्माएँ यीशु री आज्ञा शुणियो बाईरें निकला थीं और हाकें मारीयो बोला थी कि तू परमेश्वरा रौ छोहरु ई। "कैलैकि सैं बुरी आत्माएँ ज़ाणा थी कि यीशु ही मसीहा सा।

धार्मिक खुम्बलीउ दी शिक्षा देणी (मरकुस 1:35-39)

⁴² दुजी दोअती यीशु शहरा क निकलीओ सुनसान जांगहा दी डैओँ, और सारी भीड़ यीशु लोड़दें-लोड़दें यीशु काए आशीओँ तेस रोकदें लागी कि आमु छाड़ीयो नाई डेऊ, ⁴³ पर तिणीए बोलौं मुं ओरी लोगु मांझीए भी परमेश्वरा रें राजा रौ खुशी रौ सन्देश शुणाउणौ ज़रुरी आ कैलैकि हाऊं एथीले ऊ भेजौं औन्दौं। ⁴⁴ और यीशु गलील परदेशा दी धार्मिक खुम्बलीउ दी खुशी रौ सन्देश देंदें लागौं।



पहलें
चलें

धार्मिक खुम्बली दी यीशु 4.44

औटाउणें

(मत्ती 4:18-22; मरकुस 1:16-20)

5 ¹ एकी दिनै यीशु गन्नेसरत नावां रें समुन्दरा रें डीका काए खौड़ौं थौ। तिणै यीशु रें वचना शुणदें एतरी भीड़ कौठे हुई कि यीशु माथै थी पौड़दे लागी ऐन्दी, तैबे इणौ हुओँ, ² यीशुए समुन्दरा रें डीका दी दुई किशती देखी, और झींवर थै किशती कु उतरी औ ज़ाला धोउंदें लागे औन्दै। ³ यीशु तिउं किशती मांझीया कु एकी किशती दी

चौड़ौं, जो शिमौन नावां रें आदमी री थी। तैबे यीशुए शिमौना लें बोलौं इरें किशती डीका काए कु थोड़ौं पौलडें नीऊं, तैबे यीशु किशती दी बोशीयो लोगुलै शिक्षा देंदें लागौं। ⁴ जैबे यीशु शिक्षा देइयो फारीक हुओँ तैबे शिमौना लें बोलौं इयें किशती समुन्दरा रें बिचा दी नीऊं, और माछीऊ पाकुड़ना लें आपणौ ज़ाल समुन्दरा दी पा।

⁵ शिमौनै यीशु लें बोलौं, "ओ गुरु आमुए पुरी रांचीए माच्छी पाकुड़ना लें भौरी मैहनत की आ पर कुछ ना पौड़ौं, तैबे भी हाऊं तुमारें बोलनै माथै ज़ाल पा ऊ।" ⁶ जैबे तिउंए ज़ाल पाओ तैबे तिउंरें ज़ाला दी भौरी माच्छी फौसी इदरा झाऊं कि तिउंरें ज़ाल भी चीरीन्दै लागे। ⁷ तैबे तिउंए आपणै साथीऊ लें जो दुजी कीशती दी थै, साना कौरी बोलौं ओरु आशौ आमारी मज़द कौरो, तैबे सैं तिउं काए आशै और तिउंए दुईया कीशती दी एतरी माच्छी भौरी कि तिउंरी कीशती भी डुबदें लागी। ⁸ इणै देखीयो शिमौन पतरसै यीशु रें बांगणै माथै पौड़ौं यीशु लें बोलौं, "ओ प्रभु, मुकाए कु पोरु डैओँ कैलैकि हाऊं पापी आदमी ऊ।" ⁹ कैलैकि एतरी माच्छीऊ पाकड़ीयो शिमौन और तेसरें साथीऊ के भौरी हैरानी हुई। ¹⁰ तिणी ई जबदी रें छौहरु याकुब और यहुना के भी हैरानी हुई जो शिमौना रें साथी थै। तैबे यीशुए शिमौना लें बोलौं, "नाई डोर आज्ञा कु तू आदमीऊ मुकाए आणा ई" ¹¹ तिउंए आपणी-आपणी किशती डीका काए आणी और सब कुछ छाड़ीयो यीशु पीछु डेवै।

कोढ़ी आदमी ठीक कौरणौं

(मत्ती 8:1-4; मरकुस 1:40-45)

¹² एकी इलाकै दी यीशु कै एक कोड़ी आदमी मीलों और सेऊ धौनी झुकीयो यीशु कै औरज कौरदे लागे कि, "ओ प्रभु अगर तू चाह लौ ता मु चांगौ कौरी बौला ई" ¹³ यीशुए तेस कोड़ी माथै हाथ छाड़ी और बोलौ, "हाऊं चाह ऊ कि तू चांगौ हु ऊ।" और तेबी तेसरौ कोड़ ठीक हुआ। ¹⁴ तैबे यीशुए सेऊ चितलाओ, "कि जो कुछ ताऊं आइलै हुआ आ तेस कासी आईलै ना बोलै" पर डेऊ याजका कारे देखालीऊ और परमेश्वरा रे आपणै सेवक मुसा रे जरीए जेजे नियम ई देओ औन्दै तिऊं अपनाईयो बौली चौड़ाऊ ताकी से तैरे बारै दी लोगु कारे बोला कि तू चांगौ हुई गो ई ¹⁵ पर यीशु री खौबर सारै मुलखा दी फैली गोई, भौरी लोग तेसरी शिक्षा शुणदे और आपणी बिमारी कु चांगै हुणा लै यीशु कारे कौठै हुन्दे लागे। ¹⁶ पर यीशु एखुली सुनसान जगहा दी डेईयो प्राथना कौरा थौ।

कमज़ोर हाथा बांगणै वालौ आदमी चांगौ कौरणौ

(मत्ती 9:1-8; मरकुस 2:1-12)

¹⁷ एक दिने इणौ हुआ कि यीशु एकी घौरा दी शिक्षा देंदै थौ लागौ औन्दौ तिरे फरिसी और तिऊंरे नियमा रे गुरु थै बोशै औन्दै, जो गलील और यहूदिया परदेशा रे हरेक गाऊं और यहूश्लेमा कु थै आशै औन्दै, और चांगै कौरना लै प्रभु री शक्ती यीशु आइलै थी। ¹⁸ सेजे बौगतै तिरे कुछ लोगुए एक इणौ आदमी बिस्तरै दी आणौ ज़ासकै आपणै जिस्मा रौ केजो भी अंग नाई हिलाइया थौ, यीशु कारे पउंचाऊणा लै तिऊंए भीड़ा मांझीए काफी कोशीश की ताकी यीशु तेस

बिमार आदमी ठीक कौरा। ¹⁹ पर भीड़ा रे कारण से यीशु कारे नाई पौउंची बौले तैबे से तेस घौरा रे छापरा माथै डेवे और छापरा कु कुछ जाण्टे गाडीयो चारपाई रे चारो कुणै दी लोउली बानीयो सेऊ बिमार आदमी यीशु कारे धौनी उतारौ।



बिमार आदमी धौनी यीशु कारे आणौ छापरा बाटीए 5:19

²⁰ इणै कौरी यीशुए तिऊंरे विश्वासा देखीयो तेस बिमार आदमी लै बोलौ, "ओ छोहरू तैरे पाप माफ हुई गोए ई"

²¹ तैबे शास्त्री और फरिसी आपु मांझीए गुणमुणांदे लागे, "एऊ कुण आ इणौ पा जुण परमेश्वरा री बुराई कौरा सा? पाप ता सिर्फ परमेश्वर ही माफ कौरा। ²² यीशुए तिऊंरी मौना री बुशै जाणी गोई, तैबे यीशुए तिउलै बोलौ तुमे इणौ कैलै सुचाई कि हाऊं परमेश्वरा री बैइजती कौरदेउ लागौ औन्दौ। ²³ आसान का सा? बिमार आदमी लै इणौ बोलनौ कि 'तैरे पाप माफ हुई गोए' या इणौ बोलनौ कि 'खाड़ी ऊठ आपणौ बिस्तर चुंग और आंडदे लाग?' ²⁴ तुमकै देखाणलै कि

"आदमी रे छोहरू" कै धौतरी माथै पाप माफ कौरनै रौ भी हक आ तैबे यीशुए तेस बिमार आदमी भीलै देखीयो बोलौ हाऊं ताउलै बोलाऊ, खौड़ी उठ, आपणौ बिस्तर चुंग और आपणै घौरै डेऊ। (कैलैकि) तू ठीक हुई गो ई। ²⁵ सेऊ आदमी खरकचार तिऊंकारे कु उठीयो खौडौ हुआ, और जेथ माथै सेऊ आणौ थौ तेस बिस्तर

चुंगीयों परमेश्वरा री बौड़ाई कौरी-कौरीयों तिरु आपणें घोरै डैऔ।

²⁶ इणें देखीयों सारै लोग हैरान हूए और परमेश्वरा री बौड़ाई कौरदै लागै, और डौरीयों बोलदै लागै आज् आमूए नोखी बुश देखी आ।

लेवी औटाऊणौ

(मत्ती 9:9-13; मरकुस 2:13-17)

²⁷ तेथ बासिए जैबै यीशु तेस इलाके क बाड़रै डैऔ। तेबै यीशुए लेवी नावां रौ एक मामलै निणै वालौ, आडै माथै बोशौ औन्दौ देखौ। और यीशुए तेसलै बोलौ, "मु पिछु आशा।" ²⁸ तेबै सेऊ तेबी आपणौ सब कुछ छाडीयौ यीशु पिछु आंडदै लागौ। ²⁹ तेबै तीणी लैवी ऐ यीशु आपणें घोरै निऑँ और बौडी धाम देई, तिऐ मामलै निणै वालै और भौरी लोग तिऊं आइलै रोटी खादै बोशी गोए। ³⁰ इणें देखीयों फरीसी और तिऊंरै शास्त्री यीशु और तेसरै चलेऊ लै बोलदै लागै कि, "तुमै मामलै निणै वालै और पापी लागु आइलै रोटी कैलै खा पिआ ई?" ³¹ यीशुए तिउंलै जवाब दैऔ कि डाक्टरा री जरुरत भलै-चांगै आदमी लै नाई पर बिमार आदमी लै औआ सा। ³² हाऊ धर्मी आदमी नाई पर पापी आदमी रै मन बदुलना लै ऊ आशौ औन्दौ।

ब्रौता रौ सवाल

(मत्ती 9:14-17; मरकुस 2:18-22)

³³ फरिसी और शास्त्रीयु ऐ यीशु लै बोलौ, "यहन्ना रै चलै ता नियमा कौरिए घोड़ी-घौड़ी ब्रौत छाड़ा और प्राथना कौरा ई, और तिणी ई फरिसी रै चलै भी कौरा ई, पर तैरै चलै ता सौदा खा पिया ई।" ³⁴ यीशुए

तीऊं कु पुछौ, "जेबी झाऊं लाडौ तिऊं आइलै साथी दी हुआ का तेबी बराती ब्रौत छाड़ाई?" ³⁵ पर सेजै दिन भी आशा ई जेबी लाडौ तिऊं कु अलग कौरालै सेजै बौक्ता दी सै ब्रौत कौराई। ³⁶ यीशुए तिउंलै एक औनेणौ भी देऔ, "केजौ भी आदमी नौरें जुड़कै रौ टालकौ पुराणें जुड़कै दी नाई लाइदौ। नाई ता धोइदी बौरै सेऊ नौरें जुड़कै रौ टालकौ तेस पुराणौ जुड़कौ पौरु थोसियो ज़ादडौ चीरा सा। और सेऊ टालकौ पुराणें जुड़कै आइलै मेल भी ना खान्दौ।" ³⁷ कोई भी आदमी अगुरा री सुर चाणना लै ताजै अगुरा रौ रस पुराणें चामडै री थोउली दी नाई छाड़दौ। नाई ता अगुरा रौ रस दख बोगता बासीऐ फैलीयों तेस पुराणें चामडै रौ थोउली भी पोरु चीरा, जेथ कौरीऐ अगुरा रौ रस और थोउली दुइया बरबाद हुआ ई। ³⁸ ऐथीलै लोग ताजे अगुरा रौ रस नौरै थोउलै दी भराई। ³⁹ केजौ भी आदमी पुराणौ अगुरा रौ रस पीई औ आच्छौ दाखरस नाई चाहांदौ कैलैकि सेऊं बोला, कि पुराणौ ई भौरी आच्छौ आ।

आरामा रै दीना रौ प्रभु

(मत्ती 12:1-8; मरकुस 2:23-28)

6¹ तेबै आराम वालै दीना दी यीशु आपणें चलेऊ आइलै डोखरेऊ बाटीऐ थौ लागौ औन्दौ डेऊंदै, तेसरै चलै लागै डोखरे कु गिऊंआ रै सिलै चोडीयों और हाथा दी मांडियो खान्दै।

² तेबै फरीसीऊ मांडीऐ कु कुछ लोगुए तिउंलै बोलौ, जेजौ काम आरामा रै दिनां दी नाई जान्दौ कौरनौ, सेजौ काम तुमै केले कौराई? ³ यीशुए तीऊंलै जवाब देऔ का तुमए धर्म शास्त्रा दी नाई पौडौ? जेबी राजौ दाऊद और तेसरै साथी भुखै थै,

तीज्जके खाणाले कुछ भी नाई थौं, तैबे राजे दाऊदे का कियो? ⁴ सेऊ परमेश्वरा रे घौरा दी डैओ और तिये परमेश्वरा ले चडाई औन्दी भोगा री रोटी खाई और आपणे साथीऊ ले भी देई, जो सिरफ याजक ही खा थै। ⁵ यीशुए तिऊंले इणौ भी बोलौं, "हाऊं जुण "आदमी रो छोहरु" आरामा रे दिना रौ भी प्रभु ऊ।"

शुके औन्दे हाथा वालै आदमी चांगौ कौरणौ
(मत्ती 12:9-14; मरकुस 3:1-6)

⁶ एकी औजौ आरामा रे दिना दी यीशु धर्मिक खम्बली दी डेइयौ शिक्षा देन्दे लागौं, तिये एक आदमी थौ ज़ासरो सुलटौ हाथ बिमारी कौरी शुको औन्दौ थौ। ⁷ तैबे कुछ फरीसी और शास्त्री लोग यीशु माथे आरोप लाईणा ले तेसरी ताकी दी थे रौए औन्दे, कि का यीशु एस आदमी आराम वालै दिना दी चांगौ कौरा की नाई कौरदौ? ⁸ पर यीशु तिऊंरे मौना रे विचार जाणा थौ एजी तांड्ये यीशुए तेस शुके औन्दे हाथ वालै आदमी ले बोलौं, "उठ मांझाई आशियौ खाडौ ऊ।" तेबे सेऊ आदमी उठीओ खौडौ हओ। ⁹ यीशुए लोग कु पुछौं, "आरामा रे दिना दी का नियम ठीक आ, भौलौं कौरनौं, या बुरौं कौरनौं? प्राण बचाउणौं या झांगणौं। ¹⁰ तैबे यीशुए फिदीयाले देखियौ तेस शुके औन्दे हाथा वालै आदमी ले बोलौं, "आपणौ हाथ औगाऊं करा।" तिणीए हाथ औगाऊं कियो, तैबे तेसरौ हाथ तेबी ठीक हओ। ¹¹ तैबे तिऊंरे भौरी रोश आशै और से आपु माझिरे गुणमणादे लागै कि आमै एस यीशु आइले का कौरले?

बारह चेलै सेवा कौरना ले छांटणे
(मत्ती 10:1-4; मरकुस 3:13-19)

¹² सैजे दिना दी यीशु पहाड़ी माथे प्राथना कौरदे डैओ और परमेश्वरा कु प्राथना कौरदे-कौरदे सारी राच बिताई। ¹³ जेबी दुसौ हओ तैबे यीशुए आपणे चेलै ओटाए और तिऊं माझिरे कु १२ चेलै छांटे और यीशुए तिऊंले प्रेरित बोलौं। ¹⁴ और से चेलै एजेई: शिमोन जासरो नाऊं यीशुए पतरस छाडौं, पतरसा रौ भाई अन्दियास और याकुब, यहुन्ना और फिलिपुस और बरतुल्मे। ¹⁵ मति, थोमा, और हलफई रौ छोहरु याकुब शिमोन ज़ासले जेलोतेस बोला थै। ¹⁶ और याकुबा रौ छोहरु यहुदा और यहुदा इस्करियोती जुणिये यीशु बासिरे पकड़वाओ आ।

औकल (शिक्षा) देणी और चांगे कौरणे
(मत्ती 4:23-25)

¹⁷ तैबे यीशु आपणे चलेऊ आइले पहाड़ी कु तौले उतरौ सीधी ज़गाह दी खौडौ हओ और तिये तेसरै चलेऊं री बौडी भीड़ कौठे हई, और सारे यहुदिया यरुश्लेम, सुर, सैदा इलाके रे लोग जुण-जुण समुन्द्रा रे नजदीक रौआ थे से भी तिये आशै। ¹⁸ ज़ो शिक्षा शुणदे और आपणी बीमारी कु चांगे हुणा ले यीशु काए आशा थै, और यीशु, बुरी आत्मा कौरी परेशान लोगु भी ठीक कौरा थौ। ¹⁹ सारे लोग यीशु छडणौं चाह थे कैलेकि यीशु कु चांगे कौरने री शक्ती निकला थी और सब चांगे हुआ थै

आशिष और दुःखा रे वचन

(मत्ती 5:1-12)

²⁰ तैबै तिणीए आपणें चलेऊ भीलै देखीयौ बोलौ,

"आशीश वालै ई सै लोग ज़ो निऊले ई; कैलैकि परमेश्वरा रौ राज़ तुमारौ आ।

²¹ आशीश वालै ई सै लोग, ज़ो आबै बूखे ई; कैलैकि तिउंलै रौज़ीयौ मिला सा और सै जुण आबै लेरा ई सै हसा ई।

²² आशीश वालै ई तुमै, जुण आदमी रै छोहरु रै कारण दुख उठाऊवा ई, और लोग तुमु आइलै दुशमनी छाड़ाई और तुमु पोरु गाड़ाई, तुमारी बेइज्जती कौराई, और तुमारौ नाऊं बुरौ समझियौ काटाई। ²³ सेजै दिनै तुमै खुश हुइयौ नाचणौ, कैलैकि देखौ तुमलै सौरगा दी बौड़ौ इनाम आ, तिउंरै बाप-दादैं भी, भविश्यवाणी कौरनै वालै गुरु आइलै तिणौ कौरा थै।

²⁴ यीशुए तौरें बोलौ, "आज़ जुण तुमै सेठ ई; तुमलै दुःखा रै दीन आशणै ई कैलैकि तुमारौ सुख शान्ती इयैं दुनिया दी तेबी झाऊं आ ज़ेबी झाऊं तुमारी ज़िन्दगी आ।

²⁵ आज़ जो तुमै रौजै औन्दे ई; तुमलै भोखे रौइणा रै दीन आशणै ई।

आज़ जो तुमै नीफिक्री कौरौ हौसाई; तुमारी ऐ खुशी, दुःखा दी बदलिया ई।

²⁶ आज़ जो आदमी तुमारी बौड़ाई कौराई, सै तुमलै दुःख मानावा ई, कैलैकि तिउंरै नान-बुद्ध भी झुठे गुरु आइलै इणौ कौरा थै

दुश्मणु आइलै प्यार

(मत्ती 5:38-48; 7:12a)

²⁷ हाऊं तुमु शुणने वालेऊं तै बोला ऊ कि आपणें दुश्मना आइलै प्यार कौरौ। और जुण तुमारौ बुरौ कौरा आ तेसरौ भौलौ कौरौ। ²⁸ जुण तुमु तै श्राप दिआ लौ तेसलै आशीश दैऔ, जुण कौरा लौ तुमारी बेइज्जती तेसलै कौरौ प्राथना। ²⁹ जुण तुमारे एकी खोखोटे दी थापे ला लौ तेस बिलै दुजौ गोलौण्टौ भी मुड़ाऔ और जुण तुमारी धोती छुड़ावा लौ तेसकै आपणौ कुरतौ भी दैऔ। ³⁰ जुण तुमु कु कुछ मागां लौ तेसकै दैऔ और जुण ताउकु निआं लौ तेसकु तिरे चीज़ वापिस ना मांगे। ³¹ ज़ीणौ तुमै लोगु कु चाह ई कि लोग तुमु आइलै कौरा, तुमै भी तिउं आइलै तिणौ कौरौ। ³² अगर तुमै आपु आइलै प्यार कौरनै वालेऊं आइलै प्यार कौरा ई तै का बड़ी बात आ। (कैलैकि पापी भी, आपु आइलै प्यार कौरनै वालेऊं आइलै प्यार कौरा ई। ³³ आगर तुमै तिउं आइलै भलाई कौरालै जो तुमु आइलै भलाई कौराई, तै का बड़ी बात आ, कैलैकि पापी लोग भी इणौ कौराई। ³⁴ अगर तुमै तिउंके उदार देआई जासकु वापिस मिलनै री आश छाड़ाई, तै का बौड़ी बात आ, कैलैकि पापी लोग भी पापी लोगु कै उदार दिआइ और बासिरे मांगाई तेती वापिस। ³⁵ तुमै आपणें दुश्मना आइलै प्रेम छाड़ाई और भलाई कौरौ, और बासिरे वापिस ना मांगणें री आश छाड़ाऔ उदार दैऔ, तैबै तुमु तै सौरगा दी बौड़ौ इनाम मिला सा। और तुमै परमपरधान परमेश्वरा रै छोहरु बौणा ई। कैलैकि सेऊ आदमी, तिउं लोगु तै जो धन्यवाद नाई कौरदें, और बुरै लोगु तै, भी भौलौ आ। ³⁶ ज़ीणौ तुमारौ बाब परमेश्वर

दया कौरनै वालों आ तिणी तुमै भी दयालु बौणों।

कासी दी भी झूठे आरोप नाई लाइणें
(मत्ती 7:1-5)

³⁷ कासी दी भी झूठे आरोप नाई लाओ तैबे तुमु दी भी झूठे आरोप नाई लागदें, कासी भी बुरे नाई चाणों, तैबे तुमु भी कोई गलत नाई चाणदों, माफ कौरों तैबे तुमु लै माफी मिला।

³⁸ देओ ता तुम लै भी दिआई, लोग पुरों पाथों चेंसी-चेसीयों और हिलाई-हिलाईयों और ढाली-ढालीयों तुमारी ऊगाली दी पा ई, कैलैकि जैजै पाथै कौरियै तुमै नापा लै सैजै पाथै कौरियै तुमुलै भी नापा ई। ³⁹ तैबे यीशुए तिऊलै अनेणै देइयों बोलों का एक शेड़ौ दुजै शैड़ै के बाट देखाली बौला सा? का इणै कौरि सै दुइया खाली दी ना पौड़दें? ⁴⁰ चलै केबी भी आपणै गुरु कु बौड़ौ नाई औन्दों पर जुणी चलै पुरों कौरि औलौ शिखों औन्दों, सेऊ आपणै गुरु ज़िणों औआ सा।

⁴¹ तू आपणै भाई री आखी दी सांगर कैलै देखाई का तांउके आपणी आखी रौ डिगंचौ नाई चौंगरी दौ? ⁴² जैबे तांउके आपणी आखी रौ डिगंचौ नाई दीशदौ तैबे तू आपणै भाई लै किणौ बोली सका ई कि "भाई टेक हाऊं तेरी आखी रौ सांगर गाड़ाऊ? ओ कौपटी पैहलै आपणी आखी रौ डिगंचौ गाड़, तैबे तू आपणै भाई री आखी कु तेस सांगर आच्छै कौरि गाड़ी सौका ई।

ज़ीणों पेड़ तीणों फल
(मत्ती 7:16-20; 12:33-35)

⁴³ कैलैकि कैजौ भी आच्छौ पेड़ इणौ नाई आ जेथकु निकामौ फल निकला और ना ई आ निक्कामौ पेड़ इणौ,

जेथकु आच्छै फल निकला। ⁴⁴ हर पेड़ तेसरै फला कौरि रवाइया आ; कैलैकि लोग झाड़ी मांझीआ कु फेड़ नाई चोड़दें, और ना (कुईणी) झांगड़ा कु अंगर चोड़दें। ⁴⁵ भौलौ आदमी आपणै भौलै जीवा कु भौली बूशै ला सा, और बुरौ आदमी ला सा आपणै बुरै जीवा कु बुरी बूशै; जो तुमारै जीवा दी औलौ, सेऊ निकला मुआ कौरि बाइरै।

घौरा चाणनै वालै दुई आदमी
(मत्ती 7:24-27)

⁴⁶ "जैबे तुमै मेरौ बोलौ नाई शुणदें, तैबे तुमै मुलै, "ओ प्रभु-ओ प्रभु कैलै बोलाई? ⁴⁷ जो कोई मुकाए आशा और मेरी बूशेऊ शूणा और माना, हाऊं तुमु लै बोलाऊ कि सेऊ कास ज़िणौ आ; ⁴⁸ सेऊ तेस आदमी ज़िणौ आ जुणीए घौरा चाणदी बारे ज़बीन डुंगी खोदीयौ पाकी ज़ागहा दी पौई बोशाली आ, और ज़ेबी नौ आशी बौरुईयौ और तेथारौ छालौ तेस घौरा दी लागौ पर सेऊ घौर हिलौ भी नाई कैलैकि सेऊ घौर पाकी ज़ागहा दी थौ बौणौ औन्दौ। ⁴⁹ जुण वचन शुणीयौ नाई मानदौ सेऊ तेस आदमी ज़िणौ आ जुणीए बालु माथै बिण पौई ऐ घौर चाणौ और ज़ेबी नौ आशी भौरुईयौ सेऊ घौर खरकचार सिकी गौ आ और सिकी औ तेसरौ सत्यानाष हुई गौ आ"

एकी फौज़ी रौ विश्वास
(मत्ती 8:5-13)

7¹ जैबे यीशुए लोग के सारी बुशै शुणाई गोई, तैबे यीशु कफरनहूम गांवा दी आशौ। ² तिऐ रोमी सिपाइऊ रै आफसरा रौ एक नुकर, जो तेसरौ भौरि गौरतौ नुकर थौ सेऊ नुकर एती

बीमार थो कि मौरनै वालो थो।

³ तीणी फौज़िए यीशु रे बारै दी शुणौ तैबे तिणीएे यहूदी लोगू रे कई स्याणै औरज कोरना लै यीशु काए भेजै ताकी यीशु आशियौ मैरौ नुकुर चांगौ कौरा। ⁴ से स्याणै यीशु काए आशै और बौड़ी औरज कौरियौ यीशु लै बोलदैं लागै कि, "सेऊ इणे लायक आसती आ कि तू तेस माथै दया कौरा कौरा"। ⁵ कैलैकि सेऊ फौज़ी आमारे लोगू आइलै प्यार कौरा सा और तीणीएे इ आमू कालै धार्मिक खम्बली रौ घौर चाणौ आ। ⁶ तैबे यीशु तिउं आइलै तेस फौज़ी रे घौरा लै चाल पौड़ौ पर जेबी यीशु तेसरै घौरा रे नज़दीक पौंऊचौ, तैबे तीणी फौज़िए आपणै कुछ दोस्त यीशु काए इणै समझाइयौ भेजै कि, "ओ प्रभु इदै आशणै रौ ऐती कौष्ट ना कौरौ कैलैकि हाऊं इणै लायक नाई आसतौ कि तुमे मैरे घौरा के आशा। ⁷ ऐथीलै मुयें आपुलै इणै लायक ना समझौ कि तुमु काए आशु, पर तीदरा कु वचन बोल, तैबे मैरौ नुकुर चांगौ हुआ सा।

⁸ हाऊं भी एक फौज़ी ऊ मुकै हक आ और कई सिपाही मैरे हाथा दी आ, जेबी हाऊं एकीलै बोलाऊ आशश तैबे सेऊ आशा सा, और दुजे लै बोललै डेऊ तैबे डेवा सा, अगर आपणै कांस नुकरा लै बोलु लै कि इणौ कौर, तैबे सेऊ तीणी कौरा सा। ⁹ इणै शणीयौ यीशु के हैरानी हई तैबे यीशुएे पिछाऊं फिरीयौ तिऊं लोगू लै बोलौ जो तेस पिछु थै आशदैं लागै औन्दै, "हाऊं तुमु लै बोलाऊ कि मुयें इस्राएल देशा रे लोगु दी भी इणौ विश्वास नाई देखौ।"

¹⁰ तैबे सै लोग जो फौज़ीएे यीशु काए थै भेजै औन्दै सै वापिस घौरै डै और तिऊंएे सेऊ बिमार नुकुर चांगौ हुआ औन्दौ देखौ।

विधवा छेउड़ी रे छोहरू लै ज़िन्दगी

¹¹ तेथ बासीएे यीशु आपणै चलेऊ आइलै नाइन नावां रे गावां (शहरा) दी डैओ तेस आइलै लोगु री बौड़ी भीड़ भी थी डेऊंदै लागी ऐन्दी। ¹² जैबे सै तेस गावां री खोली काए पौंऊचै, तैबे तिऊंएे देखौ की लोग एक मौड़ौ निंदै थै लागै औन्दै बाइरै। जो आपणी मां रौ एकलौतौ छोहरू थौ, और तेसरी मां विधवा थी। और साथा दी गावां रे बौरी लोग थै। ¹³ जैबे प्रभुएे सै विधवा देखी ता तेसरै तियां माथै बौड़ी दया आशी और तियां लै बोलौ, "नाई लेर।" ¹⁴ तैबे यीशुएे नज़दीक डेईयौ सै खाट छई, तैबे खाट चुंगणै वालै रुकै। तैबे यीशुएे बोलौ, "हाऊं ताऊम लै बोलाऊ ओ जवान छोहरू उठा।" ¹⁵ तैबे सेऊ मौड़ौ जीऊंदौ हौओ, उठीयौ बोशौ और बुशै लाइंदै लागौ तैबे सेऊ छोहरू, यीशुएे तेसरी आमा के सौम्भालौ। ¹⁶ इणै देखीयौ सारै लोग भौरी डौरै और परमेश्वरा री बौड़ाई कौरियौ बोलदैं लागै, "कि आमू माझीएे एक बौड़ी गरू पैदौ हई गौ आ, और आज परमेश्वर आपु आमू माझीयै पौंगडौ हौओ आ।" ¹⁷ सै बुशै यहूदीया और आस-पड़ोसा रे सारै परदेशा दी फौइली गोई।

यहुना बपतिस्मा देणै वालै रौ सवाल
(मत्ती 11:2-19)

¹⁸ यीशुएे जो कुछ कियौ थौ तेथरै बारै दी यहुना रे चलेऊएे यहुना काए बोलौ। ¹⁹ तैबे यहुनै आपणै दुई चेलै यीशु काए इणै पुछणा लै भेजै की, "का आशणै वालो मसीहा तु ई आ, या आमै कास ओरी पौखलै?" ²⁰ यहुना रे दुई चेलै यीशु काए आशीयौ बोलदैं लागै, "यहुना बपतिस्मा देणै वालै,

आमै ताऊं कारे इणौ पछणा लै भेजे ई, कि का आशणै वालो मसीहा तु ई आ? "या आमै कास ओरी पौखुलै?"

²¹ सेजे बोंगतै यीशुए भौरी बिमार और दुखी लोग चांगे किये ई, और कई आदमी बुरी आत्मा कु आज़ाद किये ई, और भौरी शेड्वे के आखी देई।

²² तैबे यीशुए यहना रे चलेऊ लै बोलौ, " जो कुछ तुमुए देखौ और शुणौ आ डेइयौ तेस यहना के बोलौ, कि शेडै देखाई, लोंगई ई आंडा, कोडी हुआई ठीक, तौणै ई शुणा, मौरै औन्दै हुआई ज़ीऊंदै, और गरीब आदमीऊ लै शुणावा खुशी रौ संदेश। ²³ और आशीश वाले ई से लोग, जुण मु माथै शक नाई कौरदै कि हाऊं मसीहा

आसती ऊ कि नाई। ²⁴ जेबी यहना रे चले यीशु कारे कु डेवै तैबे यीशु यहना रे बारै दी लोगु आइलै बोलदें लागौ, "तुमै सुनसान जागहा दी का देखदें थै डैओ औन्दै? का बागुरा कौरी हिलणै वाले शाऊंटै देखदें? ²⁵ तैबे तुमै का देखदें थै डैरे औन्दै? "चोगै-बागै भिडै औन्दै आदमी देखदें डेवै थै? नाई कैलैकि ज़ो आदमी चोगै-बागै बीडाई से ठाटा कौरी आपणै मेहला दी रौआई। ²⁶ तैबे तुमै का देखदें थै डैओ औन्दै, कास गुरु देखदें? ओ, हाऊं तुमु लै बोलाऊ सेऊ भविश्यवक्ता कु भी बौडौ आ। ²⁷ यहना ही सा सेऊ दूत जासरै बारै दी धर्मशास्त्रा दी इणौ लिखौ औन्दौ; "कि देख हाऊं आपणौ दूत ताऊंकु आगाडीए भेजाऊ, सेऊ ताऊंकु आगाडीए डेइयौ ताऊं कालै

तेरी बाट तैयार कौरा। ²⁸ तैबे यीशुए तौरे बोलौ, "हाऊं तुमुलै बोला ऊ की इबी झाऊं कोई भी इणौ आदमी पैदौ नाई हुआ ज़ो यहना कु बौडौ आ। पर परमेश्वरा रे राज़ा दी जुण छोटै कु छोटौ आ सेऊ यहना कु भी बौडौ

गुरु आ," ²⁹ तैबे सारै लोगुए और मामलै निणै वालेऊरे जुणीए यहना कु बप्तीस्मौ निऑं थौं तिऊंरे इणै शुणीयौ मानी एरौ कि परमेश्वर धर्मी आ। ³⁰ पर फरीसीऊ और कानुना रे धर्म शास्त्रीउरे परमेश्वरा रौ सुंचौ औन्दौ नाई मानौ, कैलैकि तिऊंरे यहना रे बप्तिस्मा निणा लै मना की थी। ³¹ यीशुए तौरे बोलौ, "हाऊं एजे जुगा रे लोगु रे बारै दी तुमु कारे किणौ बोलु, और एजे जुगा रे लोगु रौ अनैणौ कास आइलै देऊ।

³² कैलैकि से इणै छोहरु ज़ीणे ई, जुण बजारा दी डेइयौ खेल खेलाई और से आपणै दोस्तु कु शिकायत कौरा ई कि, "आमुए तुमु लै शादी रे गेत गाए ई पर तुमै ता नाचै नाई, और आमुए दुःखा रे गाअणै गाए पर तुमै ना लरे। ³³ बप्तीस्मा दैणै वाले यहनै सौदा ब्रौत छाडे ई। और कादी अंगुरा रौ रस नाई पिओ, और तिणीए पर तुमै बोलाई इणौ कि तेसदी आ बुरी आत्मा। ³⁴ हाऊं आदमी रौ छोहरु, खा पिआ ऊ, पर तुमै बोलाई इणौ कि हाऊं पेट और सूरो पिणै वालोऊ, मामलै निणै वालेऊ और पापी लोगु रौ गोश्टण ऊ ³⁵ पर जुण परमेश्वरा री शिक्षा मानीओ चाला ई तिऊंरी ज़ीन्दगी कु परमेश्वरा रौ जान सौच्यौ साबीत हुआ आ।

फरीसी रे घौरा के पापी छेउड़ी ले माफ़ी

³⁶ तैबे एकी फरीसी आदमीए यीशु कु औरज की, कि मरैरे घौरै आशीयौ मुं आइलै रोटी खाओ, तैबे यीशु फरीसी आदमी रे घौरा के डेइयौ तेस आइलै रोटी खान्दै बोशौ। ³⁷ तेस इलाके री एक पापीण छेउड़ी, इणै शुणीयौ कि यीशु फरीसी रे घौरा दी आ रोटी

खान्दै बोशौ औन्दौ, तिऐं छेउडीऐ यीशु काऐ एकी शंखमोरा री शीशी दी खुशबुदार तेल आपणौ, ³⁸ और यीशु री लाता काऐ आशीयौ लेरदै लागी और यीशु रै बांगणै आपणै आशु कौरीऐ भिजाऐ और आपणै बाला कौरीऐ गुशै, और यीशु रै बांगणै दी खोबु देइयौ तेस खुशबुदार तेला मांडदै लागी।

³⁹ इणै देखीयौ सेऊ फरीसी जुणीऐ यीशु थौ औटाऔ औन्दौ, आपणै मौना दी सुंचदै लागौ कि, "अगर यीशु भविष्यवक्ता हुआ थौ" तैबै एसकै पौतौ लाग़ा थौ की ज़ो छेउडी एस छईदै आ लागी ऐन्दी सै कुण और कीणी छेउडी आ, कैलैकि इयै छेउडी ता पापीण आ। ⁴⁰ यीशुऐ तेसलै बोलौ, "ओ शमौन मुऐ ताऊलै कुछ बोलनौ आ।" शमौनै बोलौ "ओ गुरु बोलौ"

⁴¹ एकी सेठा रै दुई कर्जदार थै एकी कै थौ पांज शौ दिनार ^c, दुजै कै थौ पचास दिनारा रौ कौर्ज। ⁴² जैबै तिऊ कर्जदारा कै वापिस दैणा लै कुछ ना रौ तैबै तिणी सेठै तिऊ दुईया रौ कौर्ज माफ किऔ, आबै इऊं दुई मांझीआ कु सेठा आइलै कुण छाड़ा जादौ प्यार?" ⁴³ शमौनै ज़वाब दैऔ, "मेरी सौमझीऐ सेऊ ज़ासरौ जादौ कौर्ज माफ हुआ आ" यीशुऐ तेसलै बोलौ ताऐ ठीक सुंचौ आ। ⁴⁴ तैबै तिऐं छेउडी भीलै फीरीऔ यीशुऐ शमौना लै बोलौ, "का तू इऐ छेउडी देखाई?" हाऊं तैरै घौरा कै आशौ ताऐं मैरै लाता धोइणा लै पाणी नाई दैऔ पर इऐं छेउडीऐ मेरी लातै आपणै आशु कौरीऐ धोई और बाला कौरीऐ ई गुशी। ⁴⁵ ताऐं मुंदी खोबु नाई दैऔ पर ज़ेबी कु हाऊं आशोऊ तेबी ओउलै इयै छेउडी मैरै बांगणै दी खोबु दैन्दै

लागी औन्दी। ⁴⁶ ताऐं मैरै मुंडा दी तेल नाई मांडौ पर इऐं छेउडीऐ मैरै बांगणैऊ दी खुशबुदार मैहगौं तेल मांडौ आ। ⁴⁷ एथीलै हाऊं ताऊलै बोलाऊ की इयारै पाप ज़ो भौरी थै आबै माफ हुई गौऐ कैलैकि इयाऐ भौरी प्यार कियौ आ पर ज़ासरै थोइँ पाप माफ हुऐ सेऊ थोइँ प्यार कौरा आ। ⁴⁸ यीशुऐ तिऐं छेउडी लै बोलौ, "तैरै पाप माफ हुई गौऐ।" ⁴⁹ तैबै ज़ो लोग तेस आइलै रोटी खान्दै थै बोशै औन्दै सै आपणै-आपणै मौना दी सुंचदै लागै, "इयौ कुण आ ज़ो पाप भी माफ कौरा आ?" ⁵⁰ पर यीशुऐ तिऐं छेउडी लै बोलौ, "तैरै विश्वास कौरीऐ तू बाँची गोई आ शान्ती कौरीऐ डेऊ।"

यीशु री शिक्षारै

8 ¹ तेथ बासिऐ यीशु इलाकै-इलाकै और गांवा-गांवा दी डेइयौ परचार कौरदै-कौरदै परमेश्वरा रै राज़ा रौ सन्देश शुणावा थौ, और तेसरै बारहा चेलै भी तेस आइलै थै। ² कुछ छेउंडी भी यीशु आइलै थी जुण पँहलै यीशुऐ बरी आत्मा और बिमारी कु चांगी की गोई थी। सै छेउंडी ऐजी थो, मरियम ज़ासलै मगदलीनी बौला थै जासकु यीशुऐ सात बुरी आत्माऐं गाड़ी थी।

³ और हेरौदेस राज़ै रै भन्डारी खुज़ा री बोऊटी योअन्ना और सुसन्नाह नांवा री छेउडी और भौरी और छेउडी। सै आपणै धन ज़यदाद कौरीयै तिउंरी सेवा कौरा थी।

बीजा बाँइणै वालै री कहाणी

(मत्ती 13:1-9; मरकुस 4:1-9)

⁴ जैसे बौड़ी भीड़ कौठे हुई और इलाकै-इलाकै रै लोग यीशु कए आशै, तैबे तिणीए अनैणै देइयो तितंले बोलौं:

⁵ एक बीजा बौड़णै वालौ बीजा बौइन्दै निकलौ

बौइन्दी बारै
कुछ बीज पौड़ौ
बाटा दी, सेऊ
बीज फैचुओ
और चिडु-
चित्कोरुए



चुणौ। ⁶ और बीज बौड़णै वालौ 8.5
कुछ बीज पौड़ौ

पथरियाली जबीना दी सेऊ बीज जमौ
पर बिण पाणिए शुकौ पोरु। ⁷ कुछ
बीज पौड़ौ कौडियाली झाड़ीऊ मांजियै,
सेऊ बौड़िदैं-बौड़िदैं दाबुओ पोरु झाड़ीऊ

थाल। ⁸ कुछ बीज पौड़ौ आच्छी
जबीना दी, और सेऊ जमियौ शौ गुणौ
फलौ।" इणै बोलीयो यीशुए तौंए जोरै
बोलौ, "तुमै मेरै अनैणौ रै मतलब
समझणौ चाहा ई, ता तुमै ध्याना
देइयो सुचेऊ कि तुमै का शुणा ई।"

**चेले यीशु कु कहाणी रौ मतलब पुछा
ई**

(मत्ती 13:10-17; मरकुस
4:10-12)

⁹ यीशु रै चेलेउंए यीशु कु पुछौ, "एस
अनैणै ^d रौ मतलब का सा?" ¹⁰ तैबे
यीशुए तितंले जवाब दैओ, "इबी झाऊं
लोग नाई ज्ञाणा थै कि परमेश्वर
आशियो लोगु रै जीबा दी राज कौरा
आ। तुमु कै ता एस भेता रै बारै दी
मुयै सब कुछ आ बोलौ औन्दौ, पर
जो लोग परमेश्वरा री बाटा दी ना
आशै, एऊ अनैणौ तितं लोगु लै आ।

इणै लोग देखा ताई रौंगै, पर सुंचदैं
नाई, और शुणा ताई रौंगै पर समझदैं
नाई।

बीजा बौड़णै वालै री कहाणी रौ

मतलब

(मत्ती 13:18-23; मरकुस
4:13-20)

¹¹ कहाणी रौ मतलब इणौ आ, "कि
बीज परमेश्वरा रौ वचन आ। ¹² जो
बीज बाटा दी पौड़ौ तेथरौ मतलब
आ कि कुछ लोग परमेश्वरा रौ वचन
ताई शुणा पर आपणै जीवा दी ना
छाड़दैं, तैबे शैतान तितंरै जीवा कु
खरकचार आशीओ परमेश्वरा रौ वचन
चोरा, ताकी लोग विश्वास कौरौओ
मुक्ति ना पा। ¹³ जो बीज पथरियाली
जबीना दि पौड़ौ तेथरौ मतलब आ
इणौ, कि लोग खरकचार खुशी कौरियै
वचन माना ई पर जैबे विश्वासा
रै कारण केजौ भी कष्ट या सताव
आशा, तैबे सै फेटी फशटा ई कैलैकि
सै परमेश्वरा रौ वचन आपणै जीवा
दी नाई बसालदैं। ¹⁴ और जो बीज
झाड़िऊ मांजिए पौड़ौ थौ सेऊ खोड़ी
ना उखरांदौ। तेथरौ मतलब इणौ आ।
कि कुछ लोग परमेश्वरा रौ वचन
शुणा ई। बासियै दुनिया री चिन्ता
दी, रूपाए-पैसै, जीन्दगी रै सुखा दी
फसियो परमेश्वरा रै विश्वासा दी नाई
बौददैं। ¹⁵ जो बीज आछी जबीना दी
पौड़ौ थौ, सौ भौरी फौला। तेथरौ
मतलब इणौ आ कि कुछ लोग
परमेश्वरा रौ वचन आच्छै कौरियै
शुणाई और तेस वचना माथै चाला ई
और विश्वासा दी बौड़ाई इणै आदमी
तेस बीजा बाशिए ई जो बीज शौ पाथै
फौला आ।

लम्पा रौ अनैणौ
(मरकुस 4:21-25)

¹⁶ कोई भी आदमी लम्प जालियौ ओखरा थाल नाई छाड़दौ और न पंलग्ग थाल छाड़दौ, पर तेस घौरा दी ऊंची ज़ागहा दी छाड़ई ताकि भीतरै आशणै वालै लोगु लै प्याशौ लाग़ा। ¹⁷ कैलैकि कोई भी चीज़ मेरी नज़री कु छिपी औन्दी ना आसती, जो परगट ना करियाली, और ना ही कुछ छुपौदौ आसदौ, जो ऊज़ाले दी ना आणियालौ। ¹⁸ एथिलै होशियार रोएऊ कि तुमे किणौ शुणाई? कैलै की ज़ासकै आसा तैसलै औज़ौ मीला, और ज़ासकै कुछा नाई तैसकु सेऊं भी पोरु नीआई आ ज़ास सेऊं आपणौ सौमझ़ा।

यीशु री मां और भाई
(मत्ती 12:46-50; मरकुस 3:31-35)

¹⁹ यीशु री मां और भाई यीशु काए आशै, पर भिड़ हुणा रै कारण सै यीशु काए नाई डेई बोलै। ²⁰ तेस आइलै कृणि एकियै बोलौ, “तेरी मां और तेरौ भाई बाइरै खौड़ौ ई, सै ताऊं कु मिलनौ चाहा ई।” ²¹ यीशुए तिऊं लै ज़वाब देयौ, “मेरी मां और भाई इए सब लोग ई जो परमेश्वरा रौ संदेश शुणाई और तेथ माथी चालाई।

यीशु हका देइयौ बागुर और पाणी रै छालै घटावा
(मत्ती 8:23-27; मरकुस 4:35-41)

²² तैबै एकी दिनै यीशु और तेसरै चलै किशती दी चौड़ै और यीशुए तिऊंलै बोलौ, “चालौ हामै झिला पारभिलै डेई।” तैबै तिउंए किशती खुंटीकु खोली गोई। ²³ और किशती चालदै लागी,

पर यीशु गौ सुती, और तेबी झीला दी तेज बागुर लागी, इदरा झाऊं कि किशती दी पाणी बौरिदै लागौ सै सारै मुसिबता दी थै। ²⁴ तैबै तिऊं चलेउए नज़दीक डेइयौ यीशु उज़ीआओ और बोलौ “गुरु-गुरु” हामै नाश ई हौन्दै लागौ औन्दै।” तैबै यीशु उठौ और तेज बागुर और पाणी रौ छालौ डांटौ, तैबै सै पाणी रै छालै और तेज बागुर शान्त हुई और शाई पौड़ी गोई। ²⁵ तैबै यीशुए तिऊं चलेऊ लै बोलौ, “तुमारौ विश्वास कियै थौ?” तैबै सै डौरौ गौरै हैरान हइयौ आपु माझीए चौपडिदै लागै, “इयौ कृण औलौ इणौ पा कि पाणी और बागुरा लै हुकम देआ ऐ एसरी बुश मानाई?”

यीशु एक आदमी चांगौ कौरा आ ज़ासदी भौरी बुरी अत्माएँ थी
(मत्ती 8:28-34; मरकुस 5:1-20)

²⁶ तैबै सै गिरासेनिऊ रै इलाकै दी पौउंचे जो झिला पारभिलै गलील इलाकै रै सामनै आ। ²⁷ जीणी यीशु झीला रै डिका काए किशती कु उतरौ तिणी सेजै इलाकै रौ एक आदमी यीशु कु मिलौ, ज़ासदी बुरी आत्माए थी, सेऊं आदमी भौरी दिना ओलै ना ता ज़ुड़कै भीड़ा थौ और ना ता घौरा कै रौआ थौ पर तिऐ रौआ थौ जीए मौरै औन्दै लोगु दाबा ई। ²⁸ सेऊं आदमी यीशु देखीओ राइँ मारदै लागौ और यीशु काए धौनी पौड़ीयौ हाकै मारियौ बालदै लागौ, “ओ परमपरधान परमेश्वरा रै छोहरु यीशु तू मुकु का चाहा ई?” हाऊं ताऊंकु औरज कौराऊं कि तू मलै दुख नाई दै।” ²⁹ कैलैकि यीशुए तिऊं बुरी आत्माएँ लै तेस आदमी कु बाइरै निकलनै रौ हुकम देई गौ थौ। और सै बुरी आत्माएँ तेस आदमी दी घौड़ी-घौड़ीए आशा थी

लोग तेस आदमी शांगली और रशेउ दी बाना थै तीउ भी सेउ पोरु चोडा थौ और सै बुरी आत्माए तेस सुनसान जागहा दी निया थी।³⁰ यीशुए तिऐं बुरी आत्मा कु पुछौ कि तेरो का नाऊ?" बुरी आत्मै बोलौ मेरो नाऊ आ "सेना।" कैलैकि तेसदी भौरी बुरी आत्मा थी लागी ऐन्दी।³¹ तिउं बुरी आत्मै यीशु कु औरज की, कि आमु नौरका री खाली दी ना पाओ।³² तिऐ पाहाडा माथै सुंगरु रौ गोल थौ चौरदे लागौ औन्दी तिऐं बुरी आत्मै यीशु कु औरज की कि आमु इऊ सुंगरु दी भेज तैबे यीशुए तिउंलै हुकम दैओ।³³ तैबे सै बुरी आत्माए तेस आदमी क निकली औ तिउं सुंगरु भिले डेई। तैबे सुंगरु रौ गोल मातोले दुडियौ झिला दी पौडे और डुबियौ मौरै।³⁴ तिउं सुंगरु चारणै वालै इणै देखीओ तिरु पोरु भागै और इलाकै, गांवा दी डेइयौ लोगु कै इऐ खबर शुणाई।³⁵ जो तिऐ हओ थौ तेस देखणालै लोग आशै और यीशु काऐ आशीओ, जास आदमी क बुरी आत्माए निकली थी सेउ आदमी तिउंऐ तीशु रै बांगणै काऐ झुडकै भीडीओ और शान्त बोशौ औन्दी देखौ, इणे देखीयौ सै लोग डौरी गौऐ।³⁶ और जुणीऐ भी सेउ आदमी ठीक हुन्दै देखौ थौ तिउंऐ तिउं ओरी लोगु कै बोलौ की सेउ बुरी आत्मा कु बिमार आदमी किणै कौरैऐ ठीक हओ आ।³⁷ तैबे गिरासेनिउ इलाकै रै नजदिका रै सारै लोगुऐ यीशु कु औरज की छौंअटी आमरै इलाकै क पोरु डेऊ। कैलैकि सै भौरी डौरी गौऐ थै तैबे यीशु किशती दी चोडीओ तिरु डेउंदै लागौ।³⁸ जास आदमी कु बुरी आत्माए निकली थी सेउ यीशु कु औरज कौरदै लागौ कि मूं आपू आइलै दैओ रौइणै पर यीशु सेउ वापिस भेजौ

और तेसलै बोलौ,³⁹ कि आपणै घौरै डेऊ और लोगु काऐ बोल कि परमेश्वरै ताऊं माथै दया कौरौओ किणै बौडै-बौडै काम किए ई, सेउ आदमी तिरु डेइयौ सारै इलाकै दी बोलदै लागौ कि यीशुए मु आइलै किणै बौडै-बौडै काम किए ई।

**यीशु एक मौरि औंदी माई जीउंदी
और एक बिमार छेउडी चांगी कौरा
आ**

(मत्ती 9:18-26; मरकुस 5:21-43)

⁴⁰ जैबे यीशु वापिस आशौ तैबे लोग खुशी कौरैयै यीशु कु मिलै कैलैकि सै लोग यीशु पौखदै थै लागै औन्दी।

⁴¹ तैबे धार्मिक खुम्बली रौ एक मुख्यौ यीशु काऐ आशौ तेसरो नाऊ याईर थौ, सेउ यीशु री लातेऊ माथै पौडीयौ यीशु कु औरज कौरदै लागौ कि छौंअटी मेरै घौरै चालौ।⁴² कैलैकि तेसरी एका माई थी बारहा बौरशा री, सै माई मौरनै वाली थी, जैबे यीशु डेऊंदै लागौ तैबे लोगु री बौडी भीड यीशु आइलै थी डेऊंदै लागी ऐन्दी।⁴³ तैबे एक छेउडी जासदी बारहा बौरशा ओऊलै लोऊ बौइणै री बिमारी थी, तिआएँ आपणै इलाजा कौरना लै आपणी सारी कौमाई खौर्च की गोई थी, पर तैबे भी तिआलै किए भी चंगाई नाई मिलौ।⁴⁴ सै छेउडी भीडा माजीऐ कु यीशु पिछ आशी और तिआएँ यीशु रै चोले रौ धुरौ छुओँ और तेबी तिआरौ लोऊ बौइणौ बन्द हओ।⁴⁵ तैबे यीशुए बोलौ, "हाऊ कुणीऐ छुओऊ?" जैबे सारै लोग मुकुरदै लागौ तैबे पतरस और तेसरे साथीऊऐ यीशु लै बोलौ,

"गुरु जी" तुम माथै एतरो भीड आ पौडदै लागी ऐन्दी। तैबे आमै किणै कौरौ बोली बोली, कि तुमै कुणीऐ

छएँ ई ⁴⁶ पर यीशु ऐ बोलौ, "कुणीऐ हाऊं छुआँ ऊ कैलैकि मुकै चाँगरुआँ आ, कि मुकु शक्ती निकली आ।"

⁴⁷ जैबै तिएँ छेऊड़ीऐ देखौ कि यीशु के पौतौ लागी गौ आ तैबै सै कांबी-कांबीआँ यीशु काऐ आशी और यीशु री लातेऊ माथै पौड़ीयौ सारेऊ लोगु काऐ बोलदै लागी कि मुयै केजै कारण यीशु छुँआँ आ और आबै हाऊं एक

दम किणी चांगी हई गो ई। ⁴⁸ यीशुऐ तिआँलै बोलौ, "धौआ, तैरै विश्वास कौरीऐ तू ठीक हई ई शान्ती कौरीयै डेऊ।"

⁴⁹ जैबै यीशु बुशै लाईदै थौ लागौ औन्दौ तेबी याईरा रै घौरा क कुछ लोग आशीयौ याईरा लै बोलदै लागै, "कि तेरी माई मौरी गोई आ

आबै गुरु लै कौष्ट नाई दै।" ⁵⁰ यीशु ऐ इणै शुणीयौ याईरा लै बोलौ, "डौरै नाई सिरफ विश्वास छाड़ तैबै तेरी माई पोरु बौचा आ।"

⁵¹ याईरा रै घौरा के पौंऊंचीयौ यीशु ऐ पतरस, यहुना, याकब और तिएँ माई रै मा-बाबा छाड़ीयौ कोई भी भीतरै तिएँ माई काऐ नाई दै आशणै।

⁵² तियै सारै लोग छाती पिटीयौ लेरदै थै लागै औन्दै तिएँ माई लै" पर यीशुऐ तिऊँलै बोलौ लेरौ नाई कैलैकि इयै माई मौरी

नाई भी नाई सूती ऐन्दी आ। ⁵³ लोग इणै ज़ाणीयौ कि माई मौरी गोई आ

यीशु रौ मज़ाक उड़ाऊँदै लागै। ⁵⁴ तैबै यीशुऐ तिएँ माई रौ हाथ पाकड़ौ और तियाँ लै हाका देइयौ बोलौ, "ओ

माई उठ" ⁵⁵ तैबै सै माई जीऊँदी हई गोई, और सै खरकचार उठीयौ बोशौ। तैबै यीशुऐ तिएँ माई रै मां-बाबा लै बोलौ कि इएँ माई लै कुछ खाणा लै

दैऔ। ⁵⁶ माई रै मां-बाब हैरान हए पर यीशुऐ तिऊँके चितलाओ कि जौ इदै हुँआँ आ कासी के ना बोलेऊ।

बारह चुनै औन्दै चेलै भेजै

(मत्ती 10:5-15; मरकुस 6:7-13)

9¹ एकी दिनै यीशुऐ आपणै चुनै औन्दै बाहरा चेलै आपु काऐ औटाऐ, तिऊँके बुरी आत्माऐ गाड़ने और बिमारीऊ चांगी कौरनै री शक्ती और हक दैऔ। ² तैबै यीशुऐ सै, परमेश्वरा रै राज़ा रौ परचार कौरना लै, और बिमार लोगु चांगै कौरना लै भेजै।

³ यीशु चाहा थौ कि चेलै आपणी जुरताँ रै बारै दी चिन्ता ना कौरा। एजै कारण चलेऊ लै यीशुऐ बोलौ, "बाटा लै आपुकै कुछ ना निएऊ, ना डिंगौ, ना बैग, ना रोटी और ना पैसै, ना दुई-दुई कुरतै। ⁴ जेजे घौरा दी तुमँ डिआँ लै सेजेँ घौरा दी रौईणौ, जैबी

झाऊं तुमँ सेजेँ गांवा दी ई। ⁵ जो लोग तुमु नाई माना लै तैबै तिराक निकलियो आपणी चैपली री धूड भौ

पोरु झाड़ै ऊ। इणै देखियौ सै समझा ई कि परमेश्वर तिउँलै जुरुर सज़ा दिया आ।" कैलैकि तिउँऐ परमेश्वरा

री शिक्षा नाई शुणी। ⁶ तेथ बासिए सै बारह चेलै अलग-अलग गांवा दी डेइयौ खुशी रौ सन्देश शणावा थै और हर जगह दी लोगु चांगै कौरदै लागै।

हैरोदेसा री परेशानी

(मत्ती 14:1-12; मरकुस 6:14-29)

⁷ इणै शुणीयौ हैरोदेस जो सेजेँ देशा रै चोथै हिसै रौ आफसर थौ, घोबराई गौ कैलैकि कुछ लोग बोला थै कि

यहुना जीउंदौ हई गौ आ। ⁸ और कुछ लोग बोला थै इणौ कि एलियाह भविष्यवक्ता परगट हई गौ आ, और कुछ बोला थै कि पुराणै जमानै रै भविष्यवक्ता माझीया कु कुण जीउंदौ

हई गौ आ। ⁹ पर हैरोदेसै बोलौ, कि यहुना रौ ता मुइयै मूंड कौटाओ आ,

आबै इयौ कुण आ जासरे बारे दी हाऊं इणी बुशै शुणाऊ?" तैबै हैरोदेस यीशु देखणौ चाह थौ।

पांज हज़ार लोगु लै रोटी खिलाउणी

(मत्ती 14:13-21; मरकुस 6:30-44; युहन्ना 6:1-14)

¹⁰ तैबै भेजै औन्दै चलेऊ ए वापिस अशीयौ जो कुछ तिऊंरे कियौ थौ यीशु काए बालौ, और यीशु ए सै अलग कौरीयौ बैतसैदा इलाकै दी निरे। ¹¹ इणै देखीयौ भीड़ यीशु पिछ चाल पौड़ी और यीशु खशी कौरी तिऊं लोगु क मिलौ और तिऊं आइलै परमेश्वरा रै राजा री बुशै लाइदैं लागौ, तैबै जुण ठीक हुणौ चाह थै यीशुए सै चांगे किये। ¹² जैबै ब्याल हुई गोड़ तैबै सै बारह रै बारह यीशु काए आशीऔ बोलौ कि "इरे जागाह सुनसान आ तुमै इऊं लोगु नीजुका रै बस्ती और गांवा दी छाड़ी ताकी इरे लोग आपुकालै रौइणै रौ और खाणै रौ इन्तजाम कौरा। ¹³ यीशुए चलेऊ लै बोलौ "तुमै दैऔ इऊं लै खाणा लै तिऊंरे बालौ आमुकै पांज रोटी और दुई माछी छाड़ीऔ कछा ना आसतौ पर अगर आमै इऊं सौभी लोगु लै नाज खरीदिऔ आणलै तैबै हुई सौका, भीड़ा रै लोगु मांझिए कम से कम पांज हज़ार ता मर्द थै। ¹⁴ तैबै यीशुए आपणै चलेउलै बोलौ, "इऊं लोगु धौनी बोशलौ पचास पचास री पांगती दी।" ¹⁵ चलेऊरे तिणी कियौ और सारै लोग बोशाली गौरे। ¹⁶ तैबै यीशुए सै पांज रोटी और दुई माछी आपणै हाथा दी की और सौरगा बिलै देखीऔ परमेश्वरा रौ धन्यवाद देइयौ आशीष मांगी और रोटी चलेऊ क देई और चले लागै लोगु क बांटदैं। ¹⁷ तैबै सारै लोगुए पेटा भौरीऔ रोटी खाई।

तेती माथै भी चलेऊरे बाँचै औन्दै रोटी और माछी रै बारह छाबडै बाँरे।

पतरस यीशु मसीह माना सा

¹⁸ एकी दिनै यीशु भीड़ा रै लोगु छाड़ीयौ एखलै दी प्राथना कौरदैं डैऔ, और यीशु रै चले भी थै यीशु आइलै तैबै यीशुए चलेऊ कु पुछौ, "लोगु मैरै बारे दी का बोलाई कि हाऊं कुण ऊ?" ¹⁹ तिऊंरे जवाब दैऔ, "कुछ बोलाई इणो कि यहना बप्तिस्मा दैणै वालौ जीऊंदौ हुई गौ आ, और कुछ बोलाई एलिय्याह भविष्यवक्ता, और कुछ बोलाई इणो कि पुराणै जमानै रै भविष्यवक्ता माझीए क एक भविष्यवक्ता जीऊंदौ हुई गौ आ।" ²⁰ यीशुए तिऊंकु पुछौ, "तुमै का सौमझा ई मूं (मैरै बारे दी)?" पतरसै जवाब दैऔ, "तुमै परमेश्वरा री तौरफा कु भेजै औन्दै मसीहा ई।" ²¹ तैबै यीशुए तिऊंकै चितलाऔ कि, एथरै बारे दी कासी आइलै ना बोलेऊ।

यीशु आपणी मौता रै बारे दी बोला

(मत्ती 16:21-23; मरकुस 8:31-33)

²² और यीशुए तौरै बोलौ, "कैलैकि, आदमी रै छोहरूरे भौरी दुख उठाउणै ई; यहदी स्याणै लोग, बाँडै याजक, और शास्त्री मूं नाई मानदैं, मेरी इज्जत नाई कौरदैं। और मूं पोरु झांगाई पर हाऊं चिजे दिनै जीऊंदौ हुआऊ।

यीशु पिछ आण्डणै रौ मतलब

(मत्ती 16:24-28; मरकुस 8:34-9:1)

²³ तैबै यीशुए सारै लोगु लै बोलौ, "अगर कुण मूं पिछ हाण्डणौ चाहा, (मैरौ चलेौ बाँणनौ चाहा लौ) सेऊ

आपणी इच्छा पोरु छाड़ा लौ" और आपणौ क्रूस चुंगीयौ हर रोज मूं पिछ्छ हाण्डा लौ।²⁴ कैलैकि जो कोई आपणौ प्राण दैणै नाई चाह लौ तेसलै परमेश्वरा आइलै सदा री जीन्दगी नाई मिलदी, पर जो मुकालै तयार औलौ तेसलै परमेश्वरा आइलै सदा री जीन्दगी मिला आ।²⁵ लोग पूरै संसार पाई बला ई, पर एथरौ का फाड़दौ आ आपणौ प्राण खोआ लै पोरु? ²⁶ जो मेरी ताई और मेरी शिक्षा री ताई शर्मिया लौ, ता जेबी हाऊं आदमी रौ छोहरू आपणी, बाबा री और, पवित्र दूतु री शाना देखाईऔ आशु लै, तेबै हाऊं भी शर्मिया ऊ।²⁷ पर, "हाऊं तुम लै सच्चौ बोलाऊ कि इदै इऊं खोई लोगू मांजियै क कुछ आदमी जरूर आपणी जिन्दगी दी देखा लै कि परमेश्वर शक्ति भौलौ राज कौरना लै आशौ आ।

यीशु चमकौंदो दिशौ

(मत्ती 17:1-8; मरकुस 9:2-8)

²⁸ इऊं बुशेऊ कु आठा दिना बसीयै यीशुए पतरस, यहना और याकूब आपु आइलै निअंऔ प्राथना कौरना लै एकी धारा माथै डैऔ।²⁹ जैबै यीशु प्राथना कौरदै लागौ, तैबै प्राथना कौरदै-कौरदै यीशु रै मुआं रौ रूप बौदलुई गौ, और यीशु रै जुड़कै उजलै हुईयौ चमकदै लागै।³⁰ और तिआ ताकै तियै यहदी लोगु रै पुराणै जमानै रै दुई स्याणै भी परगट हुरे जासरै नाऊ मुसा और एलिय्याह थै, सै दुई थै लागै औन्दै यीशु आइलै बुशै लाईदै।³¹ सै शाना कौरियै दिशै, और यीशु रै मौरनै री बुशै लाईदै थै लागै औन्दै जो यरुशलेमा दी हुणै वालौ थौ यीशु आइलै।³² पर पतरस और तेसरै

साथी थै गहरी निजा दी सुतै औन्दै, जैबै सै चेलै आच्छै कौरियै थौरकै तैबै तिऊंए यीशु री शान और सै दुई आदमी देखै जुण यीशु आइलै खोई थै।³³ जैबै सै दुई भविष्यवक्ता यीशु कारे क डेऊंदे लागै, तैबै पतरसै यीशु लै बोलौ, "ओ गुरुजी, आमारौ इदै रौउणौ भौलौ आ, आबै आमै इदै चिन बेदी चाणी, एक ताऊं कालै, एक मुसा कालै और एक एलिय्याह कालै।" सेऊ नाई ज्ञाणा थौ कि हाऊं का बोलदै ऊ लागौ औन्दौ,³⁴ जेबी सेऊ बोलदै थौ लागौ औन्दौ, तेबी ई सौरगा दी बादल कौठै हुरे और सै बादला दी घेरुई गोरै तैबै सै चेलै डौरी गोरै।³⁵ तैबै बादला माजियै कु एक हाक शुणुई कि, "एऊ मेरौ प्यारा छोहरू आ, और मेरौ चुनौ औन्दौ आ एसरी शुणौ।³⁶ जिणी तिऊं चलेऊ कै इयै आवाज शुणुई तेत बासीए तिऊंए यीशु एखुली देखौ, तैबै सै चेलै चुटुकचार थाकै और जो कुछ तिऊंए तिणै देखौ थौ सै बूश तिऊंए सेजे दिना दी कासी आइलै ना लाई।

यीशु एक माऊं ठीक कौरा ज़ासदी बुरी आत्मा थी

(मत्ती 17:14-18; मरकुस 9:14-27)

³⁷ दुजे दिनै जैबै यीशु और तेसरै चेलै पहाड़ी माथा कु तौलै आशै तैबै भौरी लोगु री भीड़ यीशु कु मिली।³⁸ तियै भीड़ा मांजियै क एक आदमी राई मारीयौ थौ बोलदै लागौ औन्दौ कि, "ओ गुरु हाऊं ताऊं कु औरज कौराऊ कि मेरै छोहरू माथै दया कर कैलैकि सेऊ मेरौ एकलौतौ छोहरू आ।³⁹ एक बुरी आत्मा तेस छोहरू पाकड़ा सा और सेऊ छोहरू किचराली मारा आ, सै बुरी आत्मा तेस इणौ मेका सा

कि तेसरै मुआं दी शेफे पा आशा ई बासिऐ तेस मेकीयौं और फेंचीयौं बौड़ी मुश्कला कौरीयै पोरु छाड़ा सा।

⁴⁰ मुयै तैरै चलेऊ कु औरज की थी कि इयै बुरी आत्मा पोरु गाड़ौं, पर सै नाई गाड़ी बोलै। ⁴¹ तैबै यीशुऐ बोलौं, "का कौरुलै, तुमकै मूं माथै इबी झाऊं विश्वास नाई आसतौ? तुमारौ जीऊ ता भौरी काठौं आ, हाऊं केबी ज़ाऊं रौआऊ तुमु आइलै और केबी ज़ाऊं सहन करीऊ? आपणौं छोहरू इदैं आण। ⁴² जेबी सेऊ आदमी आपणै छोहरू आणीयौं आशदैं लागौं, तेबी ई बुरी आत्मै सेऊ छोहरू धौनी लोटाळौं और मेकौं पर यीशुऐ सै बुरी आत्मा डांटी और छोहरू तेबी चांगौं कौरीयौं तेसरै बाबा कै सौंभालौं।



यीशुऐ बिमार माऊं चांगौं कियौं
9.42

⁴³ तैबै सारै लोग परमेश्वरा रै एजै बौड़ै शक्ति वालै कामा देखीयौं हैरान हए, जैबै सारै लोग यीशु रै कामा देखीयौं हैरान थै, तैबै यीशुऐ आपणै चलेऊ लै बोलौं,

**यीशु आपणै मौरनै रै बारै दी दुजी
बारै बोला आ**
(मत्ती 17:22-23; मरकुस
9:30-32)

⁴⁴ तमै इऊं बुशेऊ दी कौन्थु लाओं कैलैकि आदमी रौं छोहरू लोगु रै हाथा दी पौकड़ाइणै वालौं आ। ⁴⁵ पर चेलै एजी बूश नाई सौमझा थै, और इयै बुशै तिऊकु चोरुई औन्दी थी ताकी सै

ना सौमझा, और चेलै इऊं बुशु रै बारै दी यीशु कु पुछणा लै डौरा थै।

सारेऊ कु बौड़ौं कुण आ
(मत्ती 18:1-5; मरकुस 9:33-37)

⁴⁶ तैबै यीशु मसीह रै चेलै आपु मांझीऐ बोलैदैं लागै कि आमु मांझीयै बौड़ौं कुण आ? ⁴⁷ यीशुऐ तिऊंरै मौना रै विचार सौमझी गोरै, यीशुऐ एक छोहरू आणीयौं आपु कारै खौड़ौं कियौं। ⁴⁸ और चलेऊ लै बोलौं, "जो एस जीणो छोहरू मैरै नावां कौरी अपणावा ई सै मूं अपणावा ई, और जुण कुण मूं आपणावा ई सै मैरौं बाब जुणीयै हाऊं भेजोऊ तेस आपणावा ई; कैलैकि तुमु मांझीऐ जुण सारेऊ कु छोटी बौणा लौं सेऊ बौड़ौं हुआ सा।

**जुण आमारे विरोधा दी नाई आसतौ
सेऊ आमारे हका दी आ**
(मरकुस 9:38-40)

⁴⁹ तैबै यहना नावां रै चेलैऐ यीशु लै बोलौं, "ओ गुरुजी, आमुऐ एक आदमी देखौं आ जुण तुमारै नावां कौरीयै बुरी आत्मा गाइदैं थौं लागौं औन्दी। आमुऐ कौरी तेसलै मना। कैलैकि सेऊ तुमारै चुनै औन्दै चलेऊ मांझीऐ कु नाई थौं। ⁵⁰ यीशुऐ तेसलै बोलौं, "तेस आदमी लै मना नाई कौरी कैलैकि जुण आमारे विरोधा ई नाई आसतौ सेऊ आमारे हका दी आ।

सामरी लोग यीशु रौं विरोध कौरा ई

⁵¹ जैबै यीशु रै सौरगा लै डेऊणै रै दीन नजदीक आशदैं लागै, तैबै यीशुऐ यरुशलैमा लै डेऊणै रौं विचार पाकौं की गौं आ। ⁵² डेऊणे कु पैहलै यीशुऐ सामरी इलाकै दी जो गाऊं थै तिऊं गावां दी आपणै दूत भेजै कि सै यीशु कालै ज़ागहा तयार कौरा।

⁵³ पर तिऊं गावां रै लोगुए सै वापिस भेजै। कैलैकि यीशु यरुशलेमा लै थौ डेउंदै लागौ औन्दौ। ⁵⁴ जैबै तेसरे चले याकुबै और यहने इणौ शणौ, तैबै तिऊंए यीशु लै बोलौ, "ओ प्रभु" आमलै आज्ञा दे कि आमै सौरगा कु आग बरसाइयौ इऊं लोगु पोरु जालौ। ⁵⁵ पर यीशु तिऊं भिलै मुडै और सै डांटे और बोलौ, "तुमै नाई जाणदैं कि तुमै किणी आत्मा रै सा। कैलैकि आदमी रौ छोहरु लोगु रै प्राण नाश कौरदैं नाई बल्की बचाउणा लै आ आशौ औन्दौ। ⁵⁶ तैबै सै तिदरु दुजै गावां बाटीए निकली गौए।

यीशु रौ चेलौ बणनै री किम्मत (मत्ती 8:19-22)

⁵⁷ जैबै सै बाटा दी डेउंदै थै लागै औन्दै, तैबै कणीए यीशुलै बोलौ, "तुमै चाऊ जीए भौ डेवा लै हाऊं तुमु पिछु आशाऊ। ⁵⁸ पर यीशुए तेसलै जवाब दैऔ, "शालटा, रै ता रौइणा लै डेरै हआई और चिड़-चिटकेरु रै रौइणा लै कौलै हआई, पर आदमी रै छोहरु कै मुंडौ छाड़ने री भी जागहा नाई आ। ⁵⁹ यीशुए दुजै आदमी लै बोलौ, "आशश मैरौ चेलौ बण, सेऊ आदमी राजी हुआ, पर सेऊ बोलदैं लागौ, "प्रभु मू पैहलै डेरुणै दै कि आपणौ बाब कौबरी दी दाबु।" ⁶⁰ यीशुए तेसलै बोलौ, "जुण आत्मा कु मौरै औन्दै ई तिऊं आपणै मुदैं दाबणै दैऔ। तैरौ काम एजौ कि तू परमेश्वरा रै राजा रौ खुशी रौ संदेश शुणाऊ। ⁶¹ एकी आदमी ए तौरे बोलौ, "ओ प्रभु हाऊं ताऊं पिछु आशाऊ पर पैहलै मू डेरुणै दै कि आपणै टौबरा कु इजाजत निऊं लौ। ⁶² यीशुए तेसलै बोलौ, "जो आदमी बाइंदी बारै हौला

री आडी माथै हाथ छाड़ीयौ पिछाऊं देखा सेऊ परमेश्वरा रै राजा रै लायक नाई आसतौ।

यीशु सत्तर चेलै भेजा

10 ¹ इऊं बशेऊ बासिए प्रभु सत्तर चेलै तौरे छाटै और जेजे-जेजे शहर और जागहा दी सेऊ डेरुणै वालौ थौ तिरे-तिरे यीशुए आपु कु पैहलै दुई-दुई चेलै भेजे। ² यीशुए तिऊंलै बोलौ, "पाची ऐन्दी फसल ता भौरी सी, पर तिरे फसली मेटणे वालै जीमदार भौरी कम ई। एथीलै डोखरै रै मालीका क औरज कौरौ कि आपणै डोखरै दौ पाची ऐन्दी फसली लौऊणा लै जीमदार भेजे। ³ आबै डैऔ; और याद छाड़ौ कि हाऊं तुमु शालटेऊ (भेड़ीया) माझीए भेरी बाशिए भेजाऊ। ⁴ तुमै डेऊंदी बारै आपकै ना बटुए, ना झाले, इदरा झाऊं कि दुजी जोडौ बूट भी ना निरेऊ, और बाटा दी कासी कारे टेकियो ढाल भी ना कौरैऊ। ⁵ और जेजे घौरा दी तुमै डिआ लै, पैहलै बोलेऊ कि एस घौरा दी शान्ति मिला। ⁶ और अगर शान्ति लायक आदमी तेस घौरा दी औलै ता तिऊंलै आशीष मिला सा, अगर सै इणै लायक नाई ता सै आशीष और शान्ति वापिस तुमकै आशा सा। ⁷ जेजे घौरा दी तुमै डिआलै, सेजे घौरा दी रौएऊ, और जो कुछ मिला लौ सेजौ खाए पिएऊ, कैलैकि मजदुरा ले तेसरी मजदुरी मिलणी चाई, घौरा-घौरा कै नाई रिटणौ। ⁸ जेजे इलाकै दी तुमु खुशी कौरौ माना लै और जो कुछ सै तुमलै खाणा लै दिआ ले तेस खुशी कौरौए खाएऊ। ⁹ तिदलै बिमार लोगु तुमै चांगै कौरैऊ, और तिऊंलै बोलेऊ कि परमेश्वरा रौ राज तुमारै नजदीक

पौंउंची गौ आ।¹⁰ पर जेजै इलाकै दी तुमु नाई माना लै ता तुमै तेस इलाकै री सडकी दी डेईयो बोलेऊ, ¹¹ तुमारै इलाकै री धूड भी जो आमारे बोंगणे दी लागी एन्दी, इयें धूड आमै तुमु काए झाडी आ, तैबे भी तुमै इणौ ज़ाणौ कि, "परमेश्वरा रौ राज तुमारै नज़दीक पौंउंची गौ आ।¹² हाऊं तुमु आइलै बोला ऊ कि, "फैसलै रै दिनै तेस इलाकै री हालत सदोम शहरा कु भी बुरी हुणी आ।

अविश्वासी शहरा लै फिटकार

(मत्ती 11:20-24)

¹³ तैबे यीशुए दुई शहर खुराजीन और बैतसैदा लै दुखा कौरियै बोलौ, हाए खुराजीन और बैतसैदा: जो शक्ती वालै काम मुयै तुमु मांजीए किएई अगर तिऊं काम हाऊं बुरे इलाकै सूर और सैदा दी कौरा थौ ता सै तिऊंरै बोंगै औन्दै बोरी रै जुडकै भीडीयो और आपणै जीवा दी छारा मांडीयो केबकै आपणौ मन पापा कु बौदला थै।¹⁴ पर फैसलै रै दिना दी तुमारी हालत तिऊं सूर-सैदा इलाके कु भी ज़ादी बुरी हुणी आ।¹⁵ ओ कफरनहमा रै लोगुओ, का तुमु सौरगा ज़ाऊं ऊँचौ कौरा ई? तुमु ता तौलै उतारा ई पैताला लै।¹⁶ तैबे यीशुए आपणै बारहा चलेऊलै बोलौ, "जो लोग तुमारी शुणाई सै मेरी शुणाई, और जो तुमारौ संदेश नाई मानदें, सै मू नाई मानदें, और जो मेरी बूश नाई मानदें सै तेस भी ना मानदें जुणीए हाऊं भेजो ऊ।

सत्तर चलेऊ रौ वापिस आशणौ

¹⁷ तैबे सै सत्तर चले यीशु काए खुशी कौरिये वापिस आशै, और सै बोलदें लागै, "ओ प्रभु तुमारै नावां

कौरिये बुरी आत्मा भी आमारे बौशा दी आ।¹⁸ यीशुए बोलौ, "मुयै शैतान बिजली बाशीए सौरगा कु तौलै पौंडै देखौ आ।"¹⁹ देखौ मुयै तुमुकै साप और बिच्छ लाता थालै ज़ागणा, और शैताना री सारी ताकती माथै हक आ दैओ औन्दौ, और केजी भी चिज़ा कु तुमु लै कोई भी नुकसान नाई औन्दौ।²⁰ तैबे भी तुमै खुश नाई हुएऊ कि आत्मा तुमारै बशा दी आ, "पर एथलै खुश हुएऊ कि तुमारै नाऊं सौरगा दी ई लीखै औन्दै।"

यीशु रौ खुश हुणौ

(मत्ती 11:25-27; मरकुस 13:16-17)

²¹ और सेजे बोंगतै यीशुए पवित्र आत्मा दी खुशी कौरियै भौरुइयो बोलौ, "ओ मेरौ बाब" सौरग और धतरी रै प्रभु, हाऊं तैरौ धन्यवाद कौरा ऊ कि ताएँ इयै बुशै ज़ानी और समझदारु कु चोरी छाडी और लोलडेऊ माथै परगट की, कैलैकि, "ओ बाब ताऊंकै इणौ ई आच्छौ लागा।²² तैबे यीशुए आपणै चलेऊ लै बोलौ, "मेरै बाबे मुकै सब कुछ सोंभाली गौ आ; कोई ना ज़ाणदौ कि छोहरू कुण आ, सिर्फ बाब ज़ाणा सा, और बाब कुण आ इणौ भी कोई ना ज़ाणदौ सिर्फ छोहरू या ज़ास माथै छोहरू तेस परगट कौरनै चाह लौ।²³ तैबे यीशुए आपणै चलेऊ भीलै मुडीयो एखुले दी बोलौ, भौली सै आखी जो इणौ देखदे ई लागी औन्दी।²⁴ कैलैकि हाऊं तुमुलै बोला ऊ कि भौरी गुरुए, और राजेऊ ए चाओ कि सै तिरे बूश देखा और शुणा, जो बुशै तुमुए हाऊं कौरदें देखौ और बोलदें शुणौ ऊ, पर सै इऊं बुशै ना देखी बोलै और ना शुणी बोलै।

दयालु सामरी री कहाणी

²⁵ तैबे एक शास्त्री उठौ और इणै बोलीऔ यीशु री परिक्षा कौरदे लागौ, कि सौदा री ज़िन्दगी पाईणा लै मुयै का जा सा कौरनौ? ²⁶ यीशुए तेसलै ज़वाब दैऔ, "धर्म शास्त्रा दी का सा लिखौ औन्दौ, और ताएँ किणौ पौडौ आ? ²⁷ तिणी आदमी ऐ ज़वाब दैऔ, इणौ आ लिखौ औन्दौ कि, "तू आपणै ज़िवा कौरीए, आपणै पूरै प्राणा कौरीयै, सारी ताकती कौरीयै और पूरै दिमागा कौरीयै परमेश्वरा आइलै प्रेम कर, "और ज़िणौ प्रेम तू आपु आइलै कौरा ई तिणौ प्रेम तू आपणै आस-पड़ोसा रै लोगु आइलै भी कर।

²⁸ यीशु ऐ शास्त्री लै बोलौ, "तू ठीक बोला ई, इणौ ई कर तैबे तू ज़िउदौ रौआई।" ²⁹ पर तिणी शास्त्री ऐ आपुलै धर्मी सौमझीऔ यीशु कु पुछौ कि, मैरौ पड़ोसी कुण आ? ³⁰ यीशुए तेसलै ज़वाब दैऔ, "एक आदमी यरुशलेमा क यरीहो गावां लै थौ लागौ औन्दौ डैउंदै, बाटा दी सेऊ चोर डाकरे घेरौ और तेसरै ज़ड़कै चिरै और सेऊ पिटीऔ अदमौरौ कियो, और आपु भागै तिदरू पोरु। ³¹ तैबे इणौ हुऔ कि सेजी बाटा दी एक याजक औशौ तिणीए सेऊ अदमौरौ आदमी देखौ और तेसकु बारुइयौ तिदरू पोरु डैऔ।

³² इणी एक लेवी ज़ाती रौ आदमी भी तेशी आलै आशौ और सेऊ भी तेसकु बारुइयौ तिदरू पोरु डैऔ।

³³ तैबे सामरी ज़ाती रौ आदमी तेशी आलै आशौ और तिणीए सेऊ अदमौरौ आदमी देखौ और तेस माथै दया की। ³⁴ सेऊ तेस अदमौरै आदमी काए आशौ और तेसरै जखमा दी तेल और दवाई लाईयौ पट्टी बानी और आपणै गादहै माथै बोशालीयौ आपु आइलै

एकी सरायें दी निऑ तियै तेसरी सेवा की। ³⁵ दुजै दिनै तिणी सामरी आदमीए सराये रै मालिका कै दुई चांदी रै रुपाई दै, और बोलौ एसरी सेवा कौरै ज़ो कुछ तैरौ औजौ लागालौ तेस हाऊ वापसी दी आशीयौ ताऊ कै दिआऊ। ³⁶ तेथ बासीए यीशुए तेस शास्त्री लै बोलौ, "आबै तेरी सौमझी दी तेस अदमौरै आदमी ज़ण डाकरे पिटौ, तेसरौ पड़ोसी कुण बौणौ तिऊं चिआ माझीया कु ज़ुण तेशी आलै बाटा दी आशे ई? ³⁷ तिणी शास्त्रीए ज़वाब दैऔ, "सेऊ आदमी जुणीए तेस अदमौरै आदमी माथै दया की आ।" "यीशुए बोलौ डेऊ तू भी इणौ कर।"

मारथा और मरियमा रै घौरा कै यीशु

³⁸ जैबे यीशु और तेसरै चेलै डेऊंदै थै लागै औन्दै तैबे यीशु एकी गावां दी डैऔ, तियै मारथा नावां री एकी छेउड़ीए यीशु आपणै घौरै निऑ।

³⁹ तिआंरी एक बौइण थी ज़ासरौ नाऊं मरियम थौ, मरियम यीशु री लाता काए बोशीयौ यीशु रै वचन शुणा थी।

⁴⁰ पर मारथा भौरी काम कौरदे-कौरदे निराश हुई गोई थी तैबे मारथा तिऊं काए आशीऔ बोलदे लागी, "ओ प्रभु का ताऊकै फिकर नाई आसती कि मेरी बौइणीए हाऊ कामा कौरना लै एखुली छाड़ी गो ऊ? आबै इआलै बोल कि मेरी मजद कर ⁴¹ यीशुए तिआलै ज़वाब दैऔ, "मारथा ओ मारथा तू भौरी बुशा लै फिकर कैलै कौरा ई और तू घबरा कैलै ई? ⁴² पर एक बूश जुसरी आ कि मरियम सै आच्छी जोगहा चुनी गो ई ज़ो तिआंकु कादी ना छुड़ाईदी।"

यीशु चलेऊ के प्राथना कौरनौ शिखावा आ

(मत्ती 6:9-13; 7:7-11)

11 ¹ एकी ज़ागहा दी यीशु प्राथना कौरदे थौ लागौ औन्दौ, जैबे यीशु प्राथना कौरियो उठौ, तैबे यीशु रे चलेऊ मांजीया कु एकी चेलै यीशु लै बोलौ, "ओ प्रभु जिणौ यहनै आपणै चलेऊ के प्राथना कौरनी शिखाई आ, तिणी तुमै भी आमुके प्राथना कौरनी शिखाओ। ² यीशुए आपणै चलेउलै बोलौ, "जेबी तुमै प्राथना कौरा, लै ता इणी कौरनी,

"ओ आमारे बाब:

तेरौ नाऊं पवित्र मानणौ चाई;
तेरौ राज चाई आशौ।

³ आमुलै हर दिना री रौटी रोज दै।

⁴ और आमारे पाप माफ कर;
कैलैकि आमै भी आपणै दुश्मन
माफ कौरी ई;
और आमु परखै नाई।

प्राथना रे बारे दी यीशु री शिक्षा

⁵ तैबे यीशुए आपणै चलेऊलै बोलौ, "तुमु मांजीये इणौ कुण आ जासरौ एक गोश्टण आधी राचीए तेस काए आशियो तेसलै बौला लौ, "ओ गोश्टण मुके चिन रोटी दै एरी। ⁶ कैलैकि मैरे काए एक गोश्टण दुरा कु आशौ औन्दौ और मुके तेसलै देणा लै कुछा ना आसतौ। ⁷ और तेसरौ गोश्टण भितरा कु बोला लौ इणौ कि, मु आधी राचीए तंग ना कौर कैलैकि आबे दार बंद हुई गौरे और मैरे लोलडे ई मुकाए सुतै औन्दै हाऊं तांऊके उठीयो रोटी नाई देई बौलदौ?" ⁸ तैबे यीशुए बोलौ, "हांऊ तुमु लै बौलाऊ अगर तेसरौ गोश्टण हुईयो भी तेसके रोटी नाई दिआ लौ, तैबे भी तेसरै

लाज शरम छाडीऔ मागणै रे कारण, तेसके जेती ज़रूरत आ तेती तेसके उठीऔ दिआ आ। ⁹ और हांऊ तुमुके बोलाऊ, "कि मांगा लै ता तुमुके दिआई, लोडा लै ता तुमुके मिला, खटखटावा लै ता खुला। ¹⁰ कैलैकि जुण मांगा तेसलै मिला, और जुण लोडा लौ तेसके मिला, और जुण खटखटावा लौ तेसलै दार खुला सा।

¹¹ तुमु मांजीये इणौ बाब कुण हुआ आ, कि जेबी तेसरौ छेहरु रोटी मांगा लौ, ता तेसलै पात्थर दिआ लौ, या माछी मांगालौ, ता तेसलै माछी रे बौदलै साप दिआ? ¹² या आंडौ मांगा लौ ता तेसलै बीच्छु दिआ?

¹³ जैबे तुमै बुरै हुईयो आपणै लोलडेऊ के आच्छी चीजे देणौ ज़ाणाई, तैबे सौरगा दी रौईणै वालौ सारेऊ रौ बाब आपणै मांगणै वालै लोलडेऊ के पवित्र आत्मा कैलै ना दैन्दौ।"

यीशु और बालज़बूल

(मत्ती 12:22-30; मरकुस 3:20-27)

¹⁴ तैबे यीशुए एकी आदमी कु लाटी, बुरी आत्मा गाडी। जैबे बुरी आत्मा तेस आदमी कु निकली, तैबे सेऊ आदमी बुशै लाईदें लागौ। इणै देखीयो लोग हैरान हुऐ। ¹⁵ तिऊं लोगु मांजीया कु कुछे लोगुए बोलौ, "एऊ यीशु ता बालज़बूल शैताना रे ज़रीयै बुरी आत्माएँ गाड़ा सा।" ¹⁶ और कुछे लोगुए यीशु परखुणा लै यीशु कु सौरगा रौ एक निशाण मांगौ। ¹⁷ पर यीशुए तिऊंरे मना री बुश ज़ाणीयो तिऊंलै बोलौ, "जेजे इलाके/राज्य दी आपु मांजीयै फूट पौड़ा ली सेऊ इलाकौ पोरु उझड़ा सा; और जेजे परिवारा दी फूट औली सेऊ घौर नाश

हुआ सा। ¹⁸ अगर शैतान आपणों विरोधी या दुश्मन औलौ ता तेसरौ राज किणै कौरीयै बौणी रौआ सा? कैलैकि तुमै मँरे बारे दी ता बोला ई इणौ कि एऊ शैताना रै जरीयै बुरी आत्मा गाड़ा सा। ¹⁹ अगर हाऊं शैताना रै जरीयै बुरी आत्मा गाड़ा ऊ ता, तुमारी सन्तान कासरै जरीयै बुरी आत्मा गाड़ा ई? आबै सँ ई

तुमारौ फैसलौ कौरा ई। ²⁰ अगर हाऊं परमेश्वरा री शक्ति कौरीयै बुरी आत्मा गाड़ा ऊ ता परमेश्वरा रौ राज तुमारै बिचा दी आशी गौ आ।

²¹ अगर एक ताकती वालौ आदमी आपु कै हथीयार छाड़ीयौ आपणै घौरा री चोउकीदारी कौरा लौ ता तेसरी धन-ज़यदाद कोई ना नी बौलदौ।

²² पर जैबै तेसकु भी जादौ ताकती वालौ आदमी तेस हराइयौ जीता सा, तैबै सेऊ तेसरै तिऊं हथीयार जेथरै जरीयै सेऊ रखवाली कौरा थौ तिऊं छुड़ावा सा और तेसरी धन-ज़यदाद नी औ बांटा सा। ²³ तौरै यीशुऐ बोलौ, "जुण मँरे साथी दी नाई, सँ मँरे विरोधा ई और जुण मूँ आइलै कौठै नाई कौरदँ सँ डाला ई।

आधै सुधारा कौरी मसीबत (मत्ती 12.43-45)

²⁴ जैबै आदमी कु बुरी आत्मा निकला सा तैबै सँ बुरी आत्मा आपु कालै खाली जागहा दी आराम वाली जागहा लोड़ा आ, और जैबै बुरी आत्मा कै किए भी जागहा नाई मिलदी, तैबै सँ बोला सा हाऊं आबै आपणै सेजै घौरा दी डिआऊ ज़िदरु हाऊं निकली

ऊ। ²⁵ जैबै सँ बुरी आत्मा वापिस लिए आशा जीदरु सँ निकली थी तियै तिआंकै सँ जागहा साफ-सुथरी और

सज़ी औन्दी मिला सा। ²⁶ और सँ बुरी आत्मा डेड़यौ आपु आइलै औजौ सात बुरी आत्माएँ आणा सा, जो तियांक भी बुरी हुआ ई। इणै कौरीयै सँ सारी बुरी आत्माएँ तेस शरीरा दी डेड़यौ वास कौरा ई तेस आदमी री हालत ज़ासदी सँ बुरी आत्माएँ हुआई पैहलै कु भी जादी बुरी बौणा सा।

भौलौ कुण आ

²⁷ जेबी यीशु बुशै लाइंदै थौ लागौ औन्दौ तेबी ई भीड़ा माइरीए कु एकी छेउड़ी ऐ जौरै हाक देईयौ बोलौ, 'भौलौ सेऊ गर्भ जेथदी तू रौ थौ, और भौले ई सँ बुबु जेथकु तारें दूध पियौ थौ।' ²⁸ यीशुऐ बोलौ, " ओ बा पर भौले ता सँ ई, जुण परमेश्वरा रै वचन शुणा और माना ई।"

यीशु कु सौरगा री निशाणी मांगा ई (मत्ती 12.38-42)

²⁹ जैबै भौरी भीड़ कौठै हन्दै लागी तैबै यीशु बोलदँ लागौ, "एजै पोस्तै रै लोग बुरै ई, जुण निशाणी मागा ई, पर योना भविष्यवक्ता री निशाणी छाड़ीयौ हाऊं केजी भी निशाणी नाई

देखलदौ। ³⁰ जीणौ योना भविष्यवक्ता निनवै इलाकै रै लोग लै निशाण बौणौ आ, तिणी आदमी रौ छेहरु भी एजै पोस्तै रै लोग लै निशाण बौणा आ।

³¹ दक्षिण तौरफा री राणी परमेश्वरा रै फैसलै रै दिना दी एजै पोस्तै रै लोग आइलै उठीयौ तिऊं माथै इलज़ाम लौ सा, कैलैकि इयै राणी सुलेमान ज्ञानी रै ज्ञान शुणना लै धौतरै रै धुरै कु आशी थी, सुलेमान राजै काणै और देखौ इदँ ता सुलेमान ज्ञानी कु भी बौड़ौ ज्ञानी आ। ³² और निनवे देशा रै लोग भी एजै पोस्तै रै लोग आइलै उठीयौ परमेश्वरा रै फैसलै रै दिना

दी तिऊं माथै इलज़ाम ला ई, कैलैकि तिऊंए योना भविष्यवक्ता रौ परचार शुणीयौ आपणौ मन पापा कू बौदलौ आ और इदै ता योना भविष्यवक्ता रौ भी भविष्यवक्ता आ।

शरीरा रौ दिवौ

(मत्ती 5:15; 6:22-23)

³³ यीशुए तौंए बोलौ, "कोई भी आदमी लम्प ज़ालीयौ नीऊठी जागहा दी नाई छाड़दौ, पर लम्प ऊंची जागहा दी छाड़ई ताकी बितरै आशणै वालेऊ कै प्याशौ लागा। ³⁴ तुमारै शरीरा रौ लम्प तुमारी आख आ, अगर तेरी आख साफ-सुथरी आ तैबै तैरौ शरीर भी साफ-सुथरौ रौआ, अगर तेरी आख शेड़ी/बुरी आ तैबै तैरौ पुरौ शरीर भी इनारे दी आ। ³⁵ आबै चोकसीए रौएऊ ताकी ज़ो प्याशौ तुमुदी आ सेऊ इशौ ना चाई। ³⁶ अगर तैरौ सारौ शरीर प्याशलौ आ और कोई भी शरीरा रौ अंग इनारे दी नाई आ तैबै सब कुछ प्याशलौ रौआ आ, ज़िणौ कि लम्पा ज़ालीयौ प्याशौ हुआ सा।

शास्त्रीऊ और फरिसीऊ लै फिटकार

(मत्ती 23:1-36; मरकुस 12:38-40)

³⁷ जेबी यीशु बुशै लाइदै थौ लागौ औन्दौ, तैबै एकी फरिसी ए सेऊ आपणै घौरै रोटी खान्दै औटाओ। तैबै यीशु तेसरै कारे भितरै डैओ और रोटी खान्दै बोशौ। ³⁸ तेस फरिसी कै इणै देखीयौ हैरानी हुई कि यीशु बिणा धोईयौ रोटी खान्दै बोशी गौ आ। ³⁹ प्रभुए तेसलै बोलौ, "ओ फरिसी तुमै जौंगटी, थाली बाइठी माज़णा लै बाँडौ ख्याल छाड़ई, पर तुमु बितै ता इबी भी मौल आ, तुमुदी ता इबी भी

लालच और बुराई भौरुई एन्दी। ⁴⁰ ओ मुख लोगुओ, "का परमेश्वरै भीतरी और बाइरी दुई भीलै ना चाणै? ⁴¹ ज़ो कुछ तुमारै कमाओ औन्दौ आ, तेस तुमै गरीबु मांझीए बांटौ, तैबै तुमै आच्छा कौरीयै शूद्ध हुआई। ⁴² "पर ओ फरिसीओ, तुमुलै ता ए केती बुरी बूश आ। तुमै ता आपणी छोटी कु छोटी कमाई रौ और पदीनै, सुदाब और सारी साल-फसली रौ दसवौ हिंसौ दिआई, पर फैसलै और परमेश्वरा रौ प्यार टाला ई पोरु। तुमु चाई थौ इणौ कौरनौ, दश्वास भी चाई थौ दैणौ और परमेश्वरा री बूशै भी थै माना। ⁴³ ओ फरिसीयौ तुमुलै ता ए केती बुरी बूश आ, कि तुमै ता धर्मिक खुम्बली दी भी ऊंची जागहा लोड़ा ई बोशणा लै, और इणौ भी ज़ाणा ई कि बज़ारा दी और बाटा-घाटा दी आशणै वालै आदमी आमकै ढाल कौरा। ⁴⁴ तुमुलै एज़ी भी केती बुरी बूश आ, कि तुमै तिऊं चोरुई एन्दी कबरा बाशीयै ई ज़ेथ माथै लोग आंडा ई और तिऊंकै इणौ पौतौ ना लागदौ कि इऊं भितै केती शौड़ी एन्दी चिज़े ई।" ⁴⁵ तैबै कानुना रै एकी जानीए यीशु लै बोलौ, ओ गुरु ज़ो कुछ बुशै तुमए इबो ज़ाऊं बोली ई तिऊं बुशु कौरौ तुमए आमारी बेइज़्जती की आ। ⁴⁶ यीशुए बोलौ, "ओ कानुना रै जानीओ तुमुलै एज़ी भी केती बुरी बूश आ। ज़ो चीज़ चुंगणा लै गौरकी आ तिरें चीज़ तुमै ओरी कू चुंगवा ई पर आपु नाई तुमै तिरें चीज़ औंउठी कौरिऐ भी छुईदै। ⁴⁷ तुमुलै एज़ी केती बुरी बूश आ, कैलैकि तुमै पुराणै गुरु काले कबर चाणा ई ज़ुण तुमारै नाना-बुड़ए जांगे ई। ⁴⁸ और तुमै गवाई आ, आपणै नाना बुड़ रै काम ज़ाणा ई कैलैकि तिऊंए सँ पुराणै ज़मानै रै गुरु जांगेई,

तुमै तिऊंरी कबरै चाणाई।⁴⁹ परमेश्वरै री बुद्धी ऐ तुमुलै इणौ बोलौ आ, हाऊं तिऊं काऐ भविष्यवक्ता और भेजै औन्दै चेलै भेजाऊ और सै तिऊं माझीऐ कु कास ज़ांगा ई और कास आइलै कौराई बरौ।⁵⁰ दुनिया दी जेती भी पैहलै औतलै भविष्यवक्ता झांगै ई, तिऊं रै ज़िमैबार एजै जुगा रै लोग हुणेई।⁵¹ हाबिल नावां रै धर्मी आदमी कु, जकर्याह नावां रै पुराणै याजका झाऊं, जुण परमेश्वरा रै घौरा दी बेदी और पवित्र ज़ागहा रै बिचा दी झांगौ थौ: तेथरै ज़िमबार एजै जुगा रै लोग हुणेई।⁵² कानूना रै जानीउ लै ऐ केती बुरी बूश हूणी आ कैलैकि तुमुऐ जाना री तालटी आपुकै नीं गो ई आ, ना ता तुमै आपु परमेश्वरा रै राजा दी डेऊंदै और ना दुजेऊ दैदें डेऊणै।⁵³ यीशु ऐ ज़ैबै आपणी बुशै बोली एरी, तैबै शासत्री और फरीसी तेस आइलै दुश्मनी छाड़दें लागै। और सै यीशु कु भौरी सवाल-जवाब कौरदें लागै।⁵⁴ और एजी कोशीशा दी थाकै लागी कि यीशु रै मुआ कु कोई इणी बूश निकला जेजी बुशेऊ कौरी यीशु गलत साबित हुआ।

देखाउटी लोग कु बौचीऔ रौएऊ (मत्ती 10:26-27)

12¹ सेजै बौगतै तियै कई हज़ार लोग कौठे हई गौऐ और लोगु री भीड़ एती बौड़ी गोई कि, एकी दुजै माथै लागै लोटदें। यीशु सौभी कु पैहलै आपणै चलेऊ भिलै मुड़ीयाँ बोलदें लागौ, फरिसी रै संजैई कु बौचीयाँ रौएऊ।² सेऊ बौगत आशदें लागौ औन्दौ, जेबी सारी बुशै परगट हुआई। और ज़ो कुछ गुप्त आ सेऊ सामनै आशणौ आ।³ ज़ो बुशै तुमुऐ पिठी

पिछ बोली आ सै बुशै छापरा माथै खौडौ हईयाँ हाके मारीयाँ बोलाई, ताकी सारै लोग तिऊं बुशै शुणी बौला।

कास कु चाई डौरनौ (मत्ती 10:28-31)

⁴ यीशुऐ आपणै चलेऊलै बोलौ, मैरै प्यारै गोश्टणो, तुमै तिऊं कु ना डौरौ जो सिर्फ तुमारौ शरीर ज़ांगी बौलाई तेथकु ज़ादाँ सै कुछ नाई कौरी बौलदें।⁵ पर हाऊं तुमुलै बोलाऊ, कि कासकु डौरनौ चाई, परमेश्वरा कु डौरौ ज़ासकै लोगु ज़ांगणै और नरका दी पाड़णै री ताकट आ।⁶ का पांज चौड़की दुई रुपाए दी ना बिकदी? तैबै भी परमेश्वर तिऊं मांझीआ कु एक भी ना बिसरदौ।⁷ और तुमारै मुंडा रै बाल भी गौणै औन्दै ई, तुमै डौरौ नाई कैलैकि तुमै परमेश्वरा लै तिऊं चौड़की रै बालरा कु भी ज़ादें किमती ई।

यीशु मानणौ या ना मानणौ (मत्ती 10:32-33; 12:32; 10:19-20)

⁸ हाऊं तुमुलै बोलाऊ, कि ज़ो कोई मूँ लोगु माझीऐ माना लौ, ता हाऊं आदमी रौ छोहरू तेस आदमी परमेश्वरा रै दूता रै सामनै माना ऊ।⁹ पर अगर कुण, लोगु काऐ मैरौ इन्कार कौरा लौ, ता हाऊं तेस आदमी रौ परमेश्वरा रै दूता रै सामनै इन्कार कौरा ऊ¹⁰ जुण कुण आदमी रै छोहरू रै खिलापा दी बोला लौ तेस लै ता माफी मिला सा। पर जुण कुण पवित्र आत्मा री बेइज्जती कौरा लौ तेस लै केबी भी माफी नाई मिलदी।¹¹ ज़ैबै तुमु धार्मिक खुम्बली दी राज़ चलाऊणै वालै, बाकी अधीकारी लोगु

कारे तुमारौ मुकदमौ चलावा लै ता तुमुए फिकर नाई कौरनी, कि आपु बौचणा लै आमु का और किणौ जा बोलनौ? ¹² कैलैकि जैबै तुमै तियै खौडै औलै, सेजै बौगतै पवित्र आत्मा तुमु कु शिखावा कि तुमु का ज़वाब जा देंगौ।

मुख सेठा रौ अनैणौ

¹³ तैबै भीडा मांझिए कु एकी आदमिए यीशु लै बोलौ, ओ गुरु, 'मैरै भाई ले बोल एरी कि आमै आपणै बाबा री जयदाद बांटी। ¹⁴ यीशुए तेसलै बोलौ, "ओ छोहरु, हाऊ कुण औआ ऊ तुमारौ फसलौ कौरनै वालौ और तुमारी जयदाद बांठणै वालौ?"

¹⁵ यीशुए तिऊलै तौएँ बोलौ, "चोकस रौ और सारै लोभ लालचा कु आपु बौची थाकौ; कैलैकि कासी री भी जीन्दगी धन-जयदादा कौरीयै नाई कारीदी।" ¹⁶ यीशुए तिऊ लै एक अनैणौ दैऔ, एकी सेठा री जमीना दी भौरी नाज़ हौ। ¹⁷ तैबै सेऊ सेठ आपणै मना दी विचार कौरदें लागौ कि आबै हाऊ किणौ कौरलौ कैलैकि मुकै इयें फौसली छाड़ना लै जागहा नाई आसती। ¹⁸ तैबै तिणी सेठै सुंचौ कि हाऊ इणौ कौरा ऊ इऊं छोटै कुठार ढालीयौ बौडै चाणा ऊ, और इयें फसल तेथ भितै छाड़ाऊ। ¹⁹ तैबै हाऊ आपणै प्राणा लै बोला ऊ, "ओ मैरै प्राण ताऊ कालै भौरी साला लै धन-जयदाद और नाज़ कौठै कियौ औन्दौ, खाऊ-पिऊ और मौज़ कर।

²⁰ पर परमेश्वरै तेस सेठा लै बोलौ, आज ई राचीए तैरौ प्राण ताऊकु पोरु निर्ईआ ई, तैबै जो कुछ तैरै कौठै कौरीयौ आ छाड़ौ औन्दौ सेऊ कासरौ हुआ आ?" ²¹ तिणौ सेऊ आदमी भी

आ जुण आपुकालै जयदाद कौठै कौरा सा, सेऊ आदमी परमेश्वरा री नौज़री ए सेठ नाई आसतौ।

परमेश्वरा माथै भरोसौ छाड़ौ (मत्ती 6:25-34)

²² तैबै यीशुए आपणै चलेऊ लै बोलौ, "आबै हाऊं तुमु लै बोला ऊ आपणै प्राणा री फिकर नाई कौरौ कि, आमै का खाऊ लै; और ना आपणै शरीरा री फिकर कौरौ कि आमै का भिडु लै।

²³ कैलैकि रोटी कु प्राण और जुडके कु शरीर बौडौ किमती आ। ²⁴ कौगै माथै ध्यान दैऔ; सै ना बौडेंदें, ना लौडेंदें, और ना तिऊँरै कुठार औन्दै, और ना तिऊँरै खातै औन्दै, तैबै भी परमेश्वर तिऊं धाचा सा। पर तुमारी किम्मत ता चौड़किऊ कु भी काफी

जादी आ। ²⁵ तुमु मांझीए इणौ कुण आ, जो फिकर कौरीयौ आपणी उमर थोड़ी भी बड़ाई बौला आ। ²⁶ अगर तुमै छोटै क छोटौ काम नाई कौरौ बौलदें तैबै बौड़ी बुशुऊ लै फिकर कैलै कौराई?

²⁷ जांगली फला दी ध्यान दैऔ कि सै किणै बौड़ा ई सै ना ता मैहनत कौरदें और ना आपुकालै जुडकै चाणदें तैबै भी केती बांठणै ई पर हाऊं तुमु लै बोलाऊ कि सुलेमान राजै भी आपणी सुखी जीन्दगी दी इऊं फुलु जीणै बांठणै जुडकै नाई भीडै।

²⁸ अगर परमेश्वर इयें धौतरि दी घास जमावा सा जो घास आज औआ और बासीए जला पोरु तैबै; ओ अविश्वासी लोगओ तुमुकै सेऊ परमेश्वर जुडकै कैलै ना भिड़ाऊदौ।

²⁹ और ना तुमै एजी बुशुऊ री फिकर कौरौ कि आमै का खाऊ लै और का पिऊ लै और ना शक कौरौ।

³⁰ कैलैकि पुरी दुनिया रै लोग इऊं

सारी चिज़ा लै फिकर कौरदै थाका ई लागी पर तुमारौ बाब परमेश्वर ज़ाणा सा कि तुमुकै इऊं चिज़ा री जुरुरत आ।³¹ पर हाऊं तुमुलै बोलाऊ कि परमेश्वरा रौ राज लोडौ तैबै सारी चिज़ै तुमुकै मिला सा।

सौरगा रौ धन का सा (मत्ती 6:19-21)

³² ओ छोटी खुम्बली रै लोगुओ, "डौरौ नाई कैलैकि तुमारौ बाब परमेश्वरा कै इणौ आछौं लाग़ा कि सेऊ तुमारै जिवा दी राज कौरा।³³ आपणी ज़यदाद बेचीयौ गरीबु लै दाण दैऔ और आपुकालै इणै बटुऐ चाणौ जो केबी ना चिरींदै और आपु कालै सौरगा दी इणी धन-ज़यदाद सांजौ जो कादी ना घोटदी जिऐ ना ता चोर चोरदौ और ना किडौ लागदौ।

³⁴ कैलैकि जिंयै तुमारौ धन औलौ तियै तुमारौ जीऊ भी लाग़ा।

ऊज़ी रौएऊ

³⁵ कौमरा कौशीयौ और दियै ज़ालीयौ सदा तैयार थाकौ (परमेश्वरा रै कामा लै)।³⁶ तिऊं आदमीऊ बाशीयै बौणौ, जुण आपणै मालिका रौ इन्तज़ार थाका ई कौरदै लागी कि मैरौ मालिक शादी ब्याह कु वापिस केबडी आशा। और जिणी सेऊ मालिक दार खटखटावा लौ और सेऊ तेसलै खरकचार दार उगाइ और तेसरै स्वागत कौरना लै तैयार रौआ।

³⁷ और जो तेस पौखदे ई लागै औन्दै, और सेजै बौगता लै तैयार ई, हाऊं तुमु लै सौचौ बोलाऊ सेऊ मालिक तेस आपणौ नुकरा धौनी बोशाला आ, रोटी खान्दै। और आपणी कमर कौशीयौ आपु तेस दासा री सेवा कौरा आ।³⁸ अगर सेऊ मालिक राचकै दुजै

या चिज़ै पौहरै दी आशीयौ आपणौ दास उज़ी देखा लौ ता सेऊ भौलौ आ।

³⁹ और एजी बुशु माथै ध्यान दैऔ कि, अगर घौरा रौ मालिक ज़ाणा लौ कि चोर केजै बौगते आशा आ, तैबै सेऊ मालिक तेस चोर भितरै आशणै नाई दैदौ।⁴⁰ तुमए हर बौगते तैयार रौइणौ चाई, कैलैकि आदमी रौ छेहरू तेबी आशा सा ज़ेबी तुमै सुंचा भी नाई लै।

विश्वास वालौ या अविश्वास वालौ दास (मत्ती 24:45-51)

⁴¹ पतरसै यीशु कु पछौं, "ओ प्रभु का एऊ अनैणौ आमूलै आ या सारेऊ लै आ?"⁴² प्रभुए तेसलै ज़वाब दैऔ, "हाऊं केजै भी विश्वास वालै, और बुद्धी वालै लोगु रै बारै दी ऊ बोलदै लागौ औन्दौ, ज़ासकै तिऊंरौ मालिक आपणै घर-परिवारा री देखबाल कौरना री और रोटी दैणै री जिमैबारी दिआ लौ।⁴³ अगर सेऊ मालिक आशीयौ देखालौ कि तेसरै दासै आछा कौरिऐ जिमैबारी सौम्भाली आ ता सेऊ भौलौ आ।⁴⁴ हाऊं तुमुलै सच्च बोलाऊ कि, मालिक आपणै तेस दासा कै आपणी सारी धन-ज़यदादा सौम्भालनै रौ हक दिआ सा।⁴⁵ अगर सेऊ दास सुंचा लौ मैरौ मालिक ता कुछ दिना ज़ाऊं वापिस ना आशदौ और दुजै नुकरा लै दुःख दैणौ शुरू कौरा लौ, और आपुलै खाणै पिणै रौ इन्तज़ाम कौरा लौ और सूर पिआ लौ।⁴⁶ ता तेसरौ मालिक बिण बोली तेबी आशा ज़ेबी तेसरै सुंचौ औन्दौ भी ना औलौ, और सेऊ मालिक तेस नुकरा लै सज़ा दिआ और अविश्वासिऊ मंज़ीऐ भेज़ा।⁴⁷ तेस

नकरा लै काठी सज़ा दिआई, कैलैकि जैबे सेऊ आपणै मालिका री ईच्छा ज़ाणा थौ, तैबे भी तीणिए आपणी जीमैबारी पूरी नाई की।⁴⁸ पर सै लोग, जुण नाई ज़ाणा थै अगर सै गलत काम कौरा ई, तिउलै थोड़ी सज़ा मिला आ। ज़ासकै ज़ादौ दैऔ औन्दौ तेसक ज़ादौ हिसाब मांगा ई और ज़ासकै ज़ादौ सम्भालौ औन्दौ तेसक भी तेती हिसाब मांगा ई ज़ेती तेसकै सम्भालौ औन्दौ आ।

यीशु रै आशणै रौ नतीज़ौ (मत्ती 10:34-36)

⁴⁹ हाऊ धौतरी माथै आगी लाइंदे ऊ आशौ औन्दौ, और हाऊ चहा ऊ कि मैरौ एऊ काम इबी लै पुरौ चाई थौ हुआ।⁵⁰ पर मुयै ता तौरें एक बप्तिस्मा निणौ आ, और ज़ेबी ज़ाऊं मुयै सेऊ निऔं नाई तेबी ज़ाऊं हाऊं परेशान रौआ ऊ।⁵¹ तुमै का सुंचा ई कि हाऊं धौतरी दी मेल मिलाप कौरदे ऊ आशौ औन्दौ? हाऊं तुमलै बोलाऊ कि, नाई बल्कि अलग कौरदे ऊ अशौ औन्दौ।⁵² कैलैकि इबी कु एकी घौरा दी पांज आदमी आपु मांझीए बिरोध छाड़ाई, चीन दुई आइलै और दुई चीआ आइलै।⁵³ बाब छोहरु आइलै, छोहरु बाबा आइलै बिरोध छाड़ा, मां छोटी आइलै, और छोटी मां आइलै, शाशु बोऊ आइलै और बोऊ शाशु आइलै बिरोध छाड़ाई।

आशणै वालै बौगता री पैहच़ाण (मत्ती 16:2-3)

⁵⁴ यीशुए भीड़ा रै लोगु आइलै भी बोलौ, "जैबे तुमै बादल तिदै उड़दै देखा ई ज़ेजी भिलै सुरज छिपा सा, तैबे तुमै खरकचार बोला ई कि पाणी-बागुर लागणै वालौ आ और तिणौ

हुआ सा।⁵⁵ और ज़ेबी सुलटी भिलै बागुर फिरदै देखा लै ता तुमै फेटी बोलाई कि आबे गर्मी पौड़ाई तैबे तिणौ हुआ सा।⁵⁶ ओ कप्टी लोगुओ तुमै धौतरी और सौरगा रै भेद ज़ाणा ई पर एजै जुगा रै बारे दी भेद कैलै ना ज़ाणदै।

आपणै विरोधी आइलै सुलौ (मत्ती 5:25-26)

⁵⁷ तुमै आपु ऊ एजी बुशु रौ फंसलौ कैलै ना निदै कि किणौ कौरनो ठीक आ।⁵⁸ अगर तुमु कोटा लै निन्दै औलै लागै औन्दै और बाटा दी तुमुके तुमारौ बिरोधी मिला लौ जुणीए तुमु माथै केस कियौ थौ, तैबे तिरे आपु मांझीए सुलौ कौरौ, नाई ता तुमु लै सज़ा भी हुई सका और तुमु कास अधीकारी कै सम्भाला और सेऊ पा तुमु ज़ेला दी।⁵⁹ अगर इणौ हुई जा लौ, ता तुमै आज़ाद नाई हुई बौलदै ज़ेबी ज़ाऊं तुमै एक-एक पाई रौ हिसाब ना दिआलै।

प्रभु यीशु लोगु लै आपणी गौलती मानणा ले बोला सा

13¹ सेजै बौगतै कुछ लोगुए यीशु कै एजी खौबर शुणाई कि ज़ेबी गलील परदेशा रै कुछ लोग यरुशलेमा दी परमेश्वरा रै घौरा दी बौली चड़ावा थै, तेबी पिलातुसै सै पोरु झोंगाए।² इणै शणीयौ यीशुए बोलौ, "का तुमै ज़ाणाई कि इयै गलीली लोग, औरौ गलीली लोगु क ज़ादै पापी थै? का एजी तांइए तिउं माथै एजी मुसीबत आशी आ?"³ हाऊं तुमु लै बोला ऊ, इणौ नाई भी नाई, पर, अगर तुमै आपणौ ज़ीऊ ना बौदला लै ता तुमै सारै भी इणै कौरियै नाष हुआई।"⁴ या तुमै

तिऊं ठाहरा आदमीऊ रै बारे दी का सौमझा ई जास माथै शिलोहा रौ गुम्मत ढौलौं थौं और सै सारै दाबड़्यौं मौरी गोए; का सै यरुशलेमा दी रौड़णै वालेऊ माझीया कु जादै पापी थै?

⁵ हाऊं तुमुलै बोलाऊ कि, इणौं नाई भी नाई, पर, अगर तुमै आपणौं ज़ीऊ ना बौदला लै ता तुमै सारै भी इणै कौरीयै नाष हुआई।"

बिणा फौला रै फेड़ रै पेड़ा रौ औनेणौं

⁶ तैबे यीशुए तीउंलै एजौं औनेणौं भी देओ; "एकी आदमी रै अंगरा रै बगीचा दी फेड़ रौ पेड़ थौं लागौं औन्दौं और सेऊँ आदमी तेस फेड़ रै पेड़ा दी फौला लोड़दै लागौं, पर तेसकै फल नाई मिलै। ⁷ तैबे तीणिए बगीचा रै चोअकीदारा कै बोलो, "देख चीआ साला ओउलै एस फेड़ रै पेड़ा दी हाऊं फौला लोड़दै आशौऊ पर फल नाई मिलदै एस पोरू काट, एसरै फालतू आ ज़बीन घेरी ऐन्दी।

⁸ चोकीदारै बोलो, "ओ मालिक! ऐजी सालै भी एस रौअणै दै कि हाऊं एथरै चारौ तौरफा दी खोदियौं खाद पा आ ऊ। ⁹ अगर अगली बारे फौला लौं ता ठीक आ नाई ता काटाऊ एस पोरू।

आराम वालै दिना दी कुबड़ी छेवड़ी ठीक कौरणै

¹⁰ आराम वालै दिना दी यीशु धार्मिक खुम्बली दी परचारा कौरदै थौं लागौं औन्दौं। ¹¹ तीए एक छेवड़ी थी जासदी कमजोर कौरनै वाली बुरी आत्मा थी लागी ऐन्दी, और सै ठाहरा बौरशा ओउलै कुबड़ी थी, तीआकै सिधौं नाई हड़या थौं। ¹² जैबे यीशुए सै देखी, "तिआलै औटाइयौं बोलौं, 'ओ बौड़ण तू आपणी बीमारी कू ठीक हुई गोई

आ।" ¹³ इणै बोलीयौं यीशुए तिआ माथै हाथ छाड़ौं सै खरकचार सीधी हुई गोई और परमेश्वरा री बौड़ाई कौरदै लागी ¹⁴ एथीलै कि यीशुए सै ब्रौता रै दिना दी ठीक की थी, धार्मिक खुम्बली रौ मुख्यौं यीशु लै रोशऔं और लोग आइलै बोलदै लागौं, "छौं दिन ई जेजे दिना दी काम चाई कौरनौं और सेजे दिना दी आशीयौं ठीक भी हुआ, पर ब्रौता रै दिना दी इणौं नाई चाई कौरणौं। ¹⁵ इणै शुणीयौं प्रभुए जवाब देओ, "ओ कपटीयौं का तुमै आपणै बौलदा या गादे ब्रौता रै दिना दी खुटे कु खोलियौं पाणी पिआउणा लै नाई नींदे? ¹⁶ का ठीक नाई थौं कि इयै बौड़ण जुण अब्राहमा रै वंशा री छोट्ट आ, जुण शैताना रै अठाराह बौरशा ओ लै बीमार थी की ऐन्दी, ब्रौता रै दिना दी इयै बीमारी कू ठीक हुई आ? ¹⁷ जैबे यीशुए ऐजी बूशै बोली, ता तेसरै सारै विरोधी रै शर्म पौड़ी और सारी भीड़ तीउं हैरनी वालै कामा कू ज़ो यीशु कौरा थौं खुश हुए। s राई रै गुलै रौ अनेणौं

(मत्ती 13:31-32; मरकुस 4:30-32)

¹⁸ तैबे यीशुए तौरे बोलौं, "परमेश्वरा रौ राज कास जिणौं आ? हाऊं परमेश्वरा रै राजा री बराबरी कास आइलै कौरु? ¹⁹ परमेश्वरा रौ राज एक राई रै गुलै जिणौं आ; बौड़्यौं सेऊ बौडा सा और पेड़ बौणा आ, और चड़कु आशियौं तेसरी डाली दी वास कौराई।"

संजेइ रौ अनेणौं

(मत्ती 13:33)

²⁰ यीशुए तौएँ बोलौ, "परमेश्वरारै राजा री बराबरी कास आइलै कौरू?

²¹ परमेश्वरारौ राज एक संजेड़े जिणौ आ, जो एकी छेउड़ी ऐ चिन पाथै पिठै मांझीए मुछौ आ, और देखदै-देखदै सारौ पिठौ ओसरी गौ आ।"

सांगड़ी दार

(मत्ती 7:13-14, 21-23)

²² यीशु इलाकै-इलाकै और गाँवा-गाँवा बाटीए परचार कौरदै-कौरदै यरुशलेमा लै थौ डेउंदै लागौ औन्दौ। ²³ तैबै बाटा दी एकी आदमी ऐ यीशु कु पुछौ, "ओ प्रभु का मुक्ति पाइणै वालै भौरी कम ई? तिणीए जवाब दैऔ, ²⁴ "घाटै दारा बाटीयै डेउणे री कोशिष कौरौ कैलैकि हाऊं तुमुलै बोलाऊ कि भौरी लोग सांगड़ै दारा बाटीए डेऊणे री कोशिष कौरा ई पर डेई नाई बोलदै

²⁵ जैबै घौरा रौ मालिक उठीयौ दार उड़ी एरा लौ और तुमै बाइरी बिलै दार खटखटाइयौ बोलदै लाग़ा लै, "ओ प्रभु आम लै दार खोल और सेऊ मालिक जवाब दिआ लौ कि, "हाऊं तुमु नाई जाणदौ कि तुमै किदले ई? ²⁶ तैबै तुमै बोलदै लाग़ा लै कि, "आमुए ताऊं काए खाओ-पिओ और ताएँ आमरै बजारा दी परचार कियौ।"

²⁷ पर सेऊ बोला लौ कि, "हाऊं तुमु लै बोलाऊ कि हाऊं तुमु नाई जाणदौ कि तुमै किदले ई? ओ बुरे काम कौरनै वालै लोगुओ तुमै सारै मुकारे

कु दूर डैऔ। ²⁸ तियै लेरनौ और दाँद चाकणौ औणौ आ। तुमै तियै अब्राहम, इसहाक, याकूब और सारै पुराणै भविष्यवक्ता परमेश्वरा रै राजा दी देखातै और आपु दिशा लै बाइरी गाड़ै औन्दै। ²⁹ पूर्व, पश्चिम, और

उत्तर, दक्षिणा कु लोग आशीऔ परमेश्वरा रै राजा दी रोटी खान्दै औआई, ³⁰ और देखौ "कुछ पिछाइके ई सै औगाड़ीए हुआई और जो पैहले ई सै पिछाइए हुआई।"

हैरोदेसा री दुश्मनी

(मत्ती 23:37-39)

³¹ तेबी कुछ फरिसीऊए आशीयौ यीशु लै बोलौ, "इदरा कु पोरु भाग कैलैकि हैरोदेस ताऊं झागणौ चाहा सा।"

³² यीशुए तिऊँलै बोलौ, "डैऔ तेस शालटे लै बोलौ, "कि हाऊं आज और कालै बुरी आत्मा गाड़ाऊ और बिमार आदमी चांगै कौराऊ और चिजै दिनै आपणौ काम पुरौ कौराऊ। ³³ तैबै भी आज, कालै और पौरशी हांडणौ ज़रुरी आ, कैलैकि इणौ नाई हुन्दौ कि कोई भी भविष्यवक्ता यरुशलेमा कु बाइरै झांगा। ³⁴ "ओ यरुशलेम! ओ यरुशलेम! तू एक इणौ इलाकौ ई कि तांए भौरी भविष्यवक्ता झांगे ई, और जो लोग परमेश्वरा रौ खुशी रौ सन्देश शुणावा ई सै ताइएँ ढालीयाए ई! मुइएँ कई बारै सुंचौ कि जिणी कुखड़ी आपणै टैणु आपणै पांखे थालै चोरा तिणी ई मुयै भी तैरै छोहरू कौठे कौरनै चाए, पर तांए हाऊं इणौ नाई दैऔ कौरनै। ³⁵ और आबै देखौ तुमारौ घौर तुमुलै शुनौ छाड़ाऊ, और हाऊं तुमुलै बोलाऊ: जेबी झाऊं तुमै नाई बोलालै कि, "भौलौ सेऊ जुण परमेश्वरा रै नांवा कौरौ आशा सा, और तेबी झाऊं मुं तुमै केबी ना देखातै।"

फरिसी रै घौरा दी यीशु

14 ¹ तैबै यीशु ब्रौता रै दिना दी फरिसीऊ रै मुख्ये मांझीया कु कास एकी रै काए रोटी खान्दै डैऔ और सै यीशु ताकी दी थै। ² तियै तेसरै मुआ

कारे एक इणो आदमी थौं जासदी पुरे शरीरा दी दुखणे थै लागे औन्दै और दुखणेऊ कु पाणी चुड़ा थौं।³ इणो देखीयो यीशुए कानुना रे गुरु और फरिसीऊ कु पुछौं, "का ब्रौता रे दिना दी चांगौ कौरनौ ठीक आ या नाई?"⁴ पर सै चुटकचार थाके। तैबे तिणीए सेऊ आदमी जासदी दुखणे री बिमारी थी लागी ऐन्दी छुईयो चांगौ कियो और डेउणै देओ।⁵ और तिउंले बोलौं, "तुमु मांझीए इणो कुण आ, जासरौ छोहरु या बौलद आरामा रे दिनै कुंए दी पौड़ा लौ ता का सेऊ तेस फेटी बाड़रे नाई गाड़ा लौ?"⁶ सै इऊं बुशु रौ कोई भी ज़वाब नाई देई बोलै।

निउलौ, पाउणौ और आदर खातर

⁷ जैबे यीशुए देखौ कि औटाए औन्दै पाऊणे बोशणा लै किणी आच्छी-आच्छी ज़ागहा छांटाई। तैबे यीशुए एक अनैणे देईयो तिउंलै बोलौं,⁸ जैबे ताऊं कुण शादी-ब्याह दी औटावा लौ ता आच्छी ज़ागहा दी नाई बोशणौं, केशी इणौ ना चाई हुआ कि तिणी आदमीए ताऊं कु भी बौड़ौ आदमी औलौ औटाओ औन्दौ।⁹ और जुणीए ताऊंलै और तेसलै नीऊंदौ औलौ देओ औन्दौ और सेऊ आशीयो ताऊंलै बोला लौ, "एस काले ज़ागहा दे तैबे ताएँ बेशर्म हुईयो सौभी कु बेकार ज़ागहा दी जा बोशणौं"¹⁰ पर जैबे ताऊं औटावा लै ता सौभीक निउठी ज़ागहा दी बोशणी। ताकी जैबे सेऊ जुणीए तू औटाओ औन्दौ ई आशा लौ, ता ताऊंलै बोला, "ओ गोश्टण, आच्छी ज़ागहा दी बोश, तैबे ताऊं आइलै बोशणे वालेऊ मांझीए तेरी बौड़ाई हुआ सा।"¹¹ कैलैकि जुण आपुले बौड़ौ बोणा आ तेस छोटौ चाणाई, और जुण कुण आपुलै छोटौ बोणा लौ तेस

चाणा ई बौड़ौ।"¹² तैबे यीशुए तेसलै बोलौ जुणीए यीशु औटाओ औन्दौ थौं, "जेबी तू दुसकी या ब्यालकी रोटी दिया लौ ता आपणे भाई, गोश्टण या पड़ोसिऊ और सेठ आदमीऊ ना ओटाए, कैलैकि सै भी ताऊं औटावा ई और तेरौ बौदलौ वापिस कौरा ई।"¹³ पर जेबी तू रोटी दिया लौ ता गरीब, लॉगडै, टुंडै और शेई लोग औटाए।¹⁴ तैबे तू भौलौ हुआई, कैलैकि तिउंके वापिस देणा लै कुछ ना आसतौ, पर जेबी धर्मा लोग ज़ीउंदै औआ लै तेभी ताऊंलै एथरौ इनाम मिला।

बौड़ी धामा रौ औनैणौ

(मत्ती 22:1-10)

¹⁵ यीशु आइलै जो लोग रोटी खान्दै थै बोशौ औन्दै ईऊं बुशौ शुणीयो एकी आदमीए बोलौं, "भौलौ सेऊ जुण परमेश्वरा रे राजा दी रोटी खा सा।"¹⁶ यीशुए तेसलै ज़वाब देओ, "एकी आदमीए बौड़ी धाम देई और भौरी लोग थै औटाए औन्दै।"¹⁷ जैबे धाम तैयार हुई गोई, ता तिणीए आपणे नकरा लै बोलौं, जासलै निऊंदौ आ देओ औन्दौ तिउं औटाऊ कि धाम तैयार हुई गोई आ।"¹⁸ पर सै सारै माफी मांगदै लागै। पैहलै आदमीए तेसलै बोलौं, मैरे डोखरौ किमतिए निओ औन्दौ, और ज़रुरी आ कि तेस डोखरौ देखु हाऊं ताऊं कु औरज़ कौरा ऊ कि मूं माफ करै।"¹⁹ दुजै आदमीए बोलौं, 'मुयै पांज जोड़ी बौलद खरीदै औन्दै, हाऊं डिआऊ तिउं परखदै, हाऊं ताऊं कु औरज़ कौराऊ कि मूं माफ करै।'²⁰ ओजौ एकीए बोलौं, 'मुयै नौई-नौई शादी कौरौ एन्दी मुकै नाई आशीदौ।'

²¹ तिणी नुकरै आपणै मालिका कारे आशीयौ इये सारी बुशै शुणाई, तैबै घौरा रे मालिकै रोशुईयौ आपणै नुकरा लै बोलौ, एस इलाकै रे बजारा और गलीऊ दी फेटी डेईयौ, गरीब, टुण्डे, लॉगडै और शेडै इदैं आण।' ²² नुकरै तौरें बोलौ, 'ओ मालिका जिणौ तारें बोलौ आ तिणी ई कौरी गौ आ तौरे भी जागहा आसती आ।' ²³ मालिकै आपणै नुकरा लै बोलौ, 'सौडकी और डोखरेऊ दी डैओ और लोगु जौबरीए आणौ ताकी मैरौ घौर पुरौ भौरीया।'

²⁴ कैलैकि हाऊं तुमु लै बोलाऊ कि, जुण लोग मैरे ओटाएनेदैं थै तिऊं मांझीआ कु कोई भी मेरी इयें धाम नाई चाखी बौलदौ।'

चेलै बौणना री किम्मत (मत्ती 10:37-38)

²⁵ जैबै यीशु आइलै बौडी भीड थी डेऊंदै लागी ऐन्दी तैबै तिणीए पिछाऊं मुडीयो तिऊंले बोलौ, ²⁶ "अगर कुण मुंकारे आशालौ, सेऊ आपणै माँ-बाँब, छेऊडी, छोहरु और भाई बौईणी इदरा झाऊं कि आपणै प्राणा कु भी जादौं मं आइलै प्यार कौरा। नाई ता सेऊ मैरौ चेलौ नाई बौणी बौलदौ। ²⁷ और जुण-कुण आपणौ क्रूस नाई उठाऊवाली, और मूं पिछु नाई आशा लौ सेऊ भी मैरौ चेलौ नाई बौणी बौलदौ। ²⁸ तुमू मांझीए इणौ कुण आ जुण बडौं घौर चाणनौ चाह लौ और बौशीयौ पैहलै कीमत नाई जोडा लौ कि मुकै एती बजट आसती की नाई? ²⁹ किये इणौ ना चांई हुओ कि पौई पाईयौ उपरें ना चाणुओ नाई, और लोग इणै देखीयौ तेसरौ मजाक उडाऊंदै लागा, ³⁰ कि एऊ आदमी चाणदैं लागौ पर उपरें ना चाणी बौलौ। ³¹ या इणौ कुण राजौ

आ जो दुजै राजे आइलै लौडदैं डिआ लौ और पैहलै विचार नाई लौ कौरा कि, बिश हजारा मुं आइलै लौडा ई का मैरे दस हजारा कौरीयै तिउरौ मुकाबलौ कौरुई जा सा? या नाई कौरीदौ? ³² नाई ता तेस राजे कारे आपणै दूता भेजीयौ तेस आइलै तिरै डेईयौ सुलौ कौरनौ चाह सा। ³³ इणै कौरीयै तुमु मांझीए कु, जुण-कुण आपणौ सबे कुछ ना छोडा लौ सेऊ मैरौ चेलौ नाई बौणी बौलदौ।

बिण स्वादा रौ लूण (मत्ती 5:13; मरकुस 9:50)

³⁴ लूण ता आच्छौ आ पर अगर लूणा रौ स्वाद बिगडी जा लौ, ता तेस कंजी चिजा कौरी लूणुओ चाणा ई? ³⁵ सेऊ ना ता जबीनौ दी खादी रे कामा दी आशदौ, तेस ता लोग बाइरै शोटा ई। जासरे शुणना रे कौन्थु औलै सै आच्छा कौरीयै शुणा लै।

औची ऐन्दी भेर (मत्ती 18:12-14)

15 ¹ सारे मामलै निणै वालै और पापी लोग यीशु कारे आशा थै तेसरी बुशै शुणदैं। ² पर फरिसी और यहदी शास्त्रीउ आपु मांझीए गुणमुणौदे लागे, "कि एऊ ता पापी लोगु आइलै मिला और रोटी भी खा सा। ³ तैबै यीशुए तिऊंले एजौ औनेणौ दैओ: ⁴ तुमू मांझीए इणौ कुण आ जासरी शौ भेरी औली और तिऊं मांझीया कु एक औचा ली पोर

तैबे
तिऊं
बाकी
बौची
ऐन्दी



औची ऐन्दी भेर 15.4

(नडीनवे) भेरी तिये सुनसान दी छाडीयो तिये औची ऐन्दी नइआनवे भेरी तेबी झाऊ ना लोड़ा जेबी झाऊं सै ओरु ना मिला? ⁵ और जेबी सै औची ऐन्दी भेर ओरु मिला आ तैबे सेऊ भेरालडु तिये भेर खुशी कौरीऐ आपणे काछा माथे चुंगा सा। ⁶ और घौरा के आशीयो आपणे दोस्त और पड़ोसिऊ औटाइयो तितले बोला मूं आइलै खुशी मनाओ, कैलैकि मेरी औची ऐन्दी भेर मिली गोई आ। ⁷ हाऊं तुमु लै बोलाऊ इणी ई सौरगा दी भी तिऊं बाकी धौमी छाडीयो जासके पापा कु मन बदुलनै री जुरुत नाई आसतौ, पर मन बदुलनै वालै एक पापी लै इणी खुशी हुणी आ।

औचौ औन्दी डौलर

⁸ या कण छेऊड़ी इणी आ जासके चांदी रै दस डौलर औलै, और तिऊं मांझीया कु एक औचा लौ पोरु, और सै छेऊड़ी तेस डौलर लौम्पा जालीयो और घौरा दी ऐजियो और लोडीओ जेबी झाऊं सेऊ मिला नाई लौ का तेबी झाऊं तेस नाई लोडदी? ⁹ और जेबी सेऊ डौलर मिला लौ तैबे सै छेऊड़ी आपणी सहेलीऊ और आपणी पड़ोसीऊ औटाईओ तिऊं लै बोला आ! मूं आइलै खुशी मनाओ, 'कैलैकि मैरौ औचौ औन्दी डौलर मिली गौ आ।'

¹⁰ हाऊं तुमु लै बोला ऊ कि इणी ई खुशी एक पापी रै मन बदुलनै कु पमेश्वरा रै दूता रै सामनै हुआ सा।

औचौ औन्दी छोहर

¹¹ यीशुऐ तौरें बोलौ, "एकी आदमी रै दुई छोहर थै। ¹² तिऊं मांझीऐ क छोटे छोहरु ऐ आपणे बाबा लै बोलौ, ओ बाब जमीन-जयदादा दी जो मैरौ हिस्सा आ, तेस मुके दैओ तैबे तेसरे बाबे तिऊंके जमीन-जयदाद बांटी। ¹³ कुछ दिना बासिए तिणी छोटे छोहरुऐ आपणी सारी धन-जयदाद कौठे की और दूर देशा लै डैओ। तिये तिणीऐ आपणी जयदाद बुरै कामा दी खर्च की। ¹⁴ जेबी तिणीऐ आपणी सारी धन-जयदाद खर्च की एरी। तेबी तेस देशा दी बौडौ काल पौडौ और सेऊ छोहरु कंगाल बोणौ। ¹⁵ तैबे सेऊ सेजे इलाके रै एकी जमींदारा रै कारे डैओ, तिये तिणी जमींदारे सेऊ आपणे डोखरे दी संगरु चारदें लाओ। ¹⁶ सेऊ चाह थौ की जेजौ चापण इयै संगरु खा ई, सेजे चापणा खाइयो आपणौ पेट भौरु, और तेसलै कोइयो कुछा ना दिआ थै।

¹⁷ जैबे सेऊ छोहरु होशी दी आशौ। तैबे बोलदें लागौ, 'कि मैरें बाबा रै केती मझदूर ई जो पेटा भौरीयो रोटी खा ई, और हाऊं इदें बुखौ मौरदें लागौ औन्दी।' ¹⁸ आबै हाऊं उठीओ आपणे बाबा कारे डिआऊ, और बोलाऊ, 'ओ बाब मुयें सौरगा रै खिलाप और तुमारी नौजरीऐ पाप कियो आ, ¹⁹ आबै हाऊं इणै जोगी नाई रौ कि तुमे मुलै छोहरु बोला, मूं तुमै आपुकारे एक नुकरा बाशीयै छाडौ।' ²⁰ तैबे सेऊ उठीयो आपणे बाबा भीलै चाल पौडौ सेऊ औजौ आपणे घौरा कु दख दुडुई थौ कि तेसरे बाबे सेऊ आपणौ छोहरु दुरा कु देखौ और तेसरी आखी भौरुई। तेस कारे फेट मारीयो डैओ, तेसदी घीण लाई और

सेऊ खोबिआओ।²¹ तिणी छोहरु ऐ आपणै बाबा लै बोलौ, 'ओ बाब, मुयै सौरगा रै खिलाप और तुमारी नौजरीऐ पाप कियो आ, आबै हाऊं इणै जोगी नाई रौ कि तुमे मुलै आपणौ छोहरु बोला।²² पर तेसरै बाबै आपणै नुकरू लै बोलौ फेटी आछै-आछै जुड़कै आणौ और एसकै भिड़ाओ और एसरै हाथा दी कांगणी और लाता दी बूट लाओ।

²³ और धाचै औन्दै पशु मांझीया कु एक काटौ ताकी आमै खाईओ खुशी मौनाई लै।²⁴ कैलैकि मैरौ एऊ छोहरु मौरी गौ थौ। आबै जीऊंदौ हई गौ आ, औंची गौ थौ आबै मिली गौ आ। तैबै सै खुशी मनाऊंदै लागौ।

²⁵ पर तेसरौ जेठौ छोहरु थौ डोखरै दी, जेबी सेऊ वापिस आपणै घौरा रै नजदीक पौऊंचौ, ता तेसकै गाइणौ बजाउणौ और नाचणौ शणुओ।²⁶ तैबै तिणीऐ एक नुकर औटाइयौ तेसकु पुछौ, "भीतै का सा औन्दै लागौ औन्दौ?"²⁷ तिणी नुकरै तेसलै बोलौ, 'तैरौ भाईटु आशी गौ आ।' और तैरै बाबै तेसरै आशणै री खुशी दी बौडी धाम आ देई ऐन्दी, कैलैकि तैरौ भाई भौलौ-चांगौ वापिस आशौ आ।²⁸ इणै शणीयौ तेसरै भौरी रोश आशै, और सेऊ भितरै डेउणौ नाई चाहा थौ, तैबै तेसरौ बाब बाइरै आशीयौ तेस मौनाऊंदै लागौ।²⁹ तिणीऐ आपणै बाबा लै जवाब देइयौ बोलौ, 'देखौ हाऊं एती बौरशा ओउलै तुमारी सेवा कौरदे ऊ लागौ औन्दौ, मुयै केबी भी तुमारी बूश नाई टाली। तैबै भी तुमुऐ मुलै केबी एक बाकरी रौ चेलटु भी ना दैओ, कि हाऊं आपणै गोश्टणु आइलै खुशी मौनाऊ।³⁰ पर जेबी तुमारौ इयौ छोहरु जुणीयै तुमारी जयदाद गान्दै कामा दी खर्च की, वापिस आशौ आ

ता तेसलै तुमुऐ धाचौ औन्दौ पशु पा कौटाओ आ।³¹ तेसरै बाबै तेसलै बोलौ, 'छोहरु आ तू ता सौदा मू ई आइलै ई, जो कुछ मैरौ आ, सेऊ सारौ तैरौ आ।³² पर आबै चांई आमुरे खुशी मौनाऊणी कैलैकि एऊ तैरौ भाई मौरी गौ थौ आबै जीऊंदौ हई गौ आ, औंची गौ थौ आबै मिली गौ आ।

चलाक खज़ान्ची

16¹ तैबै यीशुऐ आपणै चेलेऊ लै भी बोलौ, "एकी सेठा रौ एक खज़ान्ची थौ, और लोग तेस सेठा कारे तेस खज़ान्ची माथै इल्जाम लाइंदै लागै कि इयौ खज़ान्ची तेरी सारी धन जयदाद उड़ाऊंदै आ लागौ औन्दौ।² तैबै सेठे सेऊ खज़ान्ची आपुकारे औटाओ और बोलौ तैरै बारै दी हाऊं का बूश ऊ शणुदै लागौ औन्दौ? तू आबै आपणौ खज़ान्ची वालौ हिसाब किताब दै ओरू कैलैकि तू आबै खज़ान्ची रै लायक नाई रौ।³ तैबै सेऊ खज़ान्ची आपणै जीवा दी सुचदै लागौ, कि आबै हाऊं का कौरू लै, कैलैकि आबै मैरौ बाबु ता मूं खज़ान्ची रै कामा कु पोरु गाइंदै लागौ औन्दौ, बांजर मुकै खोदिंदौ नाई और भीखा मांगणा रौ लागु मुकै शौरम।⁴ इणै संचौयौ तिणी आपणै जीवा दी बीचार कियो कि, आबै मेरी सौमझी दी आशी गौ आ कि मुयै का जा कौरनौ, ताकी जेबी मूं मैरौ मालिक खज़ान्ची रै कामा कु पोरु गाइ लौ, तेबी लोग मूं आपणै घोरै निआं।⁵ तैबै तिणी खज़ान्चीऐ आपणै मालिका रै सारै कर्जदार एक-एक कौरीऐ आपु कारे औटाऐ और पहलै कर्जदारा कु पुछौ, "ताऊं माथै मैरै मालिका रौ केती कौर्जा आ?"⁶ तिणीऐ बोलौ शौ मण तेल खज़ान्चीऐ बोलौ की आपणौ

बौई-खातौ कर और फेटी पचास लिख।⁷ तैबे पूछौ तिणीए दुजै कु, 'ताउं माथै केतौ कौर्जौ आ? तिणीए बोलौ, 'शौ मण गीऊं' तैबे खजान्चीए बोलौ आपणौ बौई खातौ कर और आस्सी लिख।⁸ तैबे यीशुए बोलौ, "तिणी सेठे तेस चलाक खजान्ची री तारीफ की, कि तांए केती चालाकी कौरिरे काम कियौ आ, कैलैकि ऐजै संसारा रै लोग आपणै साथा रै लोगू आइलै रिति-रिवाजा और चाल-चालना दी धौर्मी लोगु कु भौरी चलाक ई।

⁹ और हाऊं तुमुलै बोलाऊ, "कि एस संसारा रै धन-जयदादा कौरिरे आपु कालै इणै गोश्टण चाणौ, ताकी जेबी तुमुकै सै धन-जयदाद पोरु सौंबडा लौ तेबी सै गोश्टण तुमु केबी ना सौम्बुडनै वाली जागहा दी निआ।

¹⁰ जुण छोटी-छोटी बशेऊ दी सौच्यौ रौआ सा सेऊ बौडी-बौडी बुशेऊ दी भी सौच्यौ रौआ, और जुण छोटी-छोटी बशेऊ दी बेईमान औआ सा, सेऊ बौडी-बौडी बुशेऊ दी भी बेईमान औआ।¹¹ एथीलै जैबे तुमै संसारा रै धन-जयदादा दी सौच्यै नाई रौआ लै ता तुमुकै आत्मिक (सौरगा रौ) धन-जयदाद कुण दिआ सा?¹² और जैबे तुमै बिगानै धन-जयदादा दी सौच्यै विश्वास वालै नाई रौआ लै ता, तैबे जो तुमुकै आपणौ आ तेस तुमु कै कुण दिआ सा?¹³ "कोई भी नुकुर दुई मालिका री सेवा नाई कौरी बोलदौ, कैलैकि सेऊ या कौरा एकी आइलै नफरत और दुजै आइलै कौरा प्रेम या, एकी आइलै रौआ मिली झुलीऔ दुजै आइलै छाड़ा रागा; तुमै परमेश्वर और दुनिया री धन-जयदाद, दुइया री सेवा नाई कौरी सौकदै।"

यीशु रै कुछ खौबरी

(मती 11:12-13, 5:31-32, मरकुस 10:11-12)

¹⁴ फरीसि लोग जुण लालची थै सै इऊं बुशेऊ शुणीयौ यीशु रौ मजाक उड़ाउंदे लागै।¹⁵ यीशुए तिऊंलै बोलौ, "तुमै ता इणै लोग ई जो लोगु माझीए आपु लै धर्मी बौणाई, पर परमेश्वर तमारे जीऊ जाणा सा। कैलैकि जो चीज लोगु री नौजरीयै आच्छी आ, सै चीज परमेश्वरा री नजरीयै बुरी आ।"¹⁶ यीशुए बोलौ, नियम और भविष्यदवक्ता ता यहुना रै बौगता झाऊं थै तेथ बासीए ता परमेश्वरा रै राजा री खौबर आ शणाउणै लाई ऐन्दी। और हर आदमी परमेश्वरा री बाटा दी पुरी ताकती कौरिरे आ आशदै लागौ औन्दौ।¹⁷ सौरग और धौतरी टौली सौका ई पर परमेश्वरा रै चाणै औन्दै धौर्म-नियमा रौ एक भी बिन्दु नाई टौली सौकदौ।¹⁸ जुण आदमी आपणी बोऊटी गाड़ीयौ दुजी शादी कौरालौ सेऊ गलत काम कौरा आ, और जुण आदमी दुजे री गाड़ी ऐन्दी छेउड़ी आइलै शादी कौरालौ सेऊ भी कौरा गलत काम।

सेठ आदमी और गरीब लाजर

¹⁹ एक आदमी थौ जुण मैहंगै-मैहंगै और मखमला रै जुडकै बीडा थौ, और रोज सुखी और खुश रौआ थौ।

²⁰ और लाजर नावां रौ थौ एक गरीब जासरै पुरै जीस्मा दी दुखणै थै, लोग तेस रोज चुंगीयौ सेठा री खोली काए छाड़ा थै।²¹ कैलैकि सेऊ चाहा थौ कि सेठा री फोकुई ऐन्दी जुठी रोटी खाईयौ आपणौ पेट भौरु। तिये कुकर भी आशीयौ तेसरै दुखणै चाटा थै।

²² इणौ हुआ कि एकी दिने सेऊ गरीब आदमी मौरो, और परमेश्वरारै दुतुए सेऊ चुंगीयौ अब्राहमा री उंगाली दी छाड़ौ। तैबे सेऊ सेठ आदमी भी मौरो और लोगुए सेऊ दाबौ। ²³ और सेऊ डैऔ नौरका दी तियै सेऊ भौरी दुःखा दी थौ तौडपदै लागौ औन्दौ जैबे तिणीए आपणी नौजर उपरै लाई तैबे तिणीए दुरा कु सेऊ लाजर अब्राहमा री उंगाली देखौ। ²⁴ तैबे तिणीए आके मारीयौ बोलौ, 'ओ बाब अब्राहम मुं माथै दया कौरौ एस लाजर मुकारे भेजौ ताकी एऊ आपणी औऊंठी री मुंडकी पाणी दी बीजाइयौ मेरी जीभ शैलावा, कैलैकि हाऊं इयै नौरका री आगी दी तडपदेऊ लागौ औन्दौ।' ²⁵ पर अब्राहमै बोलौ, "ओ छोहरु याद कर कि ताएँ ता आपणी जीन्दगी दी आच्छी-आच्छी चिजेऊ कौरिरे आराम कियौ। और इणी लाजरै भी गौए दुःख झेली। आबे एऊ इदै सुख शान्ति दी, और तू ई तडपदै लागौ औन्दौ।" ²⁶ इऊ सारी बूशै छाड़ीयौ आमारे और तैरै बिचा दी एक बौड़ी खाल आ ताकी जो इदर ताऊं कारे आशणौ चाहा लौ सेऊ नाई आशी बौला, और ना ताऊं कारे कु इदै आमु कारे आशी बौला। ²⁷ तिणीए बोलौ, "ओ बाब इणौ कर हाऊं ताऊं कु औरज कौरा ऊ कि तू एस लाजर मैरै बाबा रै घोरै भेज।" ²⁸ कैलैकि मैरै पाँज भाई ई, और एऊ लाजर तिऊं कारे इऊं बुशु री गवाही दिआ, इणौ नाई चाई हुआ कि सै भी इदै नौरका दी आशा। ²⁹ अब्राहमै तेसलै बोलौ, "तिऊंके ता मुसा और भविष्वदवक्ताओं री किताबे ई, तिऊंके चाई तेथरी शुणनी।" ³⁰ तिणीए बोलौ, "ओ बाब अब्राहम इणौ नाई भी नाई, अगर तिऊं कारे कृण मौरै औन्दै माङ्गीया कु जीऊंदै हुईयो डिआलौ तैबे

बौदला ई सै पापा कु आपणौ जीऊ।

³¹ अब्राहमै तेसलै बोलौ, "जैबे सै मुसा और भविष्वदवक्ताओं री बूश नाई शुणदै, तैबे सै तेसरी भी नाई शुणदौ जुण तिऊं कारे मौरै औन्दै माङ्गीया कु जीऊंदै हुईयो डिआ लौ।"

पाप

(मत्ती 18:6-7, 21-22; मरकुस 9:42)

17 ¹ तैबे यीशुए आपणै चलेऊ लै बोलौ, "आदमीऊं के पाप कौरना लै परीक्षा ता आशा ई, पर फिटकार तिऊं आदमीऊलै जासरै कारण इयै परीक्षा आशा ई।" ² जुण इऊं छोटेऊ माङ्गीया कु कास एक भी जौबरीयै परीक्षा दी पा लौ, तेसलै ता आच्छौ इणौ हुआ थौ कि तेस आदमी रै गौलै दी घोरटा रौ जौन्दर बानियौ समुन्दरा दी पा। ³ हाऊं तुमु खबरदार कौराऊ; अगर कृण विश्वासी भाई तैरै विरोधा दी बुरौ कौरालौ, तेस डांटीऔ सौमझाऔ। अगर सेऊ पछता लौ ता तेस माफ कौरौ। ⁴ अगर सेऊ दिना दी साता बारै भी तैरै विरोधा ई बुरौ कौरा, और आशीयौ बोला कि हाऊं पछताऊ मुं माफ कर, ता तू तेस माफ कौर।

विश्वास

⁵ तैबे भेजे औन्दै चलेऊए प्रभु लै बोलौ, 'आमारौ विश्वास बौड़ाऊ।'

⁶ यीशुए तिऊंलै जवाब दैऔ, "अगर तुमारौ विश्वास राई रै ग्लै जेती भी औआ थौ, ता तुमै एस किमु रै पेड़ा लै बोलालै, कि तू जौड़ी कु पोटुइयौ समुन्दरा दी लाग। ता सेऊ तुमारी बूश माना थौ।"

एक सेवा कौरने वालै रौ फरज

⁷ जेबे कृण नुकुर डोखरै बाइयौ या भेरी चारीयौ आशा सा, "का तेसरौ मालिक तेसलै इणौ बोला कि फेटी आश रोटी खा?" ⁸ का सेऊ इणौ ना बोलदौ, "पैहलै मुलै रोटी चाण, जेबी झाऊं हाऊं खाई-पी औ फारीक ना औलौ, तेबी झाऊं मेरी सेवा कर तेथ बासीएे खायै तू।" ⁹ आपणी आज्ञा पुरी कौरना लै सेऊ मालिक आपणै तेस नुकरा लै शाबाशी केभी ना दैन्दौ। ¹⁰ इणै ऐ कौरीए जेबे तुमै मेरी आज्ञा मानालै, ता तुमुए भी इणौ बोलनौ आ कि आमै तारोफा रै जोगी नाई आसतै। आमै ता नुकुर ई जुण आपणौ फरज पुरौ कौरदै ई लागै औन्दै।

यीशु दस कोड़ी ठीक कौरा

¹¹ यीशु आपणै चलेऊ आइलै यरुशलैमा लै चाल पौड़ौ, तैबे सै सामरीया और गलील इलाके बाटीयै लागै डेउंदै। ¹² जीणी सै एकी गाँवा दी डेवै तियै दख दुडुई तिउंकै दस कोड़ी मिलै। ¹³ तिउंए जौरै आकै मारीयौ बोलौ, "ओ यीशु" ओ मालिक आमु माथै दया कौर। ¹⁴ यीशुए तिउं भीलै देखीयौ बोलौ, "डैओ आपणै याजक के देखालीयौ। खरकचार डेउंदै-डेउंदै तिउंरौ कोड़ ठीक हुई गौ आ।" ¹⁵ तिउं मांझीयै जेबे एकी ऐ देखौ कि हाऊं चांगौ हुई गो, ऊ ता सेऊ वापिस यीशु कौरै आशौ और जौरै-जौरै बोलदै लागौ, "हाऊं ठीक हुई गो ऊ परमेश्वरा री बौड़ाई चाई हुई।" ¹⁶ सेऊ यीशु रै बांगणै माथै पौड़ीयौ यीशु रौ धन्यवाद कौरदै लागौ सेऊ आदमी एक सामरी थौ। ¹⁷ यीशुए तेसकु पुछौ, "का मुंयै दस आदमी ठीक नाई कियै, तैबे

नौ आदमी किएई?" ¹⁸ का परमेश्वरा री बौड़ाई कौरदै एका परदेसी वापस आशौ आ? ¹⁹ यीशुए तेस आदमी लै बोलौ, "आबै उठ, और डेऊ तैरौ जो विश्वास आ तिणीए तू चांगौ कियौ ई।" ²⁰ जेबे फरीसि लोगुए यीशु कु पुछौ, 'परमेश्वरा रौ राज केबी आशौ आ?' तैबे यीशुए तिउंलै जवाब दैओ, "परमेश्वरा रौ राज दिशणै रै रुपा दी नाई आशदौ, ²¹ और ना लोग इणौ बोलदै कि देखौ परमेश्वरा रौ राज इदै आ या तियै आ, देखौ परमेश्वरा रौ राज ता तुमु मांझीयै आ।" ²² तैबे यीशुए चलेऊ लै बोलौ, "इणै दीन आशणे ई जेथदी तुमै आदमी रै छोहरु मांझीया कु एक दीन देखणौ चाहा लै पर नाई देखी बौलदै।" ²³ लोग तुमु लै बोला लै, देखौ आदमी रौ छोहरु तियै आ या इदै आ। पर तुमुए डेऊणौ नाई और ना तिउं पिछ हुणौ। ²⁴ कैलैकि जिणी, बीजली सौरगौ रै एकी धुरे कु दुजै धरा झाऊं चौमका आ, तिणी आदमी रौ छोहरु भी आपणै दिना दी परगट हुआ सा। ²⁵ पर एथकु पैहलै आदमी रै छोहरु ऐ भौरी दुःख जा ई उठाउणै। और एस जुगा रै लोग तेस बिगानौ सौमझा ई। ²⁶ जीणौ पैहलै जमाने रै नूह गुरु रै बौगता दी हुओ आ, तिणी आदमी रै छोहरु रै बौगता दी भी हुआ सा। ²⁷ जेबी झाऊं नूह समुन्दरी जहाजा दी ना डैओ, सेजे दिना झाऊं लोग खा-पिआ थै और तिउं मांझीए शादी-ब्याह हुआ थै। तैबे इणौ पाणी लागौ कि सब कुछ खातम हुओ। ²⁸ और जीणौ लूत नावां रै आदमी रै बौगता दी हुओ थौ कि लोग थै खांदै-पिंदै और लैन-देन कौरदै, पेड़-पौधे लाईदै, और घोर बार

चाणदैं लागैं औन्दै।²⁹ पर जेजै दिनै लूत सदोम इलाके कु निकलौ सेजै दिनै सौरगा कु आग और दारु बौरसै और सारै खातम कियै।³⁰ आदमी रौ छोहरु परगट हुणै रै दिना दी भी इणौ हुणौ आ।³¹ सेजै दिनै जुण छापरा माथै औलौ और तेसरौ सामान औलौ घौरा बितै, तैबै सेऊ तेस समाना निंदै नाई आशा, तिणी जुण डोखरै दी औलौ सेऊ भी वापिस घौरै नाई आशा।³² लुता री छेऊड़ी याद छाड़ौ।³³ जुण-कण आपणै प्राण बौचाउणै चाहा लौ सेऊ तेस खातम कौरा, और जुण कौरा तेस खातम सेऊ आ बौचावा।³⁴ हाऊं तुमुलै बोलाऊ, "सेजी राचीए दुई आदमी एकी चारपाई माथै औलै सुतै औन्दै तिऊं मांझीए क एक निणौ और दुजौ छाड़नौ तिरै।"³⁵ दुई छेउड़ी जांजै पिशदैं औली तिऊं मांझीए कु एक निणी दुजी छाड़नी तिरै।³⁶ दुई जौणै डोखरे दी औलै एक निणौ एक छाड़नौ तिरै।³⁷ इणै शुणीयौ तिऊंए यीशु कु पुछौ, "ओ प्रभुआ एजी बुशै किये औणी आ?" यीशुए तिऊंलै बोलौ, "जीणौ गौरुड कौठै हुणै कु ठेऊ लागा कि इदरा बाटीयै कुछ मौरौ औन्दौ आ, तिणी जेबी आमैं भी इणी बुशै शुणुलै या देखुलै तैबै आमुकैं भी ठेऊ लागा कि सेऊ बौगत नजदीक आ।

अधर्मै फैसलै कौरने वालौ और विधवा रौ औनेणौ

18¹ तैबै यीशुए एथरै बारै दी औनेणौ दैऔ कि आमू रोज़ प्राथना कौरनी और हिम्मत चाई छाड़नी।

² एकी इलाके दी एक फैसलौ कौरनै वालौ रौआ थौ, जुण ना परमेश्वरा क डौरा थौ और ना कासी आदमी रौ

परवाह कौरा थौ।³ सेजै इलाके दी एक विधवा भी रौआ थी जो तेस फैसलै कौरनै वालै काए घौड़ी-घौड़ीए आशीयौ बोला थी, मैरौ फैसलौ कर और मूं मैरै दुश्मना कु बौचाऊ।

⁴ काफी बौगता झाऊं ता तिणीए तिआरी कौन्थशुणी की पर आखरी दी तिणीए आपणै जीवा दी विचार कियौ कि ना ता हाऊं परमेश्वरा कु डौरदौ और ना कासी आदमी री

परवाह कौरदौ।⁵ तैबै भी इयै विधवा मुं रोज़ आशीयौ तंग कौरा, आबै मुं इयै विधवा रौ फैसलौ कौरनौ जा। केशी इणौ ना चाई हुओ कि इयै घौड़ी-घौड़ीए आशीयौ मुं भौरी

परेशान कौरा।⁶ प्रभुए बोलौ, "शणौ, एऊ बुरौ फैसलै कौरनै वालौ का बोलौ

आ?⁷ तैबै का परमेश्वर आपणै चुनै औन्दै लोगू रौ फैसलौ नाई कौरा लौ? जुण राच दिन तेसरी प्राथना कोराई? का परमेश्वर आपणै लोगू लै बेर

पा?⁸ हाऊं तुमू लै बोलाऊ परमेश्वर आपणै लोगूरौ फैसलौ फेटी कौरा! तैबै भी जेबी आदमी रौ छोहरु आशा लौ, "का तेबी सेऊ धौतरी माथै लोगू दी विश्वास पा लौ?"

फरीसि और मामलै निणै वालै रौ औनेणौ

⁹ जुण आपु लै धर्मा बौणा थै और दुजै लोगू सौमझा थै बेकार तिऊंलै यीशुए एजौ औनेणौ दैऔ कि,¹⁰ दुई आदमी परमेश्वरा रै घौरा दी प्राथना कौरदैं डै, एक थौ फरीसी दुजौ थौ

मामलै निणै वालौ,¹¹ फरीसी आपणै मौना दी इणी प्राथना कौरदैं लागौ कि, 'ओ परमेश्वर, हाऊं तैरौ धन्यवाद कौराऊ कि हाऊं दुजै लोगू जिणौ डाकु, ठगणै वालौ और गान्दै काम कौरनै वालौ नाई आसतौ, और ना

एस मामलै निणै वालै ज़िणौ आसतौ जो इदै आ।¹² हाऊं हफ्ते दी दुई बारै ब्रौत छाड़ाऊ, और हाऊं आपणी सारी कमाई रौ दसवौ हिस्सौ भी दिआ ऊ।¹³ पर मामलै निणै वालै दूर खौड़ी हड़यौ सौरगा भीलै देखणौ भी ना चाओ, और आपणै हिकड़ै पिटी-पिटीओ बोलदै लागौ, 'ओ प्रभु' मुं पापी माथै दया कर।¹⁴ तैबै यीशुए बोलौ, "हाऊं तुमुलै बोलाऊ, कि सेऊ फरीसि नाई बल्की एऊ मामलै निणै वालौ आदमी परमेश्वरा री नौज़री दी धर्मी बौणीयौ आपणै घोरै डैओ आ, कैलैकि ज़ुण आपुलै बौड़ौ बौणा लौ सेऊ छोटौ बौणनौ आ। और ज़ुण बौणा लौ आपु लै छोटौ सेऊ बौणनौ आ बौड़ौ।

लोलडेऊ लै आशिष

¹⁵ तैबै लोग आपणै लोलडेऊ भी यीशु कारे लागै आपणै ताकी यीशु तिऊ माथै हाथ छाड़ा, पर चलै लागै तिऊं धौमकाऊंदै।¹⁶ यीशुए लोलडै आपु कारे औटाए और बोलौ, "लोलडेऊ मुं कारे आशणै दैओ" इऊं नाई रोकौ कैलैकि परमेश्वरा रौ राज़ इणेऊ ज़िणौ आ।¹⁷ हाऊं तुमु लै सौच्यौ बोलाऊ ज़ुण परमेश्वरा रौ राज़ इऊं लोलडेऊ ज़िणौ नाई माना लौ सेऊ परमेश्वरा रै राज़ा दी केबी भी नाई डेई बौलदौ।

सेठ आदमी और सौदा री ज़ीन्दगी

(मत्ती 19:16-30; मरकुस 10:17-31)

¹⁸ तैबै यहूदीऊ रै एक मुख्यै यीशु कु पुछौ, "ओ महान गुरु सौदा री ज़ीन्दगी पाइणा लै हाऊं का कौरु?"

¹⁹ यीशुए तेसलै बोलौ, "तू मुलै सारेऊ कु महान गुरु कैलै बोला ई?" कोई

भी आच्छौ नाई आसतौ परमेश्वरा रै सिवाए।²⁰ तू आज्ञाएँ ता ज़ाणदौ औलौ, 'गान्दै काम ना कौरनी, खून ना कौरनौ, चोरी ना कौरनी, ना झुठौ गवाही दैणी, और आपणै मां-बाबा री इज़्जत कौरनी।²¹ तिणी मुख्यै बोलौ, इऊं आज्ञाएँ ता हाऊं लोलडी औउलै मानाऊ।²² इणै शूणीयौ यीशुए तेसलै बोलौ, "ताऊंदी औजौ भी एकी बुशा री कामी आ।" आपणी सारी ज़यदाद बेचीयौ गरीबु लै बांट, ताऊंलै मिला सौरगा दी धन-ज़यदाद, और आपु आंड मुं आइलै।²³ इणै शूणीयौ सेऊ मुख्यौ भौरी दुःखी हुओ कैलैकि सेऊ भौरी सेठ थौ।²⁴ यीशुए सेऊ सेठ दुःखी देखीयौ आपणै चलेऊ लै बोलौ, 'सेठ रौ परमेश्वरा रै राज़ा दी डेउणौ भौरी कठीन आ।²⁵ सेठ आदमी रै परमेश्वरा रै राज़ा दी डेउणै कु उंटा रै सिउणी रै शेडै बाटीयै डेउणौ आसान आ।²⁶ इणै शूणीयौ लोगुए बोलौ, तैबै कासरौ उदार हई बौला सा?²⁷ यीशुए बोलौ, "जो आदमी रै बोलै नाई औन्दौ सेऊ परमेश्वरा रै बोलै औआ सा।²⁸ पतरसै बोलौ, "देखौ आमै ता आपणौ घोर-बार छाड़ीयौ ताऊं पिछु चाल पौडै ई।²⁹ यीशुए बोलौ, "हाऊं तुमुलै सौच्यौ बोलाऊ इणौ कोई ना आसतौ ज़ुणीए परमेश्वरा रै राज़ा री ताईए, आपणौ घोर, छेउड़ी, भाई और माम-बाब या लोलडै छाड़े औलै,³⁰ और तेसलै इयें ज़ीन्दगी दी कई गुणौ ज़ादौ और आशणै वालै जुगा दी सौदा री ज़ीन्दगी ना मिला।

यीशु आपणै मौरनै रै बारे दी तौयै बोला

(मत्ती 20:17-19; मरकुस
10:32-34)

³¹ तैबे यीशुए आपणे बारहा चले आपुकारे आटाए और तिऊले बोलौ, "देखौ आमै यरुशलेमा ले ई लागै औन्दै डेउन्दै, जो-जो बुशै आदमी रै छोहरु रै बारे दी पुराणे गुरुरे लिखी सै सारी पुरी हणी आ। ³² कैलैकि तेस दुजी जार्ती रै लोगु रै हाथा दी दिआई, सै तेसरौ मजाक उड़ावा ई। सै तेसरी बेइज्जती कौरा ई और तेस माथै थुका ई। ³³ और तेसदी कोडै ला ई, तेस पोरु झांगा ई पर सेऊ चिजै दिनै जीऊदौ हुआ सा।" ³⁴ पर तिऊं चलेऊरे यीशु री केजी भी बूश नाई सौमझी और इयै बुशै तिऊंकु चोरुई थाकी, जो बोलौ थौ सेऊ तिऊरी सौमझी दी ना आशौ।

शेडौ भीखारी ठीक कौरनौ

³⁵ जेबे यीशु यरीहो इलाके रै नजदीक पोंचौ, तियै बाटा दी एकी भीलै बोशीयौ एक शेडौ भीखा मांगदै थौ लागौ औन्दौ। ³⁶ तिणी शेडै भीड़ा री आवाज शुणीयौ पुछौ, 'एउ का औन्दै लागौ औन्दौ?' ³⁷ भीड़ा रै लोगुए बोलौ, नासरत गावां रौ यीशु आ इदरा बाटीयै डेउन्दै लागौ औन्दौ। ³⁸ इणै शुणीयौ सेऊ शेडौ भीखारी चिलांदै लागौ 'ओ यीशु दाऊदा रौ छोहरु मूं माथै दया करा। ³⁹ जो लोग औगाडीए थै लागै औन्दै डेउन्दै तिऊंए तेसलै डांटीयौ बोलौ, "चुटुक थाक" पर सेऊ तौरें भी जोरै-जोरै लागौ चिलांदै, "ओ दाऊदा रौ छोहरु मूं माथै दया करा।" ⁴⁰ जेबे यीशुए तेसरी हाक शुणी, ता यीशु खौड़ी टेकौ और आज्ञा देई कि "एस मूं कारे आणौ" जेबे सेऊ शेडौ भीखारी यीशु रै नजदीक आशौ ता

यीशुए तेसकु पुछौ, ⁴¹ "तू का चाहा ई? हाऊं ताऊलै का कौरु? तैबे तिणीए बोलौ, "ओ प्रभु हाऊं चाहा ऊ की हाऊं देखदै लाग।" ⁴² यीशुए बोलौ, "ठीक आ तू देखौ बौला ई" तैरै विश्वासै तू ठीक कियो ई।" ⁴³ तेबी ई सेऊ शेडौ भीखारी देखदै लागौ, और परमेश्वरा री बौड़ाई कौरीयौ यीशु पिछु आण्डदै लागौ। जुणीए भी एजौ चमतकार देखौ सै सारै परमेश्वरा री महिमा कौरदै लागै।

यीशु और जक्कई

19 ¹ यीशु यरीहो इलाके बाटीयै थौ डेउंदै लागौ औन्दौ। ² तियै जक्कई नावां रौ एक आदमी थौ जुण मामलै निणे वालेऊ रौ मुखयो थौ और सेऊ बौडौ सेठ थौ। ³ सेऊ यीशु देखणे री कोशिश थौ लागौ औन्दौ कौरदै कि सेऊ कुण आ पर भीड़ा रै कारण सेऊ यीशु नाई देखी बोलौ कैलैकि सेऊ कौदा रौ छोटौ थौ। ⁴ तैबे यीशु देखणा लै सेऊ भीड़ा कु औगाडीयै फेटा मारीयौ डैओ और एक गुलरा (फेडु) रै पेडा दी चौडौ कैलैकि यीशु सेजी बाटा दी डेउणै वालौ थौ।

⁵ जेबे यीशु तेस पेडा कारे पोंचौ, तैबे उपरै देखीयो जक्कई फेडु रै पेडा दी 19.4 तेस जक्कई लै बोलौ, "ओ जक्कई फेटी धौनी उत्तुर कैलैकि आज मुयै तैरै घौरा कै रौड़णौ आ।" ⁶ जक्कई फेटी उत्तरौ, और यीशु खुशी कौरीयै आपणे घौरै नियौ। ⁷ इणै देखीयो सारै लोग



आपु मांझीये गुणमुणांइयो बोलदै लागे, 'यीशु ता पापी आदमी रे कारे पा डेई गौ आ।' ⁸ जक्कई खौडौ उठौ और यीशु लै बोलदै लागौ, 'ओ प्रभु हाऊं आपणी आधी जयदाद गरीबु लै दिआऊ और अगर मुइये कासी क भी दोखे देइयो जादौ मामलौ निओ आ तेसके हाऊं चार गुणौ वापिस दिआऊ।' ⁹ यीशुए तेसलै बोलौ, "आज एस घौरा दी मुक्ती हुई आ कैलैकि एऊ आदमी भी अब्राहमा रे वंशा रौ आ।" ¹⁰ हाऊं आदमी रौ छोहरु इणै लोगु जो परमेश्वरा कु दूर पापा दी ई डुबै औन्दै तिऊं लोडै और बौचाउंदे ऊ आशौ औन्दौ।

दस सर्फी मुहरा रौ औनेणौ (मत्ती 25:14-30)

¹¹ जैबै लोग इऊं बुशु शुणदै थै लागे औन्दै तैबै यीशुए एक औनेणै देइयो बोलौ, कैलैकि सेऊ यरुशलेमा रे नजदीक थौ, और लोग सौमझा थै कि परमेश्वरा रौ राज शिथी परगट हुणौ आ। ¹² एथीलै यीशुए बोलौ, 'एक सेठ आदमी दूर देशा लै डैओ ताकी सेऊ राजे रौ हक पाइयो वापिस आशा।' ¹³ तैबै तिणीये आपणै नुकरा मांझीया कु दस नुकर औटाए, और तिऊंके दस सर्फी मुहरै देइयो तिऊंलै बोलौ, मैरे आशणै झाऊं एथरौ लेण-देण करैऊ। ¹⁴ और तेस सेठा रे इलाकै रे लोग तेस आइलै दुश्मनी छाड़ा थै, तैबै तिऊंए तेस सेठा पिछ आपणौ दूत खौबरी कौरी भेजौ कि आमै नाई चांअदै कि एऊ आदमी आमु माथै राज कौरा। ¹⁵ जैबै सेऊ आपणै राजा रौ हक पाइयो वापिस आशौ तैबै तिणीए आपणै नुकर औटाए ज़ासकै तिणीए सर्फी मुहरै थै देई ऐन्दी, ताकी सेऊ तिऊंकु लेण-देणा

रे बारे दी पौतौ कौरा कि तिऊंए का-का कौमाओ आ? ¹⁶ तैबै पैहलै नुकरै बोलौ, 'मालिक तेरी देई ऐन्दी सर्फी मुहरी माथै मुये दस औजौ कौमाई।' ¹⁷ तिणी सेठे तेस नुकरा लै बोलौ, 'ओ मैरे सौभी क आच्छै नुकर शाबाश" तू भौरी थोडे दी भी विश्वास वालौ निकलो ई आबै तू दस इलाकै माथै राज कर।' ¹⁸ तैबै दुजै नुकरै भी आशीयो बोलौ, मुये तेरी सर्फी महरी कौरी पांज औजौ कौमाई। ¹⁹ तिणी सेठे तेसलै भी बोलौ "शाबाश" तू भी पांज इलाकै माथै राज कर। ²⁰ चिजै नुकरै भी आशीयो बोलौ, ओ मालिक तेरी देई ऐन्दी मुहर (चांदी रौ रुपाई) इदै आ, जो मैरे चादरु रे धुरे दी थी बानियो छाडी ऐन्दी। ²¹ हाऊं ताऊंक भौरी डौरा थौ कैलैकि तू काठौ आदमी ई जीए तेरी नाई आ तिरु भी तू निआई जो तू नाई बौइंदौ तेस भी तू लौआ ई। ²² सेठे तेसलै बोलौ, ओ दुष्ट नुकर हाऊं तेरे मुआं कौरीए ताऊं दोषी चाणाऊ, जैबै तू ज़ाणा थौ कि हाऊं काठौ आदमी ऊ जो मैरो नाई आ तेस हाऊं चुंगाऊ और जो हाऊं नाई बौइंदौ तेस हाऊं लौआऊ। ²³ तैबै ताए मेरी सर्फी मुहरै ब्याज़ा माथै कैले ना देई ताकी जेबी हाऊं आशा थौ ता तेबी सित ब्याज़े निआं थौ। ²⁴ तिणी सेठे तिऊंलै बोलौ जो तिये खौडै थै, इये सर्फी मुहरै एसक ओरु छुड़ाओ और तेसके दैओ ज़ासकै दस सर्फी मुहरै ई। ²⁵ तिऊंए तेस सेठा लै बोलौ, ओ मालिक तेसके ता ई आसती दस सर्फी मुहरै। ²⁶ हाऊं तूमु लै बोलाऊ, ज़ासकै आसती आ और सेऊ ठीक डोंगा रौ बौरता लौ तेसके औजौ मिला। जुण ठीक डोंगा रौ ना बौरता लौ तेसकु सेऊ भी ओरु निर्इआ

सा जो तेसके औलौ।²⁷ पर मैरे तिऊं दृश्मन जो नाई चाहा थै कि हाऊं तिऊं माथै राज कौरु, तिऊं इदै मुकारे आणीयौ पोरु झांगौ।

यीशु रौ यरुश्लेमा दी डेऊणौ

(मत्ती 21:1-11; मरकुस 11:1-11; युहन्ना 12:12-19)

²⁸ इऊं बुशै बोलीयौ यीशु यरुश्लेमा लै तिऊं सौंभीऊ कु ओगाड़ीयै आण्डदै लागौ।²⁹ जैबै से जैतून नावां री पहाड़ी कारे पौंउंचै तियै बैतफगै और बैतनियाह नावां रै दुई गाऊं थै। तैबै यीशुए चलेऊ मांझीया कु दुई चेलै इणै बोलीयौ भेजै कि,³⁰ आपणे सामनै वालै गावां दी डैऔ, तिरे पौंउंचीयौ तुमुकै एक गदेटु मिला खंटी दी बानौ औन्दौ। जास माथै इबौ झाऊं कोई ना बोशौ, तेस खोलीयौ ओरु

आणेऊ।³¹ अगर तुमु कु कुण पुछा लौ कि एस कैलै खोला ई? तैबै तुमै बोलेऊ प्रभु कै एसरी जुरुरत आ।³² जो चेलै यीशुए भेजै औन्दै थै तिऊंए तियै डेइयौ तिणौ देखौ जिणौ यीशुए तिऊंलै बोलौ थौ।³³ जैबै से चेलै गदेटु खोलदै लागै तैबै तेसरै मालिकुए तिऊं लै बोलौ, एस गदेटु कैलै खोलाई? ³⁴ तिऊंए बोलौ प्रभु कै एसरी जुरुरत आ।³⁵ तैबै चलेऊए सेऊ गदेटु खोलियौ यीशु कारे आपौ और तेस माथै आपणे जुड़के पाईयौ यीशु तेस माथै बोशालौ।³⁶ जैबै यीशु आण्डदै लागौ तैबै लोग आपणे जुड़के बाटा दी बिछाऊंदै लागै, यीशु रै स्वागता लै।

³⁷ जैबै

यीशु

जैतून

पहाड़ी

री

उतराई

दी

पौंउंचौ,

तैबै

चलेऊ

री

सारी

भीड

यीशु

रै

सारै

शक्ती

वालै

कामा

देखीयौ

खुश

हुए

और

परमेश्वरा

री

बोड़ाई

कौरदै

लागै।

³⁸ "भौलौ

सेऊ

राजौ

जुण

प्रभु

रै

नावा

दी

आशा

आ,

सौरगा

दी

शान्ती

और

परमेश्वरा

री

बोड़ाई

हो।

³⁹ तैबै

भीडा

मांझीया

कु

कुछ

फरीसि

लोगुए

यीशु

लै

बोलौ

औ

गुरु

आपणे

चेलैऊ

धौमकाऊ

कि

चुटुक

थाका।

⁴⁰ यीशुए

जवाब

दैऔ,

"हाऊं

तुमुलै

बोलाऊ

अगर

इयै

चुटुक

थाका


लै

तैबै

ढोल

चिलांदै

लागा।



यीशु रौ स्वागत 19.36

री

सारी

भीड

यीशु

रै

सारै

शक्ती

वालै

कामा

देखीयौ

खुश

हुए

और

परमेश्वरा

री

बोड़ाई

कौरदै

लागै।

³⁸ "भौलौ

सेऊ

राजौ

जुण

प्रभु

रै

नावा

दी

आशा

आ,

सौरगा

दी

शान्ती

और

परमेश्वरा

री

बोड़ाई

हो।

³⁹ तैबै

भीडा

मांझीया

कु

कुछ

फरीसि

लोगुए

यीशु

लै

बोलौ

औ

गुरु

आपणे

चेलैऊ

धौमकाऊ

कि

चुटुक

थाका।

⁴⁰ यीशुए

जवाब

दैऔ,

"हाऊं

तुमुलै

बोलाऊ

अगर

इयै

चुटुक

थाका

लै

तैबै

ढोल

चिलांदै

लागा।

यीशु

परमेश्वरा

रै

घौरा

दी

डिआ

सा

(मत्ती 21:12-17; मरकुस
11:15-19; यहन्ना 2:13-22)

⁴⁵ तैबे यीशु परमेश्वरा रे घौरा दी डैऔं
और समान बेचणे वाले बाइरे भगाए।



यीशु परमेश्वरा रे घौरा दी 19.45

⁴⁶ और बोलौ, "धर्मशास्त्रा दी इणौं आ
लिखौ औन्दौ कि मेरो घौर प्राथना
कौरने रो घौर आ। पर तुमुए ता एऊ
लुटणे वालेऊ रो आइडौं चाणी गौ
आ।" ⁴⁷ यीशु रोज परमेश्वरा रे घौरा
दी लोगु लै शिक्षा दिआ थौ। पर बौडै
याजक यहूदी शास्त्री और लोगु रे बौडै
नेते यीशु झांगणे रो मौकौ लोडा थै।

⁴⁸ पर तिउंके यीशु झांगणे रो कोई
मौकौ ना मिलौ कैलैकि सारे लोग
यीशु री बुशै बौडै ध्याना कौरी शुणा
थै।

यीशु रे हका माथै सवाल

(मत्ती 21:23-27; मरकुस
11:27-33)

20 ¹ एकी दिने इणौं हौ कि जेबी
यीशु परमेश्वरा रे घौरा दी लोगु लै
शिक्षा देंदै और खुशी रो सन्देश
शुणाउंदै थौ लागौ औन्दौ, ता बौडै
याजक, यहूदी शास्त्री, और स्याणै
लोग यीशु काए आशै, ² और बोलदैं
लागै, "आमुकै बोल, तू इणै काम केजै
हक्का कौरीयै कौरा ई? और सेऊ कुण
आ जुणीए ताउंके एऊ हक्क देंऔं
आ?" ³ यीशुए बोलौ, "हाऊं भी तुमु क
एक सवाल पुछा ऊ, तुमै भी तेथरो
जवाब देंऔं, ⁴ यहन्ना रो बप्तीसमा

सौरगा री तौरफा कु थौ या आदमी री
तौरफा कु थौ? ⁵ तैबे सै आपु मांडीयै
चौपडींदै लागै, "अगर आमै बोललै
परमेश्वरा री तौरफा कु दिआ थौ, तैबे
इणीए बोलनौं आ इणौं कि, तुमुए
तेस माथै विश्वास कैलै ना कियो?"

⁶ अगर बोललै आमै आदमी री तौरफा
कु तैबे ई लोग आमु डोलीयावा,
कैलैकि इयै ज़ाणा ई कि यहन्ना
भविष्यदवक्ता थौ। ⁷ तैबे तिउंए
यीशुलै जवाब देंऔं, 'आमै नाई ज़ाणादैं
कि सेऊ कासरी तौरफा कु थौ।

⁸ यीशुए तिउंलै बोलौ, "हाऊं भी तुमु
कै नाई बोलदौं कि हाऊं एजौं काम
केजै हक्का कौरीयै कौरा ऊ।

बुरै ज़ीमीदार रो औनैणौं

(मत्ती 21:33-46; मरकुस
12:1-12)

⁹ तैबे यीशुए लोगु कै एक औनैणौं
दैंऔं, "कि एकी आदमीए अंगुरा रो
बोंगीचौं लाऔं, और तेथरो ठेकौं
जिमदारु कै देइयै आपु डैंऔं भौरी
दिना लै परदेशा लै। ¹⁰ जैबे अंगुर
चोड़ने रो बोंगत आशौं ता तिणी
मालिके आपणौं एक नुकुर ज़ीमदारु
काए आपणै हिस्से मांगदैं भेजौं, पर
तिउं ज़ीमदारुए सेऊ नुकुर पिटौं और
तिदरु खाली हाथ भेजौं। ¹¹ तैबे तिणी
मालिके तौरे एक नुकुर भेजौं, पर
तिउं ज़ीमदारुए सेऊ भी पिटौं और
तेसरी बेइज़्जती कौरीयो सेऊ भी
खाली हाथ वापिस भेजौं। ¹² तैबे भेजौं
तिणीए चिजौं नुकुर, तैबे तिउंए सेऊ
भी पिटीयो घायल कियो और तिदरु
पोरु गाड़ौं। ¹³ तैबे तिणी बगीचै रे
मालिके आपणै जीवा दी सुंचौं, 'आबै
हाऊं का कौरुलै? आबै हाऊं आपणौं
गौरतौं छोहरु भेजाऊ, हुई सौका कि

सैं तेसरी इज्जत कौरा।¹⁴ पर जेबी तिउं जिमदारुए सेऊ मालिका रौ छोहरु देखौ ता सैं आपु मांझीए चौपडीं दे लागै, कि एऊ ता एस बौगीचै रौ हकदार आ। आशौ आमै एस पोरु झांगी ई, ताकी एऊ बौगीचौ आमारौ हुआ।¹⁵ तैबै तिउं जिमदारुए सेऊ मालिका रौ छोहरु बौगीचै कु बाइरै गाडीयौ पोरु झांगौ। आबै सेऊ मालिक तिउं जिमदारु आइलै का कौरा? ¹⁶ आशीयौ तिउं जिमदारु पोरु झांगा और अंगुरा रौ बौगीचौ ओरी लोगु कै सोंभाला। इणै शुणीयौ लोगुए बोलौ, परमेश्वर कौरा, कि इणौ केबी ना चाई हुआ।¹⁷ यीशुए तिउं लोगु भिलै देखीयौ बोलौ, "तैबै एऊ का सा लिखौ औन्दौ, "कि जेजौ पात्थर घौरा चाणनै वालै मिस्त्रीऊए बेकार ज़ाणीयौ पोरु शोटी गौ थौ, सेजौ पात्थर कुणे दी लागणे वालौ बौणौ।¹⁸ जुण-कुण तेस पात्थरा माथै लोटालौ सेऊ चूर-चूर हुआ, और ज़ास माथै पौडालौ सेऊ पात्थर सेऊ पिशीया पोरु पा

मामलै रै बारे दी सवाल
(मत्ती 22:15-22; मरकुस 12:13-17)

¹⁹ यहूदी शास्त्रीऊए और धर्म गुरुए जिणी ई एऊ ओनेणौ शुणौ, ता तिउंए यीशु पाकड़नौ चाओ कैलैकि सैं सौमझी गौरै थै कि एऊ औनेणौ आमू लै बोलौ आ, पर सैं लोगु कु डौरा थै।²⁰ और सैं एजै मौके देखदै लागै कि, केबडी एऊ इणी बूश बोला, कि जेजी बुशा दी एस फसाइयौ पाकड़ीलै। इणै कामा लै तिउंए आपणै दुई गुप्त आदमी भेजै तिउंरै भेषा दी।²¹ तिउंए यीशु कु पुछौ, 'ओ गुरु आमै ज़ाणी

कि तू बिल्कुल ठीक बोला ई और शिखावा ई, और कासी रौ पक्ष भी नाई कौरदौ। तुमै सौचचाई कौरियै परमेश्वरा री बाट देखाइ।²² तुमै इणौ बोलौ, का कैसर राजै लै मामलै दैणै रौ हक आमुकै आसती कि नाई?²³ यीशुए तिउंरी चालाकी सौमझी गो ई, और तिउंलै बोलौ,²⁴ "मुकै एक सिक्का देखा लौ और बोलौ, एस सिक्के दी कासरौ नाउं और फोटु आ छापोँ औदौ? तिउंए बोलौ रोमी बौडै राजै रौ।"²⁵ यीशुए बोलौ, "तैबै ठीक आ जो कैसर राजै रौ आ तेस कैसर राजै कै दैओ, पर जो परमेश्वरा रौ आ तेस सिर्फ परमेश्वरा लै दैओ।"²⁶ सैं लोगु रै सामनै एजी बुशा दी यीशु पाकड़ी ना बौला, और तेसरे जवाबा शुणीयौ चुटकचार थकै।

दुजी बारे जीऊणौ और शादी ब्याहौ
(मत्ती 22:23-33; मरकुस 12:18-27)

²⁷ तैबै सदुकी लोग जो इणौ मानाई कि जुण मौरा ई सैं जीऊंदै नाई हुन्दै, तिउं मांझीयै कु कुछ आदमीऊ ए यीशु काए आशीयौ पुछौ,²⁸ "ओ गुरु, मुसा गुरुए आमूलै इणौ लिखौ आ, कि अगर कासरौ भाई, शादी-शुदा औइयौ बिण औलादीए मौरा लौ, ता तेसरौ भाई तेसरी छेउडी आइलै शादी कौरालौ, और आपणै भाई कालै वंश पैदौ कौरा।²⁹ सात भाई थै, पैहलौ भाई शादी कौरियौ बिणा औलादीयै मौरा गौ आ,³⁰ तैबै दुजै भाईए तियां विधवा आइलै शादी की पर सेऊ भी बिणा औलादीए मौरा गौ,³¹ तैबै एक- एक कौरियै सारै भाईऊए तिए

विधवा आइलें शदी की और सारें बिणा औलादीए मौरी गौए।³² और बासीयें सैं विधवा भी मौरी पोरु?³³ आबे आम आइलें इणौ बोलौ, 'जैबे सैं सारें ज़ीउंदे औलें ता, तिया लै कासरी छेउडी बोला ई? कैलैकि तिउं साता भाईऊ ऐ तियां आइलें शदी की थी?'³⁴ यीशुए तिउं लै जवाब दैऔ, "शदी ता इयें धौतरी माथै आदमीऊ लै औआई।³⁵ पर आशणै वालै बौगतै, इणौ कुछ ना हुन्दौ। कैलैकि जो मौरै औन्दै मांझीया क जीउंदै हुणै लायक लोग ई; सेजै जुगा दी तिये ना ता आदमी शदी कौरदै और ना छेउडी शदी लै दैदैं।³⁶ और सैं तेथ बासीए केबी ना मौरदै। कैलैकि सैं परमेश्वरा रै दुता बाशीयें हुणे ई। ज़ीउंदै हुइयौ तिउंलै परमेश्वरा री सन्तान बोलाई।³⁷ पर मौरै औन्दै जीउंदै हुआई कि नाई, एथरै बारै दी शणौ; मुसा गुरुए भी ऐ बुशै साबित की आ, जैबै तिणीए तिउं झाडी रै बारै दी लिखौ जो तिणीए परमेश्वरा री बौरसाई ऐन्दी आगी कौरी ज़ौलदै देखी आ। और मुसा गुरु अब्राहमा रौ परमेश्वर, इसाहक और याकुबा रौ परमेश्वर कौरीयें औटावा थौ, जो कई साल पैहलै मौरी गौए थै।³⁸ और सेऊ जीउंदै रौ परमेश्वर आ, मौरै औन्देऊ रौ नाई भी नाई। परमेश्वरा काले सैं सारें जीउंदे ई।³⁹ तिये मौजूद यहूदी शास्त्रीऊ मांझीया कु काइएउए बोलौ, "गुरुजी तुमुए ठीक बोलौ।"⁴⁰ तेथ बासीयें कासरी री भी प्रभु यीशु क केजी बूश पूछणे री हिम्मत नाई रोई।

मसीह कासरो छोहर आ

(मत्ती 22:41-46; मरकुस 12:35-37)

⁴¹ तैबे यीशुए तिउंकु पूछौ, "मसीही लै दाऊदा री सन्तान कैलै बोलाई?"

⁴² कैलैकि दाऊदे आपु भजन सहिता री किताबी दी बोलौ आ, "प्रभरे मरै प्रभु लै बोलौ"

⁴³ मेरी सुलटी भीलै बोश, जेबी झाऊ हाऊ तैरै दुश्मनु तेरी लाता थालै ना कौरौ।"

⁴⁴ दाऊद ता तेसलै प्रभु बोला आ; तैबे मसीह दाऊदा री सन्तान किणौ हुई सौका?

यहूदी शास्त्रीऊ कु बौचीयौ रौएऊ

(मत्ती 23:1-36; मरकुस 12:38-40)

⁴⁵ जेबी सारै लोग बुशै शुणदै थै लागै औन्दै, तेबी यीशुए आपणै चलेऊ लै बोलौ, ⁴⁶ "इऊं यहूदी शास्त्रीऊ क बौचीयौ रौएऊ।" जासकै लाम्बै-लाम्बै जुइकै भीडीयौ घुमणौ आच्छौं लागा सा। जेबी सैं बज़ारा दी घुमा ई तिउंकै आच्छौं लागा कि लोग तिउं कै झकियौ ढाल कौरौ। धार्मीक खम्बली और ज़ीयें धाम दिआई तिये भी सैं चाहा ई कि आम आच्छी और पहली जागहा दी बोशाला तिये तिउंकै आच्छौं लागा आ।⁴⁷ पर सैं विधवा छेउडी रै धौर-बार लुटा ई और देखाउणा लै सैं काफी बौकता झाऊं प्राथना कौराई; इणै लोग भौरी बौडी सौजा पा ई।

गरीब विधवा री भेंट

(मरकुस 12:41-44)

21¹ जेजै बौगतै यीशु परमेश्वरा रै घौरा दी थौ, तेबी तिणीए सेठ आदमी पेटी दी आपणी भेंट पाइंदै देखौ।

² और तिणीए विधवा भी तियै भंटा री पेटि दी दुई दामड़ी पाइंदे देखी।

³ तैबे यीशुए बोलौ, "हाऊं तुमुलै सौच्चौ बोलौऊ कि इयें गरीब विधवै

सौंभी कु ज़ादी भेंट देई आ। ⁴ कैलैकि इऊं सौंभीयै ता आपणी भौरी कौमाई कु सिर्फ थोड़ी भेंट परमेश्वरा ले देई। पर इयें गरीब विधवै आपणी ज़िन्दगी री सारी कमाई भंटा दी पाई आ।

परमेश्वरा रै घौरा रै नाष हुणे रै बारे दी

(मत्ती 24:1-2; मरकुस 13:1-2)

⁵ जेबे कुछ चले परमेश्वरा रै घौरा रै बारे दी बुशै लाईंदे थै लागे औन्दै, कि एऊ घौर बांठणै पात्थरा कौरीयै और भंटा री देई ऐन्दी चिज़ा कौरीयै किणौ बांठणौ आ चाणौ औन्दौ। तैबे यीशुए बोलौ; ⁶ "इणै दीन आशणे ई जेजै दिना दी जो तुमै देखदे ई लागे औन्दै, इऊं मांझीया कु पात्थरा माथै पात्थर भी ना रौउणै। सब कुछ ढालीयौ नाष कौराई।

मुसीबत और कलेश

(मत्ती 24:3-14; मरकुस 13:3-13)

⁷ तैबे तिऊं चलेऊए यीशु कु पुछौ, "ओ गुरु" इणौ केबी हणौ आ? और इऊं बुशै पुरी औन्दी बारे का निशाण औआई? ⁸ यीशुए बोलौ, 'बौचीयौ रोएऊ तुमै कासी कु ठौगाइएऊ नाई। कैलैकि कई लोग मैरे नावां कौरीयै आशीयौ बोलाई कि हाऊं मसिहा ऊ सेजौ बौगत आशी गौ आ। तैबे तुमै तिऊं पिछ ना डेवेऊ। ⁹ जेबी तुमै शुणालै कि ज़ागहा-ज़ागहा दी लड़ाई-झौगडै ई हुन्दै लागौ औन्दै तेबी तुमै घौबराएऊ नाई। कैलैकि इयै बुशै पैहलै हणी ज़रुरी ई। तैबे भी सेजौ

बौगत आखरी नाई हुन्दौ। ¹⁰ तैबे यीशुए बोलौ, "एकी जाती रै लोग दुर्जी जाती रै लोगु रौ विरोध कौराई। एक देश दुजै देशा रौ विरोध कौरा।

¹¹ भौरी ज़ागहा दी बौडै-बौडै भुईंचल हणेई और ज़ागहा-ज़ागहा दी काल पौइने ई और बौडी बिमारी हणी। सौरगा दी डराऊंटी बुशै और बौडै-बौडै

निशाण परगट हणे ई। ¹² पर इऊं सब बुशै हणे कु पैहलै सै मैरे नावां रै कारण तुमु पाकड़ा ई और तंग कौरीयौ धार्मिक खम्बली दी निआं ई और ज़ेला दी पा ई, और राजेऊ और

जजा कारे निआंई। ¹³ एऊ तुमुके मैरे बारे दी गवाही दैणै रौ मौकौ औआ

सा। ¹⁴ और तुमै ज़वाब दैणा लै पैहलै कु अपने ज़ीवा दी तयारी नाई कौरनी

और ना फीकर कौरनी, ¹⁵ कैलैकि, हाऊं तुमुलै इणी बूढी दिआऊ और तुमारे मुआं कु इणी बूश बोलावा ऊ कि तुमारे कोई भी दुश्मन तुमारौ

सामनौ नाई कौरी बौलदौ, ¹⁶ इदरा ज़ाऊं कि तुमारे मां-बाब, भाई-भौगीयाल, और रिश्तेदार तुमारे गोश्टण भी तुमु पौकड़ावा ई और कई

ता झंगवा भी ई। ¹⁷ मैरे नावां रै कारण सारे लोग तुमु आइलै दुश्मनी

छाड़ाई। ¹⁸ तैबे भी तुमारे मुंडा रौ एक भी बाल बांगौ नाई औन्दौ। ¹⁹ और आपणी सौबरी कौरीयै तुमै आपणै

प्राण बचाई छाड़ा ई।

यरुशलेम नाष हुणै रै बारे दी बुशै

(मत्ती 24:15-21; मरकुस 13:14-19)

²⁰ जैबे तुमै यरुशलेम भौरी लोगु मांझीयै घरु औन्दौ देखालै तैबे तुमै सौमझेऊ कि तेसरै नाष हुणै रौ

बौगत आशणे वालौ आ। ²¹ तैबे जेजै लोग यहूदी परदेशा दी औलै तिऊंए बौचणा लै पहाड़ी दी जा डेऊणौ, और जुण औलै यरुशलेम शहरा बितै तिऊंए निकलेऊ बाइरै, और जुण औलै गांवा दी तिऊंए ना डेवेऊ शहरा लै।

²² कैलैकि एजे दीन बदला निणा रै दीन हणे ई। ताकी सै बुशै जो धर्म शास्त्रा दी लिखी ऐन्दी, सै सारी पुरी हुआ ई। ²³ सेजे दिना दी तिऊं छेऊड़ीऊ लै फिटकार जुण गौरकै जीवा री औली और जासकै दुधा पिणै वालै लोलडै औलै। कैलैकि सारी धौतरी माथै भौरी दुःख हणौ और इऊं लोगु माथै परमेश्वरा रै भौरी रोश आशणे ई। ²⁴ तिऊं तलवारी कौरीए झांगाई और सब देशा रै लोगु मांझीयै कैदी बाशी बानीयौ आणाई जेबी झाऊं दुजी ज़ाती रौ बौगत पुरौ ना हुआ लौ तेबी झाऊं यरुशलेम दुजी ज़ाती रै लोगु थालीए दबाउआ ई।

आदमी रै छोहरु रौ दुजी बारै आशणौ

(मत्ती 24:29-31; मरकुस 13:24-27)

²⁵ सूरज जून और तारेऊ दी निशाण दिशाई और धौतरी दी सारै लोगु माथै मुसीबत आशणी आ। कैलैकि सै समुन्दरा रै छालै और शोरा कौरीए डौराई। ²⁶ दुनीया दी आशणे वाली मुसीबत पौखदै-पौखदै लोगु रै जीऊ घौबरा ई। कैलैकि सौरगा री सारी शक्ति हिलाईआ ई। ²⁷ तैबे लोग मं, जुण परमेश्वरा री तौरफा क भेजौ औन्दो ऊ पुरी शक्ति और बौडै शाना कौरीयै बादला माथै आशदै देखा ई।

²⁸ जैबे इणौ हुन्दै लागा लौ तैबे तुमै खौडै हुईयौ सौरगा भीलै देखेऊ कैलैकि तेबी तुमारौ छुटकारौ हणौ आ।

फेडु रै पेड़ा रौ औनैणौ

(मत्ती 24:32-35; मरकुस 13:28-31)

²⁹ यीशुए तिऊंके एक औनैणै देईयौ बोलौ, "फेडु रौ पेड़ा और सारै पेड़ा देखौ, ³⁰ जैबे तिऊंदी मिण्डु निकलाई तैबे तुमुकै तिऊं देखीयौ पौतौ लागा कि आबै गौरमी आशणे वाली आ।"

³¹ तिणी जेबी तुमै इऊं मुसीबता री बुशै औन्दै देखा लै तैबे तुमै सौमझेऊ कि परमेश्वरा रौ राज आशणे वालौ आ। ³² हाऊं तुमुलै सौच्चौ बोलाऊ कि जेबी झाऊं ए सारी बुशै पुरी ना औली, "तेबी झाऊं एजी पिड़ी रौ नाष नाई औन्दौ।" ³³ सौरग और धौतरी टौली सौका ई पर मेरी बुशै केबी ना टौलदी।

उज्जी रौएऊ

(मत्ती 24:36-44; मरकुस 13:32-37)

³⁴ शुणौ ऊज्जी रौएऊ इणौ ना चाई हुआ कि तुमारौ जीऊ बुराई क, शराबी और जीन्दगी री फिकरा कौरी सुस्त पौड़ा और सेजौ दीन तुमुलै फाई बाशीयै खरकचार आशा। ³⁵ कैलैकि सेजौ दीन धौतरी माथै सब रौड़णै वालेऊ मांझीयै इणै कौरी खरकचार आशणौ आ। ³⁶ शुणौ ऊज्जी रौ और हर बौगतै रोज प्राथना कौरदै थाकौ लागी ताकी तुमै इऊं सारी मुसीबता क बौचणै और आदमी रै छोहरु रै सामनै

खौड़ी औणें जोगी बौणा।³⁷ यीशु हर दिना दी परमेश्वरा रै घौरा दी शिक्षा दिआ थौं और राची लै डिआ थौं जेतूना री पहाड़ी दी रौइंदें।³⁸ और दोउत राची सारै लोग उठीयौं यीशु री शिक्षा शुणदें परमेश्वरा रै घौरा दी यीशु काए आशा थै।

यीशु रै खिलापा दी चौपड़ीणौं

(मत्ती 26:1-5; मरकुस 14:1-2;
यहन्ना 11:45-53)

22¹ बिण संजेड़े री रोटी रौं साजौं, जेथरी शुरुआत फसह रै साजौं कु औआ थीं, सेऊ साजौं नौजदीक आशौं गौं आ।² सेजै बौगतै मुख्य याजक लोग और यहदी शास्त्री यीशु पाकड़नै और झांगणै रौं मौकौं लोइदें थै लागै औन्दें, पर सै लोग कु डौरा थै।

यहदा रौं विश्वासघात

(मत्ती 26:14-16; मरकुस
14:10-11)

³ तैबे शैतान यहदा भीतै आशौं, जासलै इस्करियोती बोला थै और सेऊ यीशु रै बारह चलेऊ मांझीयै कु एक थौं।⁴ सेऊ महायाजकु और परमेश्वरा रै घौरा रै चोकीदारु रै मुख्य काए डैऔं। ताकी यीशु पाकड़नै रै तरीका रै बारे दी चौपड़ा।⁵ वे भौरी खुश हुए, और तेसलै इनाम दैणै रौं वाइदौं भी कियौं।⁶ यहदा सेजी बुशा लै तैयार हई गौं, और तेभी कु सेऊ यीशु पकड़ाउणा री ताकी दी रौं, कि जेबी यीशु काए भौरी भीड़ ना औली, सेजै बौगतै सेऊ, यीशु पौकड़ाई बौला।

चलेऊ आइलै आखरी बार फसह री
रोटी खाणी

(मत्ती 26:17-25; मरकुस
14:12-21; यहन्ना 13:21-30)

⁷ तैबे बिणा संजेड़े री रोटी रै साजै रौं दीन आशौं जेबी यहदी लोगु रै हर टबर फसह रै गाबडु रौं बली चड़ावा थै।⁸ यीशुए पतरस और यहन्ना इणै बोलीयौं भेजे कि, "डैऔं आमारे फसह री रोटी खाणै रौं इन्तजाम कौरौं।"

⁹ चलेऊए यीशु कु पुछौं, 'गुरु जी तुमै किये चाहा ई कि आमै साजै री रोटी रौं इन्तजाम कौरौं?'¹⁰ यीशुए तिऊलै बोली, "देखौं शहरा दी पौउंचीयौं तुमके एक आदमी मिला काछा माथै पाणी री बोटलोई कौरौं डेउंदें लागौं औन्दौं, जेजे घौरा दी सेऊ डिआ लौं, तुमै भी तेस पिछु सेजे घौरा दी डेवेऊ।"

¹¹ और तेस घौरा रै स्याणै लै बोलेऊ; गुरु ताऊलै इणौं बोला कि मुकालै तैयार कियौं औन्दौं कौमरौं केजौं आ? जिंयै हाऊ आपणै चलेऊ आइलै फसह री रोटी खाऊ।"¹² तैबे सेऊ तुमके माथली मंजली दी सजाओ औन्दौं कौमरौं देखाला, तिये तुमै फसह री रोटी रौं इन्तजाम कौरैऊ।¹³ तैबे जिणौं यीशुए तिऊलै बोलौं थौं, तिऊं चलेऊए तिये डेईयौं तिणौं देखौं, और तिऊंए तिये फसह री रोटी तैयार की।

प्रभु भोज

(मत्ती 26:26-30; मरकुस
14:22-26; 1 कुरिन्थियों
11:23-25)

¹⁴ जेबी रोटी खाणै रौं बौगत आशौं ता यीशु आपणै बारह चलेऊ आइले रोटी खान्दै बोशौं।



यीशु चलेउ आइलै आखरी बारै रोटी खा आ 22.14

¹⁵ तैबे यीशुए तिऊलै बोलौ, "मेरी बौड़ी इच्छा थी कि हाऊं दुःख भोगणे कु पहलै तुमु आइलै बोशीयौ एजे फसह रोटी खाऊ।" ¹⁶ कैलैकि हाऊं तुमुलै बोलाऊ, "कि जेबी झाऊं इयै बुशै परमेश्वरा रे राजा दी पुरी नाई औआली, तेबी झाऊं हाऊं इयै फसह री रोटी केबी ना खान्दौ।" ¹⁷ तैबे यीशुए अंगुरा रे रसा रौ खोरु चुंगौ और परमेश्वरा रौ धन्यवाद की इयौ, आपणै चलेऊ लै देइयौ बोलौ एस आपु मांझीयै बांटौ। ¹⁸ कैलैकि हाऊं तुमु लै बोलाऊ कि जेबी झाऊं परमेश्वरा रौ राज नाई आशा लौ तेबी झाऊं हाऊं अंगुरा रौ रस केबी ना पिन्दौ। ¹⁹ तैबे यीशुए रोटी चुंगी और परमेश्वरा रौ धन्यवाद कौरीयौ चोडी और इणै बोलीयौ आपणै चलेऊ के देई कि इयौ मेरो जीसम आ जो तुमुलै दैऔ औन्दौ, मुं याद कौरना लै इणौ कौरैऊ।" ²⁰ इणै कौरीयै रोटी खाइयौ यीशुए अंगुरा रे रसा रौ खोरु भी इणै बोलीयौ दैऔ, "एस अंगुरा रौ रस तुमै मेरो लोऊ सौमझौ जो भौरी लोगु तिऊरै पापा कु बौचाऊणा लै बौइणै वालौ आ। मेरे मौरनै कु परमेश्वर लोगु आइलै एक नौएँ रिशै रौ वादौ पाकौ कौरा आ।" ²¹ पर देखौ मुं पौकड़ाउणै वालौ इदै आ आमु आइलै रोटी खान्दै लागो औन्दौ। ²² कैलैकि हाऊं जुण परमेश्वरा री तौरफा कु

भेजौ औन्दौ ऊ मेरो मौरनौ ता इणी भी आ, जिणौ धर्मशास्त्रा दी आ लिखौ औन्दौ। पर फिटकार आ तेस आदमी लै जुण मुं पकड़ावा आ।

²³ तैबे सै चेलै आपु मांझीयै एकी दुजे कु पछदै लागै कि आमु मांझीयै कुण औलौ जुण इणै काम कौरा?

चलेऊ रौ वाद-विवाद, बौड़ौ कुण आ?

²⁴ तैबे तिऊरौ ज्ञागडौ भी हुऔ कि आमु मांझीयै कु बौड़ौ कुण आ?

²⁵ यीशुए तिऊलै बोलौ, "दुजी ज्ञाती रे राजे आपणै लोगु माथै राज कौराई, और तिऊं माथै हक्क छाड़ाई, और सै तिऊलै फाइदै वालौ बोलाई।" ²⁶ पर तुमै इणौ ना बोलेऊ, जुण तुमु मांझीयै बौड़ौ आ तिणीयै छोटौ बौणनी, और जुण आ परधान तिणीए बौणनी सेवा कौरनै वालौ। ²⁷ कैलैकि बौड़ौ कुण आ सेऊ जुण रोटी खान्दै आ बोशौ औन्दौ या सेऊ जुण तिऊरी सेवा कौरदै आ लागौ औन्दौ? का सेऊ नाई जुण रोटी खान्दै आ बोशौ औन्दौ? और हाऊं तुमु मांझीयै सेवा कौरनै वालै जीणो ऊ। ²⁸ और तुमै भी मुं आइलै परखणै रे बौक्तै दी सदा रौरे ई। ²⁹ जिणौ मेरे बाबै परमेश्वर मुकालै राज दैऔ औन्दौ तिणी हाऊं भी तुम कालै राज दिआऊ। ³⁰ ताकी तुमै मेरे राजा दी मुं आइलै बोशीयौ खा पिआलै और राजगादी माथै बोशीयौ इसायला रे बारह गोत्रा रे लोगु रौ फैसलौ कौरा।

पतरसा रे मुकरनै री भविष्यवाणी

(मत्ती 26:31-35; मरकुस

14:27-31; युहन्ना 13:36-38)

³¹ प्रभुए बोलौ, 'शमोन! ओ शमोन, "देख शैतानै तुमै गीऊं बाशी छांटणा

लै मुक मांगी गौरे।³² पर मुयै तैरे बारे दी परमेश्वरा क औरज कौरी एरी आ ताकी तैरौ विश्वास न खत्म ना हुआ। और जेबी तू पौरखणै बासियै, वापिस आशा लौ तैबी आपणै भाईऊ भी विश्वासा दी मजबूत कौरा।

³³ शमौनै यीशलै बोलौ, "प्रभ हाऊं ताऊं आइलै जैला ई डेरुणा लै और मौरना लै भी तैयार ऊ।³⁴ यीशुए शमौना लै बोलौ, "हाऊं ताऊं लै बोलाऊ कि आज राची कुखडै रै बाशणे कु पैहलै आपणै मुंआ कु चिआ बारै बोला ई कि तू मुं नाई ज़ाणदौ।

बटुआँ, झोलौ और तलवार

³⁵ तैबै यीशुए आपणै चलेऊ क पछा, "जेबी मुयै तुमै बिण बटुएँ, बिण झोलै, और बिण बटै भेजै थै का तुमुलै केजी चिजा री कामी हुई आ?" चलेऊए बोलौ! केजी चिजा री नाई।"³⁶ यीशुए तिऊलै बोलौ, "पर आबे जासकै बटुवौ औलौ सेऊ आपकै निआलौ, झोलौ भी निओ, और जासकै तलवार नाई औली सेऊ आपणै जुड़कै बेचीयो खरीदा लौ।

³⁷ कैलैकि हाऊं तुमुलै बोलाऊ, 'जो धर्मशास्त्रा दी आ लिखौ औन्दौ कि सेऊ बुरै आदमीऊ आइलै गिणुओ औन्दौ सेऊ मुलै पुरौ हणौ जरुरी आ, कैलैकि मैरे बारे दी लिखी ऐन्दी बुशै पुरी औणै वाली आ।³⁸ चलेऊए बोलौ, "देख इदै दुई तलवारी ई, यीशुए बोलौ मोकती ई।"

जैतुना रै पहाड़ी माथै यीशु री प्राथना
(मत्ती 26:36-46; मरकुस 14:32-42)

³⁹ तैबै यीशु तेस कमरै क निकलीयो रोज के जीणौ जैतुन नावां री पहाड़ी माथै डैओ, और तेसरै चेलै भी तेस

आइलै चाल पौड़ै।⁴⁰ तियै पौंउंचीयो यीशुए आपणै चलेऊ लै बोलौ, "प्राथना कौरदै थाकौ लागी ताकी तुमै मसीबता दी ना पौड़ा"⁴¹ सेऊ चलेऊ के थोड़ौ दूर डैओ और धौनी घुंड़ै माथै टेकियो प्राथना कौरदै लागौ,

⁴² "ओ बाब, अगर तू चाह ई ता, मकाए क एस दुःखा रौ खोरु पोरु निऊं। तैबै भी मेरी नाई तुमारी मर्जी पुरी चाई हुई।⁴³ तैबै सौरगा कु एक दूत परगट हुओ, और तिणीए यीशुलै शक्ती देई।⁴⁴ यीशु भौरी दुःखी हुईयो प्राथना कौरदै लागौ, यीशु रै जीवा रौ दुःख एती बौड़ी गौ कि तेसरौ पसिनौ मानौ लोऊ रै टिपु बाँणीयो जौबिना माथै पौड़ै लागौ।⁴⁵ तैबै यीशु प्राथना कौरीयो उठौ और आपणै चलेऊ काए आशौ पर निराशा रै कारण यीशुए सै चेलै सुतै औन्दै देखै।⁴⁶ यीशुए तिऊलै बोलौ, "तुमै कैलै ई सुतदै लागै औन्दै? "उठौ और प्राथना कौरौ" नाई ता मुसीबता ई पौड़ा ई।"

यीशु धोखे दी पाकुड़नौ

(मत्ती 26:47-56; मरकुस 14:43-50; युहन्ना 18:3-12)

⁴⁷ जेबी यीशु प्राथना रै बारे दी थौ बोलदै लागौ औन्दौ, तेबी लोग री बौड़ी भीड़ तियै पौंउंची गो ई। तिऊं बारहा चलेऊ मांझीया क एक चेलौ जासरौ नाऊं यहदा थौ, तिऐं भिड़ा क औगाड़ी-औगाड़ीयै थौ आपडदै लागौ औन्दौ। यहदा यीशु खोबीयाऊंदै यीशु काए आशौ।⁴⁸ यीशुए तेसलै बोलौ, "ओ यहदा का तू खोबु देइयो आदमी रौ छोहरु पौकड़ावा ई?"⁴⁹ यीशु रै साथीऊ ऐ जैबै देखौ कि का हणै वालौ आ, यीशु लै बोलौ "का आरमै तलवार चलाउलै?"⁵⁰ तिऊं मांझीयै कु एकीए

बौड़े याजका रै नुकरा दी तलवारी री लाई और तेसरौ सुलटौ कौन्थु काटौ।"

⁵¹ तेथ माथै यीशुए बोलौ, "बस आबै नाई कौरौ इणौ।" और यीशुए तेस नुकरा रौ कौन्थु छुंओ और चांगौ कियो। ⁵² तैबै यीशुए परधान याजकु और परमेश्वरा रै घौरा रै चोउकीदारू रै मुखयै और स्याणेऊ लै बोलौ, जुण यीशु पाकुड़दै थै आशै औन्दै," का तुमै डाक सौमझीयौ तलवारी और डिगै कौरौए ई मुं पाकुड़दै आशै औन्दै?

⁵³ जेबी हाऊं परमेश्वरा रै घौरा दी हर दिना दी तुमु आइलै थौ तेबी ता तुमुए हाऊं पाकुड़दौ नाई; पर एजौ तुमारौ बौगत आ, और नयारै रौ हक आ।"

पतरसा रौ मुकरनौ

(मत्ती 26:57-58, 69-75; मरकुस 14:53-54, 66-72; युहन्ना 18.12-18, 25-27)

⁵⁴ तैबै तिऊंए यीशु पाकुड़दौ बौड़े याजका रै घौरै निऑ। और पतरस यीशु पिछु दूर-दूर थौ आण्डदै लागौ औन्दौ। ⁵⁵ चोकीदारुए याजका रै गौडा दी आग जाली और फिदीआलै बोशी गौए, पतरस भी तिऊं मांझीए आशीयौ बोशी गौ। ⁵⁶ एकी नुकराणीए आगी रै प्याशे दी पतरस देखौ और तेसलै बोलौ, "एऊ भी ता यीशु आइलै साथै ई थौ।"

⁵⁷ पर पतरसै तिआं लै इणै बोलीयौ इनकार कियो, "ओ बौड़ण हाऊं ता एस नाई ज़ाणदौ।"

⁵⁸ थोड़े बौगता बासीयै तौएँ एकी आदमीए पतरसा देखीयौ बोलौ, "तू भी ता तिऊं मांझीया क ई; पतरसै बोलौ, "ओ भाई, हाऊं नाई ऊ।"

⁵⁹ करीब एकी घन्टै बासीयै तौएँ एक आदमी काठै कौरौयै बोलदै लागौ, "एऊ भी ज़रुर यीशु आइलै थौ, कैलैकि एऊ गलीली आ।" ⁶⁰ पतरसै बोलौ, "ओ भाई, हाऊं नाई ज़ाणदौ कि तु का ई बोलदै लागौ औन्दौ।" और सेऊ बोलदै ई थौ लागौ औन्दौ कि तेबी कुखड़ौ बाशौ। ⁶¹ तैबै प्रभु यीशुए पतरसा भीलै मुड़ीयौ देखौ और पतरसा कै सै बुशै याद आशी गो ई, जो यीशुए पतरसा लै बोली थी कि, "आज कुखड़े री बाचा देणै क पैहलै चिया बोरै तू मैरौ इनकार कौरा ई।" ⁶² सेऊ बाइरै डेइयौ डीकरी-डीकरीयौ लेरदै लागौ।

यीशु री बेइज्जती

(मत्ती 26:67-68; मरकुस 14:65)

⁶³ आबै जुणी चोकीदारुए यीशु पाकुड़दौ औन्दौ थौ, सै यीशु री मज़ाका उड़ाइयौ यीशु पिटदै लागे। ⁶⁴ और यीशु री आंखी माथै हाथा लाइयौ पुछदै लागै कि, "भविष्यवाणी कौरौयौ बोल कि ताउंदी कुणीए लाई आ।" ⁶⁵ और तिऊंए यीशु री भौरी बेइज्जती की और यीशु रै विरोधा ई भौरी बुशै बोली।

बौड़ी खुम्बली दी यीशु

(मत्ती 26:59-66; मरकुस 14:55-64; युहन्ना 18:19-24)

⁶⁶ जैबै दुजौ दीन हुआ तैबै लोगु रै स्याणै, परधान याजक और यहूदी शास्त्री कौठै हुए और यीशु आपणी खुम्बली दी आणीयौ तेसकु पुछदै लागै, ⁶⁷ "अगर तु मसीहा ई ता आमु आइलै बोल।" यीशुए तिऊंलै बोलौ, "अगर हाऊं तुमु आइलै बोलुलै ता तुमै विश्वास नाई कौरदै; ⁶⁸ और

अगर पुछुलै, ता तुमुए ज़वाब ना देंगौ।⁶⁹ पर इबी कु आदमी रौ छोहरु जो सौभी कु शक्ती वालौ आ, परमेश्वरा री सुलटी भीलै बोशी थाका सा।⁷⁰ एजी बुशा माथै सारेऊ ए बोलौ, "तैबे का तू परमेश्वरा रौ छोहरु ई?" यीशुए तिऊलै बोलौ, "तुमै ठीक ई बोलाई कैलैकि हाऊ परमेश्वरा रौ छोहरु ऊ।"⁷¹ तैबे तिऊए बोलौ, "आमुकै आबै तौँए गवाही री जरूरत नाई आसती कैलैकि आमुए आपु ई एसरै मुआ कु बोलदैं शुणी गौ आ।"

पिलातुसा कारे यीशु

(मत्ती 27:1-2, 11-14; मरकुस 15:1-5; युहन्ना 18:28-38)

23¹ तैबे सारी खुम्बलीउए उठीयो यीशु पिलातुसा कारे नीँओ जो रोमी सरकारा रौ हाकीम थौ।² सै तेभी यीशु माथै इलजाम लाइंदै लागै, कि "एउ आदमी आमारे लोगु बहकाऊंदै लागौ औन्दौ। और रोमी कैसरा के मामलै देणा लै मना कौरा और आपुलै मसीहा, राजौ बोला।³ पिलातुसै यीशु कु पुछौ, "का तू यहूदी लोगु रौ राजौ ई?" यीशुए तेसलै ज़वाब देओ, "तू आपु ई बोलदैं लागौ औन्दौ।"⁴ तैबे पिलातुसै परधान याजक और लोगु लै बोलौ, "मुकै एस आदमी दी केजी भी गौलती नाई दिशदी।"⁵ पर सै खुम्बली रै लोग सौखती कौरा बोलदैं लागै, "एऊ गलील परदेशा कु इदैं ज़ाऊं और सारै यहूदिया देशा दी परचार कौरियो लोगु बहकाऊंदै लागौ औन्दौ।"⁶ इणै शुणियो पिलातुसै पुछौ, "का एऊ आदमी गलीली आ?"⁷ इणै ज़ाणियो कि एऊ हेरोदेसा रै परदेशा रौ आ तैबे सेऊ हेरोदेसा कारे

भेजी ऐरौ आ, कैलैकि हेरोदेस सेजै बौकतै यरुशलेमा दी थौ।

हेरोदेसा कारे यीशु

⁸ हेरोदेस यीशु देखियो भौरी खुश हओ, कैलैकि तिणीए यीशु रै बारे दी शुणी थौ सेऊ तेस और तेसरै चमत्कार देखणै चाह थौ।⁹ हेरोदेस यीशु कु भौरी सवाल पुछदैं थौ लागौ औन्दौ, पर यीशुए तेसलै कुछ भी ज़वाब नाई देओ।¹⁰ परधान याजक और शास्त्री खौडै हुइयो यीशु माथै तौना मौना कौराए झुठे आरोप थै लाईदैं लागै औन्दै।¹¹ तैबे हेरोदेस आपणै सिपाईउ आइलै यीशु री बेइज़्जती की और मज़ाक उड़ाओ, और चोगै-बोगै भिड़ाइयो पिलातुसा कारे बापिस भेजौ।¹² हेरोदेस और पिलातुस जो पहलै एकी दुजै रै दुश्मन थै, सेजै दिनै सै गोश्टण बौणी गोए।

पिलातुस यीशु लै झांगणा री आज्ञा देआ सा
(मत्ती 27:15-26; मरकुस 15:6-15; युहन्ना 18:39-19:16)

¹³ पिलातुसै परधान याजक, धौर्मा रै गुरु और सारै लोग आपु कारे औटाए और तिऊलै बोलौ,¹⁴ "तुमुए एऊ आदमी बहकाऊणै वालौ चाणियो मुकारे आणौ आ, और देखौ, मुंयै तुमुकारे एउ पुछौ और पौरखौ, पर जैजी बुशा रौ तुमै एस माथै आरोप ला ई सेजी बुशे रै बारे दी मुंयै कुछ भी ना देखौ;¹⁵ और ना हेरोदेसै कैलैकि तिणीए एऊ यीशु मुकारे वापिस भेजी गौ आ, और देखौ इणीए कुछ भी नाई कियो कि हाऊ एसलै मौरनै री सौजा देऊ।¹⁶ एथीलै हाऊ एस पिटाइयो पोरु छाड़ाऊ।

17 (पिलातुस साजें रें बौकतें तीउंकालें एक कैदी छाड़ना लें मजबूर थौं और तादु बाटें साजौं नजदीक थौं) ^h

18 तैबे सारें मीलियो जौरें-जौरें बोलदें लागें, "एसरी काम खात्म कौरों आम कालें बरअब्बा नांवा रौ कैदी छाड़ौ।"

19 बरअब्बा यरुश्लेम शहरा दी लोगु पिटाऊणें और खुना रें केसा दी कैदा

दी थौं पाओ औन्दौ। ²⁰ पर पिलातुस

यीशु छाड़ना री ताइंरे भीड़ा रें लोग तौणें समझाए, ²¹ पर भीड़ा रें लोग

चिल्लांदे थाकें लागी और बोलदें लागें कि, "यीशु कूसा माथें चौड़ाओ कूसा

माथें।" ²² पिलातुस चोजी बारें तौणें

बोलौ। "कैलें इणींए का बुराई की आ? मुयें झांगणें री आज्ञा लायक केजी

भी बूश एसदी नाई देखी। एथीलें हाऊं एस पिटाइयौ पोरु छाडाऊ।" ²³ पर सैं

जौरें-जौरें चिल्लाइयौ पिछें पौड़ी गोए कि एऊ कूसा माथी चाईं चौड़ाउओ।

और तिऊं रौ चिल्लाणौ पिलातुसा माथें भारी पौड़ी गौं आ। ²⁴ और

पिलातुस आज्ञा देई, जिणौ भीड़ लागी एन्दी बोलदें तिणौं कौरों। ²⁵ तिणींए

सेऊ आदमी जो खून और आदमी पिटाउणा रें केसा दी जेलाइ थौं पाओ औन्दौ और जो भीड़ा रें लोगुएं मांगौं,

सेऊ छाड़ी गौं, और यीशु भीड़ा रें लोगु कें देई ऐरौ जिणौं सैं चाह थै।

यीशु कूसा माथें चौड़ाउणौं

(मत्ती 27:32-44; मरकुस 15:21-32; युहन्ना 19:17-27)

²⁶ जैबे सैं यीशु निंदें थैं लागें औन्दें, तैबे तिऊं भिड़ा रें लोगुएं एक शमौन नांवा रौ आदमी पाकड़ौं जुणु कुरैन

देशा रौ रौइणें वालौं थौं, तेसकु कूस चुंगाओ और बोलौं यीशु पिछु आइ।

²⁷ लोगु री बौड़ी भीड़ यीशु पिछु हई गौं ई और तिऊं मांझीयें भौरी छैउड़ी भी थी, जुणु यीशु लें हिकडें

पिटी-पिटीयौं लेरा थी। ²⁸ यीशुएं तिऊं छैउड़ी भीलें मडीयौं बोलौं, "ओ

यरुश्लेमा री छोटीयो, मुलें नाई लेरौं, पर आपणेऊ लें और आपणें छोहरु लें

लेरौं। ²⁹ कैलेंकि देखौं, सैं दीन आशणें वालें ई जेजें दिना दी लोग बोला

लें, भौली सैं मां जासरें लोलडें ना हुरे, और सेऊ गौरब जासकु छोहरु

ना हुरे, और सैं चुपली जुणीयें दूध नाई पयाओ।" ³⁰ सेजें बौगते "सैं धारा

टिरा लें बोला लें आमु माथें ढौलौं, और टिबु लें बोलालें आमु चोराओ।"

³¹ कैलेंकि जैबे सैं हौरें पेड़ा आइलें इणो कौराई ता शुके पेड़ा आइलें

का कुछ ना कौरालें?" ³² यीशु आइलें झांगणा लें दुई आदमी ओर भी निरें

जो भौरी अपराधी थैं। ³³ जैबे सैं सेजी जागहा दी पौंउचें जेजी जागहा लें


खोपडी री जागहा बोला थैं, तियें यीशु और सैं बुरें आदमी, एक यीशु री

सुलटी भिलें और दुजौं उलटी भिलें कूसा माथें चौड़ाई गौरें।

³⁴ तैबे यीशुएं बोलौं, "ओ बाब इऊं माफ कर,

कैलेंकि इयें नाई यीशु कूसा माथें 23.33

जाणदें कि इयें का ई लागें ओन्दें कौरदें।" और तिऊंए पर्चीं पाइयौं यीशु रें जुडकें बांटी



गौरे।³⁵ लोग खौड़ै-खौड़ै देखदै थै लागै औन्दै, और धर्मा रै गुरु भी मज़ाक कौरीयो बोला थै; इणीए दुजै बौचाए ई, अगर एऊ परमेश्वरा रौ मसिहा, और चुनौ औन्दौ आ, ता आपु ता बौचीयो देख।³⁶ और सिपाईऊ ए भी नजदीक डेड़यो यीशु रौ मज़ाक उड़ाओ और पिणा लै कौडुए अंगुरा रौ रस दैओ, और जोरै औटाड़यो बोला थै,³⁷ "अगर तू यहुदिया रौ राज़ो ई, ता आपु ता बौच।"³⁸ और यीशु रै मंडा माथै क्रुसा दी एक तौकती भी थी लाई ऐन्दी, जेथदी इणौ थो लिखौ औन्दौ, "एऊ यहुदिऊ रौ राज़ो आ।"

मन बदलनै वालो पापी

³⁹ जुण दुई कैदी यीशु री उलटी और सुलटी भिलै थै क्रुसा माथै चौड़ाए औन्दै, तिऊं मांझीए कु एकीए यीशु री बेइज़्जती कौरीयो बोलौ, 'का तू मसिह नाई ई? आपु भी बौच और आम भी बौचाऊ।'⁴⁰ एजी बुशा माथै दुजै कैदीयै तेसलै डांटीयो बोलौ, का तू परमेश्वरा कु भी ना डौरदौ? तू भी ता सेज़ी सज़ा भुगतदै ता ई लागौ औन्दौ।⁴¹ और आमै ता कानुना कौरीए सौजा पाइंदै लागै औन्दै, आमलै ता आपणै बुरै कामा री सज़ा मिलदै लागी ऐन्दी, पर इणीए ता केज़ौ भी बुरौ काम नाई कियो।⁴² तैबे तिणीए यीशु लै बोलौ, "ओ यीशु जी, जेबी तू आपणै राज़ा दी आशा लौ ता मैरौ ध्यान भी छाड़ै।"⁴³ यीशुए तेसलै बोलौ, "हाऊं ताऊंलै सौच्यौ बोलाऊ, कि आज ई तू मुं आइलै सौरगा दी औआई।"

यीशु रै प्राण छाड़नै

(मत्ती 27:45-56; मरकुस 15:33-41; युहन्ना 19:28-30)

⁴⁴ दुसकौ बोगत हुई गौ आ। बारह बाजै कु चिआ बाजै झाऊं सारै देशा दी निआरौ पौड़ी रौ।⁴⁵ सुरजा रौ प्याशौ भी बन्द हुआ, और परमेश्वरा रै घोरा रौ पौरदौ बौचा कु चिरुईयो दुई भिलै हुआ।⁴⁶ तैबे यीशुए जोरै बोलौ, "ओ बाब, हाऊं आपणौ आत्मा तैरै हाथा दी सोम्भाला ऊ।" एती बोलीयो यीशुए आपणै प्राण छाड़ै।

⁴⁷ जैबे रोमी सिपाईउ रौ आफसर इणौ सारौ देखदै थो लागौ औन्दौ तैबे तिणीए परमेश्वरा री बौड़ाई कौरीयो बोलौ, "सौच्यी एऊ आदमी धर्मा थी।"

⁴⁸ भीड़ा रै सारै लोग जो यीशु री क्रुसा री सौजा देखदै थै आशै औन्दै सै भौरी दुःखी हुईयो और आपणै हिकडै पिटियो आपणै घौरै डेई गौ रे।⁴⁹ पर यीशु रै जाणनै वालै जास आईलै गलील इलाके री छेउड़ी भी थी आशी ऐन्दी, सै दूर खौड़ी हुईओ इणौ सारौ कुछ थी देखदै लागी ऐन्दी।

यीशु रौ मौड़ौ ओडाची दी छाड़नौ

(मत्ती 27:57-61; मरकुस 15:42-47; युहन्ना 19:38-42)

⁵⁰ तिये एक युसुफ नावां रौ आदमी थौ, सेऊ यहुदी फैसलै कोरनै वाली खुम्बली रौ एक नेतौ थौ, सेऊ आच्छौ और धर्मा थौ।⁵¹ सेऊ तिउरी सलाह और इणै कामा से राजी नाई थौ। सेऊ यहुदिया रै इलाके अरिमतिया रौ रोइणै वालौ थौ, और सेऊ परमेश्वरा रै राज़ा आशणे री आशी दी थौ।

⁵² सेऊ पिलातुसा काए डैओ और

क्रिया कर्म कौरना लै यीशु रौ मौड़ो मांगो; ⁵³ और युसुफे यीशु रौ मौड़ो, क़सा क उतारीयो मखमला री चादरी दी मेटो और एकी ओडाची दी छाड़ो जो डोके दी थी खोदीयो चाणी ऐन्दी तेथदी पैहलै कोई भी नाई थो छाड़ो औन्दो। ⁵⁴ एजो बौगत तैयारी रै आधे दिना बासीयै रौ थो और आरामा रौ दीन शुरू हुणे वालो थो। ⁵⁵ तिऊं छेउड़ीऊए जौ यीशु रै पिछाड़ी-पिछाड़ीयै आशी थी तिऊंए सै ओडाची देखी और इणो भी देखो कि एऊ मौड़ो किणै तरिके कौरीए छाड़ो औन्दो। ⁵⁶ तैबे सै छेउड़ी आपणे घोरै डेई और यीशु रै मौड़ो दी लाइणा लै खुशबुदार चिजै और मैहंगे वालो तेल कियो। पर जैबे तिऊंके यीशु रै मौड़ो दी लाइणा लै सारी चिजै तैयार हुई, तेथ बासीयै आरामा रौ दीन शुरू हुई गौ आ। और तिऊंए परमेश्वरा री आज्ञा कौरीए पूरे दिना दी आराम कियो।

प्रभु यीशु रौ जीउंदो हुणो

(मत्ती 28:1-10; मरकुस 16:1-8; युहन्ना 20:1-10)

24 ¹ पर सप्ताह रै पैहलै दिनै दोउत राची सै छेउड़ी जुणीयै खुशबुदार चिजै और मैहंगो तेल तैयार कियो थो, तिऊं चिजु कौरीयै ओडाची कारे आशी। ² तिऊंए सेऊ पात्थर, जो ओडाची रै दारा दी थो लाओ औन्दो एकी भिलै घिसरो औन्दो देखो।



ओडाची रौ पात्थर घिसरो औन्दो
24.2

³ तैबे सै बितरै डेई पर तिऊंए यीशु रौ मौड़ो तिए नाई देखो। ⁴ सै छेउड़ी हैरान हुई गो ई, और संचदै लागी कि यीशु आइलै का हओ औलो? तैबे खरकेचार दुई आदमी चौमकिलै जुड़के भीड़ीयो आशी और तिऊं कारे खौड़ै हुरे। ⁵ सै छेउड़ी डौरी गोई और मुंडा झुकाई खौड़ी रौई। तिऊं दुई आदमीऊए तिऊंलै बोलो, "जो जीउंदो आ, तेस तुमै मौरै औन्दै मांझीए कैले लोडाई?" ⁶ यीशु इदै नाई आ पर जीउंदो हुई गौ आ। का तुमुके याद नाई आसती कि यीशुए तुमु आइलै गलील इलाके दी का बोलो आ? ⁷ कि आदमी रौ छोहरू पापी रै हाथै सौंभाणनो जरुरी आ और क़सा माथै चौड़ाइयो झांगणो और चिजै दिनै जीउंदो हुणो आ। ⁸ तैबे तिऊं छेउड़ीऊ के योद आशी कि यीशुए एजी बुशै जरुर बोली थी। ⁹ और सै ओडाची कारे कु वापिस आशी, सै बुशै तिऊंए ग्यारह चलेऊ और ओरी सभोऊके शणाई। ¹⁰ जुणीयै इयै बुशै चलेऊ आइलै लाई सै मरियम मगदलीनी, योअन्ना और याकुबा री आमा मरियम और तिऊंरै साथी री ओर छेउड़ी भी थी। ¹¹ पर चलेऊ के इयै बुशै काहणी जीणी लागी कैलैकि तिऊंके तिऊं छेउड़ीऊ री बुशु माथै विश्वास नाई हओ। ¹² तैबे पतरस उठो और फेटा मैरीयो ओडाची कारे पौंउचो और झुकीयो भितरै जाचदै लागो। तियै तेसके सिर्फ सेऊ कापडो दिशो जेथदी यीशु रौ मौड़ो थो मेटाओ औन्दो, तैबे सेऊ हैरान हुइयो वापिस आशी।

इम्माउसा री बाटा रौ सफर

(मरकुस 16:12-13)

¹³ सेजें दिनें यीशु मानणे वालें दुई आदमी इम्माउस नावां रें एकी गावां दी थै लागे औन्दे डेउन्दे, जो यरुशलेमा कु सात मील दूर थौं।

¹⁴ बाटा दी सै आपु मांझीए एजी बूशे थै लाइंदे लागे औन्दे जो इबी झाऊं यीशु आइलें हुआ थौं। ¹⁵ जैबे सै आपु मांझीए बुशे-धाशे और स्वाल-जवाब थै कौरदे लागे औन्दे तेभी खरकचार आपु यीशु तिऊं कारे परगट हुआ और तिऊं आइलें साथे ई आण्डे लागे।

¹⁶ तिऊं आदमीऊं के यीशु नाई प्राणुओ केलेंकि परमेश्वरे सेऊ प्राणने नां दैओ। ¹⁷ यीशुए तिऊं कु पुछौ तिणी का बूश आ इयै इणी पा जो तुमै आण्डे-आण्डे आपु मांझीए ई लागे औन्दे लाइंदे। सै उदासी कौरी खौंई रोई गोए। ¹⁸ तैबे तिऊं मांझीया कु एकी ऐ बोलौ, जासरौ नाऊं क्लियोपास थौं, "का तु यरुशलेमा शहरा दी एखली आदमी ई जो इबी झाऊं इणौ नाई ज्ञाणदौ कि यरुशलेमा शहरा दी का हुआ?"

¹⁹ यीशुए तिऊं कु पुछौ, "केजी बुशे?" तैबे तिऊंए बोलौ, "सै बुशे जो यीशु नासरी रें बारै दी हुई आ सेऊ एक भविष्यवक्ता थौं, जुणीए नोखे चमतकार किये थै। सेऊ परमेश्वर और सारै लोगु रें सामने परचार कौरा थौं। ²⁰ पर आमारे मुख्य याजकए और धर्मा रें गुरुए यीशु लै मौरने री सजा देइयो कुसा माथै चड़ाओ। ²¹ पर आमारे सुचौ थौं एऊ सेऊ मसीहा आ जुण इस्त्राएल देशा लै छुटकारौ दिया आ। इऊं बुशे बितीओ आज चिजौ दीन आ। ²² आज दोउती जैबे आम मांझीया कु कुछ छेउडी तिये डेई जीये यीशु रौ मौडौ थौं छाडौ औन्दौ, तिऊंए

एक इणी नोखी बूश शुणाई जेथ कौरीये आमै हैरान ई। ²³ सै बोलाई यीशु रौ मौडौ तिरे नाई आसतौ, और तिऊंए परमेश्वरा रें दूत देखे जुणीये तिऊं आइलें बोलौ कि यीशु जीउंदौ हुई गौ आ। ²⁴ आमारे साथी भी कुछ ओडाची कारे डै जीणौ तिऊं छेउडीउए बोलौ थौं तिऊंए तिरे तिणौ देखौ यीशु नाई थौं तिरे। ²⁵ यीशुए तिऊंलें बोलौ, "तुमै केती मुख लोग ई! पवित्र आत्मा कौरीये गुरुए जो कुछ लिखौ औन्दौ आ तेथ माथी तुमुलें विश्वास कौरनौ केती काठौ लागे?"

²⁶ का तिऊं गुरुए एजी बुशा रें बारै दी नाई बोलौ, कि एजी बूशे औणै क पैहलें कि आपणै हक्का रौ राजगादी माथे सौरगा दी डिआ, ऐ सारी बुशे सहन जा कौरनी जेथरे बारै दी तुमै चौपडींदे ई लागे औन्दे। ²⁷ तैबे यीशुए, मुसा और सारै गुरुए जो बुशे पवित्र शास्त्रा दी यीशु रें बारै दी लिखी ऐन्दी सै बुशे तिऊंके एक-एकी कौरीये सारी सौमझाई । ²⁸ तेतीये सै इम्माउस गावां कारे पौउंचे और तिऊंरौ सफर खत्म हुआ। यीशुए इणौ देखाओ कि सेऊ औगाडी-औगाडीये लागे औन्दौ डेउंदे। ²⁹ पर तिऊं दुई आदमीऊं ऐ यीशु काठे कौरी औरज की, "कि आम आइलें रौऊ, केलेंकि ब्याल हुई गोई और दीन ओउडी गौ आ, तैबे यीशु तिऊं आइलें रौइणा लै भितरे डेई गौ आ।" ³⁰ तैबे यीशु तिऊं आइलें रोटी खान्दे बोशी गौ आ, तैबे यीशुए रोटी हाथा दी की और परमेश्वरा रौ धन्यवाद कियो, और चोडीयो तिऊंके देई। ³¹ खरकचार तिऊंरी आखी खुली गो ई और तिऊंए यीशु प्राणी गौ और यीशु तेबी छपी गौ। ³² सै दुई आदमी आपु मांझीये बोलदें लागे,

"जेबी एऊ आमु आइलै थौ बाटा दी बुशै लाइंदै लागौ औन्दौ और धर्मशास्त्रा रौ मतलब थौ समझाऊंदै लागौ औन्दौ का आमारे जीवा दी आग जेई ना लागी?"³³ और से तेबी उठीयौ यरुशलेमा लै आशीयौ तिऊंए से ग्यारह चेलै और बाकी आदमी कौठे देखै।³⁴ जेबै से तिरे पौंउंचै, ता तिऊंए सारेऊ लै बोलौ, कि प्रभु यीशु मसीह सौच्यी जीउंदौ हुई गौ आ और पतरसा के दीशौ आ।³⁵ तैबै तिऊंए बाटा री सारी बुशै तिऊं आइलै लाई और इणौ भी बोलौ कि यीशु आमुए रोटी चोड़दी बारे प्राणौ आ।

यीशु चलेऊ के दिशा सा
(मत्ती 28:16-20; मरकुस 16:14-18; युहन्ना 20:19-23; प्रेरीतौ 1:6-8)

³⁶ और जेबै से बुशै लाइंदै थै लागै औन्दै कि यीशु तेभौ खरकचार परगट हौ यीशुए बोलौ, "तुमुलै शान्ती चाई मिली।"

³⁷ पर
से
सारे
डौरी
गौए,



यीशु चलेऊ के मिला आ 24.36

तिऊंए ज़ाणौ भूत आशी गौ आ।

³⁸ यीशुए पुछौ, "तुमै कैलै घौबरा ई? आपणै जीवा दी शक कैलै कौरा ई?"

³⁹ मैरे हाथ बांगणे देखौ! तैबै तुमुके पौतौ लाग़ा कि हाऊं सेजौ यीशु ऊ। छईयौ देखौ कि हाऊं भूत नाई आसतौ कैलैकि भूता दी मांस और हाडके नाई औन्दै जीणौ तुमै मू देखदे ई लागै

औन्दै मुंदी ता शरीर आ।⁴⁰ इणै बोलदे-बोलदे यीशुए आपणै हाथ तिऊं भिलै बौड़ाए और देखालै। और बांगणे

भी देखालै।⁴¹ सै ग्यारह चेलै और बाकी जो यीशु माथै विश्वास कौरा थै सै हैरानी और खुशी कौरीयै मस्त हुई गौए एजै कारणे की तिऊंके विश्वास नाई थौ औन्दै लागौ औन्दौ। ता यीशुए पुछौ, "का तुमुके कुछ खाणा लै आसती आ?"⁴² तिऊंए यीशु लै बुजी एन्दी माछी रौ कापटु दैओ,⁴³ यीशुए सेऊ माछी रौ कापटु

पाकडौ और चलेऊ काए खाओ।⁴⁴ तैबै तौंए यीशुए बोलौ, "जेबी हाऊं तुमु आइलै साथा दी थौ तेबी मुयै तुमु आइलै बोलौ थौ कि, मुसा और पुराणै गुरु री किताबीऊ और भजन सहेता दी जो कुछ मैरे बारे दी लिखो औन्दौ

आ सै सारी बुशै पुरी हुणी आ।⁴⁵ तैबै यीशुए तीजरी समझ खोली एरी आ ताकी सै पवित्र शास्त्रा री सारी बुशै समझा।⁴⁶ यीशुए तौंए बोलौ, "इणौ भौरी पैहलै थौ लिखौ औन्दौ कि मसिह दुःख उठावा और मौरा और

चिजै दिनें जीऊंदौ हुआ आ।"⁴⁷ और यीशु रे नावां कौरी यरुशलेमा रे शहरा कु शुरु हुइयौ सारै देशा दी मन बदुलने और पापा कु माफी पाइणा रौ सन्देश शुणावा ई।⁴⁸ तुमै इऊं सारी बशा री गवाही आ।⁴⁹ और देखौ, जैथरौ वाइदौ मैरे बाबै कियो आ, आबै हाऊं तुम माथै पवित्र आत्मा उतारा ऊ और जेबो झाऊं तुमै सौरगा कु शक्ती नाई पा लै तेबी झाऊं तुमै एजै इलाके दी रौएऊ।

यीशु रौ सौरगा लै डेऊणौ

(मरकुस 16:19-20; प्रेरीतों 1:9-11)

⁵⁰ यीशुए सै बेतनियाह लै नीं गोए, और आपणै हाथ उठाईयौं चलेऊ लै आशिष देई। ⁵¹ तिऊलै आशीश देंदी बारै यीशु आपणै चलेऊ क अलग हुआ और देखण-देखदु सौरगा लै उठाई गोए। ⁵² चलेऊ ऐ प्रभु यीशु री आराधना की और भौरी खुश हुईयौं यरुशलेमा लै वापिस आशै। ⁵³ और सै परमेश्वरा रै घौरा दी डेइयौं लगातार आराधना कौरा थै।

कठीण आक्षर रौ मतलब

'आदमी रौ छोहरु'

-- यहूदी धर्मशास्त्रा दी यीशु रै बारै दी 'आदमी रौ छोहरु' बोलौं आ, केलेकि परमेश्वर आदमी बौणीयौं एस सणसारा दी आशौं आ। एथीलै यीशु आपुलै 'परमेश्वरा री तौरफा कु भेजौं औन्दौं' बोला आ।

आरामा रौ दिन-- परमेश्वरै छौं: दिना दी सब कुछ चाणौं और सातवै दिनै कियौं आराम। एथीलै हफतै रौ सातवौं दिन यहूदी लोग आरामा रौ दिन माना ई। यहूदीऊ रौ रीति-रिवाज थौं कि आरामा रै दिना दी केजौं भी काम कौरनौं बिलकुल मौना थौं। (बाइबला दी उत्पत्ति 1:1-2:3 पौड़ी)

इस्राएल-- परमेश्वरै भौरी पैहलै याकूबा रौ नाऊं इस्राएल छाड़ौं आ। इस्राएल यहूदी लोगु रौ दुजो नाऊं भी आ कैलैकि इस्राएल देश यहूदी लोगु रौ देश आ।

कैसर राजौं-- कैसर राजौं रोमी लोगु रौ राजौं थौं।

क्रुसा री सजा-- रोमी लोगु री सजा दी चोर डाकु जिणै बौड़ै गुनाह कौरनै वालै लोगु लै मौरनै री सजा देइयौं क्रुसा माथै हाथा लाता दी प्रेगै लाइयौं टांगा थै। तिए सै भौरी दुखा कौरी

मौरा थै। क्रुस बौड़ै चेलला माथै एक छोटै चेतला जोड़ीयौं चाणा थै।

गुरु-- पुराणै जमानै दी परमेश्वरै कुछ इणै लोग थै चुनै औन्दै ज़ासरै ज़रीए परमेश्वर आपणै विचार परगट कौर थै। इऊं चुनै औन्दै लोगु लै नबी या गुरु बोला थै। गुरु रौ मतलब आ जुण परमेश्वरा रै विचार लोगु कारे बोला आ।

दाऊदा रौ छोहरु-- यहूदी धर्मशास्त्रा दी थौं लिखौं औन्दौं कि, जु लोगु बचाउणा लै मसिहा आशा लौ सेऊं दाऊद राजै रै वंशा कु हुआ आ। यीशु दाऊद राजै रै वंशा कु थौं। तेबै यीशु लै दाऊदा रौ छोहरु बोला ई। एथरौ मतलब आ कि यीशु ई मसीहा आ।

दुजी जाति-- जो लोग यहूदी नाई थै तिऊलै यहूदी लोग दुजी जाति माना थै। यहूदी लोग दुजी जाति रै लोगु ककरु जिणै समझा थै।

धार्मिक खम्बली-- यहूदी लोगु रौ रीति-रिवाज थौं कि गांव-गांवा दी धर्म शास्त्रा री शिक्षा लै और अलग-अलग बशु माथै विचार और बहस कौरना लै लोग कौट्टे हुआ थै। इउंलै धार्मिक खम्बली बोला थै।

परमेश्वरा रौ घौर-- परमेश्वरा री आराधना रौ घौर यरुशलेम शहरा दी थौं। यहूदी लोग इदें पुजा कौरना लै और भेट चड़ाउणा लै डिया थै। इदें कबुतर और गाबडु री बली भी चड़ावा थै। एजौं परमेश्वरा री आराधना रौ घौर भौरी बौड़ौं थौं।

परमेश्वरा रौ छोहरु-- यीशु परमेश्वर आ, पर तिऊलै, 'परमेश्वरा रौ छोहरु' भी बोला ई कैलैकि यीशु रौ परमेश्वरा आइलै भौरी प्रेम और गहराई रौ रिशतौं आ जिणौं एकलौतै छोहरु रौ आपणै बाबा आइलै हुआ सा।

परमेश्वरा री पवित्र आत्मा-- परमेश्वर, यीशु और पवित्र आत्मा चिऔं एका ई जिणौं हिऊं, पाणी और

बाफा रे नाऊं अलग-अलग ई, पर चीज़ एका।

पिलातुस--- पिलातुस यहूदा परदेशा दी रोमी सरकारा रौ बौड़ौ आफसर थौ।

फरीसी--- फरीसी लोग यहूदी धार्मिक गुटा रे लोग थै जो यहूदी धर्म शास्त्रा रे हुकम बौड़े ध्याना कौरिऐ माना थै। से औजौ भौरी नियमा रौ पालन कौरा थै। से आपुलै धर्मी समझा थै।

फसह--- फसह यहूदी लोग रौ एक बौड़ौ साजौ आ। यहूदी लोग आपणै बजुरगा री भौरी बगत पैहलै मिस्र देशा री गुलामी क आज़ाद हुणै री खुशी दी फसह रौ साजौ मनावा थै एस साजै मनाउणा लै साला दी एकी बारै यरुश्लेमा दी सारै यहूदी लोग कौड़े हुआ थै। एस साजै रे पैहलै दिना दी हर घौरा रे लोग एक आच्छे गाबड़ री बली चड़ावा थै। फसहा रे सारै दिना लै यहूदी लोग बिणा संजैडै री रोटी खा थै। एखिलै एस साजै लै बिणा संजैडै री रोटी रौ साजौ भी बोलाई।

बप्तिस्मौ--- बप्तिस्मौ यहूदी भाषा रौ अक्षर आ। बप्तिस्मा रौ मतलब आ पाणी दी डुबाउणौ और फेटी खौड़ी उठाउणौ। सारी बुराई और पापा छाड़ियौ नौई जिन्दगी री शुरुआत कौरनै री निशाणी।

मसीह--- यहूदी लोग एक मसीहा रौ इन्तजार कौरदै थै लागै औन्दै, जास्स परमेश्वर तिऊं बचाउणा लै भेजणै वालौ थौ। यहूदी लोग री भाषा दी मसीह अक्षरा रौ मतलब आ चुनौ औन्दौ और भेजौ औन्दौ। यीशु लै मसीह तैबे बोलाई कैलैकि यीशु परमेश्वरा री तरफा क, लोग तिऊं रे पापा री सजा क बचाउणा लै, चुनौ औन्दौ और भेजौ ओन्दौ थौ। यहूदी लोग सुंचा थै इणौ कि मसीह ओमु रोमी सरकारा री गुलामी क छड़ावा। जैबे यीशुऐ इणौ नाई कियो ताँ यहूदी

लोग रे नेते यीशु री बुशै नाई माना थै कि यीशु परमेश्वरा री तरफा क भेजौ औन्दौ मसीह आ। (बाइबला दी दानिय्येल ९:२५ पौड़ौ)

यहूदी लोग--- जो लोग इस्राएल देशा दी रौआ थै तिऊंलै यहूदी लोग बोलाई तिऊं परमेश्वरा रे चुने औन्दै लोग माना ई। जेबी यीशु पैदौ हुआ, तेबी इस्राएल देशा दी रोमी सरकारा रौ राज थौ यहूदी लोग आपणै रीति-रिवाज़ा माथै चाला थै, पर से आज़ाद नाई थै।

यहूदी शास्त्री लोग--- यहूदी शास्त्री लोग यहूदी धर्म शास्त्रा रे बारे दी शिक्षा दिया थै।

याजक--- यहूदी धर्मा रे भाटा लै याजक बोला थै। याजक परमेश्वर और आदमी रे मांझाई हुआ थौ। सेऊ आदमी री भेंटा परमेश्वरा के चड़ावा थौ। और परमेश्वरा रे वचन आदमी के शुणाडा थौ।

परधान याजक--- याजक रे परधाना लै परधान याजक बोला थै। परधान याजक एकी साला लै चुना थै। सेऊ यहूदी फैसले कौरनै वाली खुम्बली रौ परधान भी थौ।

शैतान--- शैतान बुरी आत्माएँ रौ परधान आ। युनानी बोली दी बालजबूल शैताना रौ दुजौ नाऊं थौ, शैतान परमेश्वरा रौ विरोध कौरा आ। जो लोग परमेश्वरा माथै विश्वास कौराई, शैतान तिऊं लोगु पापा री बाटा दी आण्डाउणौ चाह आ।

स्याणै लोग--- यहूदी लोगु रे बजुरग नेते।

सदुकी लोग--- सदुकी लोग एक यहूदी धार्मिक गुटा रे लोग थै जो इणौ माना थै कि मोरनै बासीऐ जीन्दगी नाई आ।

हेरोदेस राजौ--- हेरोदेस अंतिपास नावा रौ एक राजौ गलील परदेश और पैरी परदेशा रौ शासक थौ।

होशन्ना--- यहूदी लोगु री बोली दी होशन्ना रौ मतलब आ, "आमु बौचाऊ।" यहूदी लोग एक मसीहा ज़ागदैं थै लागै औन्दै, ज़ास्स

परमेश्वर तिऊं बचाउणा लै भेजणै वालौ थौ। तैबै थै सै यीशु री होशन्ना बोलदैं लागै औन्दै।

कठीण आक्षरु रौ मतलब

'आदमी रौ छोहरु' यहूदी धर्मशास्त्रा दी यीशु रै बारै दी 'आदमी रौ छोहरु' बोलौ आ, केलेकि परमेश्वर आदमी बौणीयौ एस सणसारा दी आशौ आ। एथीलै यीशु आपुलै 'परमेश्वरा री तौरफा कु भेजौ औन्दौ' बोला आ।

आरामा रौ दिन परमेश्वरै छौ: दिना दी सब कुछ चाणौ और सातवै दिनै कियौ आराम। एथीलै हफतै रौ सातवौ दिन यहूदी लोग आरामा रौ दिन माना ई। यहूदीऊ रौ रीति-रिवाज थौ कि आरामा रै दिना दी केजौ भी काम कौरनौ बिलकुल मौना थौ। (बाइबला दी उत्पत्ति 1:1-2:3 पौड़ी)

इस्राएल परमेश्वरै भौरी पैहलै याकूबा रौ नाऊं इस्राएल छाड़ौ आ। इस्राएल यहूदी लोगु रौ दुजो नाऊं भी आ कैलेकि इस्राएल देश यहूदी लोगु रौ देश आ।

कैसर राजौ कैसर राजौ रोमी लोगु रौ राजौ थौ।

क्रुसा री सजा रोमी लोगु री सजा दी चोर डाकु ज़िणै बौडै गुनाह कौरनै वालै लोगु लै मौरनै री सजा देइयौ क्रुसा माथै हाथा लाता दी प्रेगै लाइयौ टागा थै। तिणै सै भौरी दुखा कौरि मौरा थै। क्रुस बौडै च़ेवला माथै एक छोटै च़ेउला ज़ोड़ीयौ चाणा थै।

गुरु पुराणै ज़मानै दी परमेश्वरै कुछ इणै लोग थै चुनै औन्दै जासरै ज़रीए परमेश्वर आपणै विचार परगट कौर थै। इऊं चुनै औन्दै लोगु लै नबी या गुरु बोला थै। गुरु रौ मतलब आ जुण

परमेश्वरा रै विचार लोगु काए बोला आ।

दाऊदा रौ छोहरु यहूदी धर्मशास्त्रा दी थौ लिखौ औन्दौ कि, जु लोगु बचाउणा लै मसिहा आशा लौ सेऊं दाऊद राजै रै वंशा कु हुआ आ। यीशु दाऊद राजै रै वंशा कु थौ। तैबै यीशु लै दाऊदा रौ छोहरु बोला ई। एथरौ मतलब आ कि यीशु ई मसीहा आ।

दुजी जाति जो लोग यहूदी नाई थै तिऊंलै यहूदी लोग दुजी जाति माना थै। यहूदी लोग दुजी जाति रै लोगु ककरु ज़िणै समझा थै।

धार्मिक खम्बली यहूदी लोगु रौ रीति-रिवाज थौ कि गाँव-गाँवा दी धर्म शास्त्रा री शिक्षा लै और अलग-अलग बुशु माथै विचार और बहस कौरना लै लोग कौडै हुआ थै। इउंलै धार्मिक खम्बली बोला थै।

परमेश्वरा रौ घौर परमेश्वरा री आराधना रौ घौर यरुश्लेम शहरा दी थौ। यहूदी लोग इदैं पुजा कौरना लै और भेट च़ड़ाउणा लै डिया थै। इदैं कबुतर और गाबडु री बली भी च़ड़ावा थै। एजौ परमेश्वरा री आराधना रौ घौर भौरी बौडै थौ।

परमेश्वरा रौ छोहरु यीशु परमेश्वर आ, पर तिऊंलै, 'परमेश्वरा रौ छोहरु' भी बोला ई कैलेकि यीशु रौ परमेश्वरा आइलै भौरी प्रेम और गहराई रौ रिशतौ आ ज़िणौ एकलौतै छोहरु रौ आपणै बाबा आइलै हुआ सा।

परमेश्वरा री पवित्र आत्मा परमेश्वर, यीशु और पवित्र आत्मा चिऔ एका ई जिणौ हिऊं, पाणी और बाफा रै नाऊं अलग-अलग ई, पर चीज़ एका।

पिलातुस पिलातुस यहूदा परदेशा दी रोमी सरकारा रौ बौड़ौ आफसर थौ।

फरीसी फरीसी लोग यहूदी धार्मिक गुटा रै लोग थै जो यहूदी धर्म शास्त्रा रै हुकम बौड़ै ध्याना कौरिऐ माना थै। सै औजौ भौरी नियमा रौ पालन कौरा थै। सै आपुलै धर्मी समझा थै।

फसह फसह यहूदी लोग रौ एक बौड़ौ साजौ आ। यहूदी लोग आपणै बजुरगा री भौरी बगत पैहलै मिस्र देशा री गुलामी कु आजाद हुणै री खुशी दी फसह रौ साजौ मनावा थै एस साजै मनाउणा लै साला दी एकी बारै यरुशलेमा दी सारै यहूदी लोग कौड़ै हुआ थै। एस साजै रै पैहलै दिना दी हेर घौरा रै लोग एक आच्छे गाबड़ री बली चड़ावा थै। फसहा रै सात दिना लै यहूदी लोग बिणा संजैडै री रोटी खा थै। एखिलै एस साजै लै बिणा संजैडै री रोटी रौ साजौ भी बोलाई।

बप्तिस्मौ बप्तिस्मौ यहूदी भाषा रौ अक्षर आ। बप्तिस्मा रौ मतलब आ पाणी दी डुबाउणौ और फेटी खौड़ी उठाउणौ। सारी बुराई और पापा छाड़ियौ नौई जिन्दगी री शुरुआत कौरनै री निशाणी।

मसीह यहूदी लोग एक मसीहा रौ इन्तजार कौरदै थै लागै औन्दै, जास्स परमेश्वर तिऊं बचाउणा लै भेजणै वालौ थौ। यहूदी लोग री भाषा दी मसीह अक्षरा रौ मतलब आ चुनौ औन्दौ और भेजौ औन्दौ। यीशु लै मसीह तैबै बोलाई कैलैकि यीशु परमेश्वरा री तरफा कु, लोग तिऊंरै पापा री सजा कु बचाउणा लै, चुनौ औन्दौ और भेजौ ओन्दौ थौ। यहूदी लोग सुंचा थै इणौ कि मसीह ओमु रोमी सरकारा री गुलामी कु छड़ावा। जैबै यीशुऐ इणौ नाई कियो ताँ यहूदी

लोग रै नेते यीशु री बुशै नाई माना थै कि यीशु परमेश्वरा री तरफा कु भेजौ औन्दौ मसीह आ। (बाइबला दी दानिय्येल ९:२५ पौड़ौ)

यहूदी लोग जो लोग इस्राएल देशा दी रौआ थै तिऊंलै यहूदी लोग बोलाई तिऊं परमेश्वरा रै चुनै औन्दै लोग माना ई। जेबी यीशु पैदौ हुआ, तेबी इस्राएल देशा दी रोमी सरकारा रौ राज थौ यहूदी लोग आपणै रीति-रिवाजा माथै चाला थै, पर सै आजाद नाई थै।

यहूदी शास्त्री लोग यहूदी शास्त्री लोग यहूदी धर्म शास्त्रा रै बारे दी शिक्षा दिया थै।

याजक यहूदी धर्मा रै भाटा लै याजक बोला थै। याजक परमेश्वर और आदमी रै मांझाई हुआ थौ। सेऊ आदमी री भंटा परमेश्वरा के चड़ावा थौ। और परमेश्वरा रै वचन आदमी के शुणाडा थौ।

परधान याजक याजक रै परधाना लै परधान याजक बोला थै। परधान याजक एकी साला लै चुना थै। सेऊ यहूदी फैसलै कौरनै वाली खुम्बली रौ परधान भी थौ।

शैतान शैतान बुरी आत्माएँ रौ परधान आ। युनानी बोली दी बालजबूल शैताना रौ दुजौ नाऊं थौ, शैतान परमेश्वरा रौ विरोध कौरा आ। जो लोग परमेश्वरा माथै विश्वास कौराई, शैतान तिऊं लोग पापा री बाटा दी आण्डाउणौ चाह आ।

स्याणै लोग यहूदी लोग रै बजुरग नेते।

सदुकी लोग सदुकी लोग एक यहूदी धार्मिक गुटा रै लोग थै जो इणौ माना थै कि मोरनै बासीऐ जीन्दगी नाई आ।

राजौ हेरोदेस अंतिपास नावां रौ एक राजौ गलील परदेश और पैरी परदेशा रौ शासक थौ।

होशन्ना यहूदी लोगु री बोली दी होशन्ना रौ मतलब आ, "आमु बौचाऊ।" यहूदी लोग एक मसीहा जागदै थै लागै औन्दै, जास्स

परमेश्वर तिऊं बचाउणा ले भेजणै वालौ थौ। तैबे थै सै यीशु री होशन्ना बोलदै लागै औन्दै।

For Christian resources visit: www.paharimahasui.in



Published by :

OPERATION AGAPE

Agape Bhawan, B-XI-1995, Brown Road,
Ludhiana, Punjab, India. Ph : 0161-2610761, 5002024.

Email : mail@operationagape.com. Web : www.operationagape.com.

Designed by Agape Vision